

## **PLENO DO EXCMO. CONCELLO.- NUM. 7.**

### **SESION ORDINARIA DO 30 DE MAIO DE 2018**

#### **ASISTENTES**

##### **POLO GRUPO MUNICIPAL. SOCIALISTA**

Excmo. Sr. Alcalde  
Alonso Suárez, Olga  
Aneiros Pereira, Jaime  
Blanco Iglesias, Eugenia Dolores  
Caride Estévez, María José  
Fernández Pérez, José Manuel  
Iglesias González, Ana Laura  
Lago Rey, M<sup>a</sup> Jesús  
López Font, Carlos  
Marra Domínguez, M<sup>a</sup> Angeles  
Pardo Espiñeira, Francisco Javier  
Regades Fernández, David  
Rivas González, Ángel  
Rodríguez Díaz, Santos Héctor  
Rodríguez Escudero, Cayetano

##### **POLO GRUPO MUNICIPAL DO PARTIDO POPULAR**

Egerique Mosquera, Teresa  
Fidalgo Iglesias, Miguel  
Gago Bugarín, Diego José  
González Sánchez, Elena  
Muñoz Fonteriz, Elena  
Piñeiro López, Ángel

##### **POLO GRUPO MUNICIPAL DE MAREA DE VIGO**

Jácome Enríquez, Xosé Lois  
López Barreiro, Margarida  
Pérez Correa, Rubén

#### **NON ASISTEN:**

Abelairas Rodríguez, Isaura (concelleira do grupo municipal Socialista)  
Silva Rego, M<sup>a</sup> Carmen (concelleira do grupo municipal Socialista)  
Figueroa Vila, José M. (concelleiro do grupo municipal do Partido Popular)

No salón de Plenos da Casa do Concello de Vigo, ás nove horas e dez minutos do día trinta de maio do ano dous mil dezaioito, coa Presidencia do Excmo. Sr. Alcalde, D. Abel Ramón Caballero Álvarez, e asistencia dos concelleiros Sres. e Sras. Alonso Suárez, Aneiros Pereira, Blanco Iglesias, Caride Estévez, Egerique Mosquera, Fernández Pérez, Fidalgo Iglesias, Gago Bugarín, González Sánchez, Iglesias González, Jácome Enríquez, Lago Rey, López Barreiro, López Font, Marra

Domínguez, Muñoz Fonteriz, Pardo Espiñeira, Pérez Correa, Piñeiro López, Regades Fernández, Rivas González, Rodríguez Díaz, Rodríguez Escudero, actuando como Secretario Xeral do Pleno que asina D. José Riesgo Boluda, constituíuse o Pleno da Excma. Corporación en sesión ORDINARIA conforme á convocatoria e segundo a orde do día remitida a todos os Sres. e Sras. concelleiros e concelleiras coa antelación legalmente requirida. Está tamén presente o Interventor Xeral Municipal, don Alberto Escariz Couso.

PRESIDENCIA: Iniciamos o Pleno do Concello, convocatoria sesión ordinaria as nove horas de hoxe en poder das señoras/es concelleiros, constamos quórum, ábrese sesión pública e iniciamos o Pleno.

Hai unha demanda do grupo Popular solicitando o cambio do punto 15 para ocupar o punto 5.bis, a efectos de que a moción que aparece co número 15 non é tanto de control ao goberno local como de accións sobre outras administracións, e polo tanto por recomendación do secretario do Pleno cámbiase para moción 5. bis, aceptado ese cambio na orde do día, procedemos co desenvolvemento do Pleno.

### **PARTE RESOLUTIVA**

#### **1(75).- ACTAS ANTERIORES: (EXTRAORDINARIA E URXENTE DO 7.03, EXTRAORDINARIA DO 26.03 E ORDINARIA (MARZO) DO 5.04.2018)**

Por unanimidade dos vinte e catro membros presentes da Corporación dos vinte e sete que a constitúen de dereito e de feito, apróbanse as actas do Pleno da Corporación correspondentes ás sesións: extraordinaria e urxente do 7.03, extraordinaria do 26.03 e ordinaria (marzo) do 5.04.2018.

#### **2(76).- COMPARECENCIA DO SERVIZO DE PARTOS OU MATRONAS DO**

**HOSPITAL ÁLVARO CUNQUEIRO DE VIGO, EN VIRTUDE DA ACTUAL SITUACIÓN DAS ENFERMEIRAS ESPECIALISTAS EN OBSTETRICIA-GINECOLOGIA. REXISTRO PLENO 1778/1101.**

ANTECEDENTES: Mediante escrito de D. Joaquin Llorca Lis, en representación do Colexio Oficial de Enfermería de Pontevedra, con data de entrada no Rexistro electrónico do Concello de Vigo, 22.05.2018, solicitan a comparecencia no próximo Pleno do Concello para manifestar a problemática do Servizo de Partos ou Matronas do Hospital Alvaro Cunqueiro de Vigo.

PRESIDENCIA: Interverá representando a este colectivo de matronas doña Silvia Gonçalves, matrona do hospital Álvaro Cunqueiro.

Damos a benvida a dona Silvia Gonçalves, ten a palabra durante un tempo aproximado de 5 minutos.

SRA. SILVIA GONÇALVEZ: Bos días. Represento a unha ampla maioría das miñas compañeiras da área de partos do Hospital Álvaro Cunqueiro de Vigo, e acudimos hoxe a este pleno lonxe de calquera intención política. Facémolo porque necesitamos facernos oír aínda máis claro e, sobre todo, porque entendemos que é neste pleno onde está a representación da cidade e consideramos que os cidadáns de Vigo teñen o dereito de coñecer de primeira man cal é a nosa situación, debido a que lles afecta, como pacientes e usuarios, hoxe e mañá. Acudimos co respaldo, asesoramento e en representación do Colexio Oficial de Enfermería de Pontevedra, cuxo principal labor profesional é que as enfermeiras e matronas podamos realizar o noso traballo en condicións de calidade, e cuxo principal labor social é que calquera paciente reciba unha asistencia de calidade.

Son estes dous condicionantes, a calidade á hora de facer o noso traballo e a calidade que reciben as nosas pacientes, o que nos fai estar hoxe aquí. No noso servizo existe unha diminución na calidade asistencial que vén dada por un único motivo, a falla de matronas e de auxiliares de enfermería. O noso servizo conta con 12 UTPR, Unidades de Traballo de Parto e Recuperación, para que vostedes o entendan, antigamente atendíase secuencialmente, primeiro nunha sala de dilatación, de aí pasábase á sala de partos e despois á habitación. Actualmente

esta atención é integral, cada muller realiza a totalidade do proceso nunha destas salas UTPR. Estas 12 unidades están atendidas por catro matronas por quenda á que se suma unha quinta só polas tardes e cinco días á semana, aínda que non sempre, por distintas causas.

É dicir, contamos cunha matrona por cada 3 parturientas. É importante aquí sinalar que o servizo de partos considérase un servizo de urxencias, a nosa operatividade ha de estar dispoñible as 24 horas, e o persoal debería ser sempre o mesmo, porque os nenos non nacen os martes ou os xoves, de noite ou de día, senón que nacen cando teñen que nacer e nós temos que estar aí nese momento. Seica os bombeiros están só no cuartel cando saben que ese día vai haber unha catástrofe? A Organización Mundial da Saúde recomenda que un parto sexa atendido por unha matrona, cun cociente de 1 a 1 que só excepcionalmente podería ser de 1 a 2 pero nunca superalo para que a atención ao parto poida ser natural e de calidade. Cabe sinalar que é un proceso cunha media de doce horas de duración, xa que non é só a atención ao nacemento senón todo un proceso previo e posterior ao parto.

Esta é a realidade do noso servizo fronte ao xogo de números da dirección do Hospital que trata de englobar xunto ás matronas de paritorio a outras tres compañeiras, que sendo matronas atenden o servizo de urxencias, consultas e prepartos, e coas que non podemos contar en situacións de saturación, sería vestir un santo para desvestir outro. A realidade é que tivemos que asumir como válida a atención a dúas parturientas por cada unha de nós, e só cando esta expectativa supérase a dirección do hospital permítenos solicitar un reforzo. Ollo! Non nos deixan solicitalo cando temos a previsión de sobrecarga, só cando xa a temos encima. Esta situación de sobrecarga dáse polo menos unha vez á semana, e de cada cinco intentos de atopar a unha matrona que veña a reforzar, catro son infrutuosos. E cando se localiza a alguén, ás veces non chega, ou chega tarde.

Días atrás aparecemos en prensa relatando toda esta situación. Días despois faino a plana maior do Hospital celebrando o nacemento 10.000 do noso hospital. Somos matronas, non expertas en comunicación, pero resúltanos curioso canto menos que nin a matrona que asistiu ao nacemento dese neno estivese presente nese acto. Tan só o xerente, xefes de servizo e supervisores, é dicir, aqueles que poden tomar as decisións para que a calidade asistencial sexa adecuada, aparecen tras unha branca noticia aparentando unha normalidade que non é real,

basicamente porque non son eles quen a viven senón que somos nós. Que o máximo responsable deste Hospital diga que o noso servizo conta cunha “cifra suficiente para facer unha atención adecuada” é paradoxal e falto de realidade; que aluda só á cifra do número de partos o é aínda máis. Como acabamos de explicar o proceso do nacemento non se limita ao parto en si, é moito máis, por non falar das xestacións de risco, gemelares, feticidios, etc. Poida que haxa menos partos, pero a súa complexidade é maior. Atender simultaneamente dous ou tres partos, botar unha man a unha compañeira, vixiar as monitoraxes das nais e dos bebés e moitos outros detalles máis técnicos forman parte tamén das nosas funcións.

Que o xerente deste hospital aluda unicamente ao número de partos para xustificar as nosas demandas cando o propio Sergas recolle na súa Estratexia 2020 aspectos a mellorar como a “Protección da Lactación Materna” ou a “Mellora de Atención ao Embarazo, Parto e Puerperio”, dá idea da súa escasa implicación en que o noso servizo e os seus pacientes contan cunha excelente calidade. Precisamente “mellorar a viabilidade dos servizos que se prestan con intervencións que incrementen a calidade asistencial e a seguridade do paciente” é unha das 20 liñas estratéxicas expostas na estratexia Sergas 2020. Unha declaración de intencións lonxe de poder ser levada á práctica no noso hospital, o papel aguántao todo. Déixennos facer ben o noso traballo, propicien as condicións para que o noso traballo non sexa un bo traballo, senón un excelente traballo, que as protagonistas desta situación podamos sentarnos ante un medio de comunicación ou neste caso ante este pleno, e contar as realidades do que está a suceder é irrevogable, somos nós quen temos os datos e vivimos as situacións en primeira persoa, calquera contestación que non acepte por enteiro que isto é así é falsear a realidade.

Ese neno 10.000 naceu estupendamente, como o fan a inmensa maioría dos bebés no noso hospital, as súas nais agradéceno, pero é que as súas nais descoñecen que poderían e deberían estar a recibir un trato aínda moi superior ao que reciben ou descoñecen que son moitas as ocasións nas que é a nosa implicación profesional e o noso sentido do compromiso o que nos fai empeñarnos ao máximo para que reciban a mellor atención a pesar das carencias. Esas carencias, que son solucionables, pasan por aumentar a seis o número de matronas por cada quenda, incrementando tamén o número de auxiliares. Iso permitiríanos achegarnos a esa

excelencia na calidade que consideramos que os cidadáns de Vigo merecen. Iso permitiríanos tamén poder traballar con menos tensión, maior atención, máis coidado, e impediría que en moitas ocasións teñamos que irnos a casa esgotadas física, mental e emocionalmente.

O noso compromiso é e seguirá sendo a mellor atención posible coa maior calidade posible, pero necesitamos máis mans, necesitamos máis profesionais e dotacións adecuadas. Créanme que xa se deron situacións moi graves, de alto risco para a paciente ou o seu bebé. Non somos nin pretendemos ser alarmistas, todo o contrario, pero oxalá que non teñamos que comparecer nunca dicindo que xa o advertimos, porque ese “anxo” que parecemos ter non vai durar sempre. Creo que non me equivoco se digo que para tódolos que somos pais e nais, asociamos o día do nacemento dos nosos fillos, directa ou emocionalmente como un dos días máis importantes das nosas vidas. O que para unha matrona é un día máis de traballo, pode significar o día máis importante na vida dunha familia, a nosa función é esa, e queremos que siga sendo así, así que permítannos por favor facer aínda mellor o noso traballo. Moitas grazas.

PRESIDENCIA: Moitas grazas Sra. Gonçalves pola súa intervención, quenda de grupos.

DEBATE:

SRA. LÓPEZ BARREIRO: Eu non estaba segura si tiñamos que intervir despois desta exposición pero agradézolle moito á profesional que deu paso para denunciar aquí neste Pleno esta falla de recursos porque eu efectivamente como todos sabedes traballo no hospital e seguramente traballei contigo nalgunhas ocasións e son consciente, teño ben claro que todo o que aquí dis é certo. A situación das enfermeiras do hospital Álvaro Cunqueiro é semellante á situación de todo o persoal do hospital Álvaro Cunqueiro e a tódalas traballadoras/es e da sanidade de toda Galicia, non só do Álvaro Cunqueiro, e do mundo onde goberna o Partido Popular.

Está claro que o servizo de matronas, de partos, é un servizo crítico que necesita moito máis reforzo e moito máis formación e recursos que noutro sitio calquera

porque é un servizo, efectivamente como ti dixeches que cada momento pode ser definitivo para a vida dunha persoa.

Iso é agora mesmo tamén se suma ao problema que hai coas TCAE, cos pediatras, que non hai, eu supoño que tamén algo do problema que aquí traes ten que ver con que non hai ao mellor moitas matronas na lista de contratación, habería que saber por que non hai enfermeiras, pediatras, certos profesionais nas listas de contratación, será por algo que quen goberna no prevé, non é só un problema do Álvaro Cunqueiro senón que é un problema da xestión da sanidade galega en xeral. En definitiva, que o que pretende sempre o Partido Popular con estas historias é en detrimento da sanidade pública, favorecer aos hospitais privados, dicirlles a xente que hai mala xestión, que pode haber perigo e a xente facer seguros privados e ir a encherlles os petos á sanidade privada e aos profesionais que ás veces traballan dobremente na pública e na privada ou só na privada. Eu creo que non hai moito máis que dicir, que está claro que xa trouxemos aquí temas deste tipo en moitas ocasións e que todo o mundo sabemos o que pensamos uns e outros desta situación.

SR. PIÑEIRO LÓPEZ: En primeiro lugar agradecerche que viñeras ao Pleno, compañeira a ademais amiga persoal, en principio queríamos darlle as grazas por virnos a contar un pouco a situación, darlles as grazas tamén porque o voso servizo a pesares de todo ten unha valoración de 9 sobre 10 de tódalas usuarias no hospital, hospital que cambiou moito, incluso no seu procedemento como ben nos contabas en canto aos partos e iso mellorou moito a calidade. Isto que nos contas, loxicamente o recollemos, entendemos que é unha demanda en pro da mellora da asistencia das pacientes e da vosa propia situación laboral, loxicamente sempre que escoitamos a un colectivo profesional con estas demandas, o temos que escoitar con moita atención e a min me gustaría non politizar isto, é difícil non politizar no Pleno un asunto deste tipo e creo que o foro sería loxicamente que poderíamos ter, coa xerencia ou coa consellería, un trato sobre este tema a falalo con calma e en principio creo que o que propón é un tema que é mellorable e que pola nosa parte ides ter todo o noso apoio.

Insisto, darvos as grazas porque traedes ao mundo a miles de vigueses, non só vigueses senón xente de toda a área e con gran éxito e recoller a vosa

preocupación por problemas de saturación que todos tivemos no hospital máis dunha vez e recollemos o guante e estaremos atentos para que segades mantendo ese 9 sobre 10, sendo o servizo mellor valorado do hospital.

SR. RODRÍGUEZ ESCUDERO: Señora representante do colectivo de matronas neste Pleno, en nome do grupo municipal socialista neste Pleno, representante da maioría social e electoral desta cidade, quero expresarlle a nosa gratitude pola súa presenza neste Pleno e por traer aquí o que é realmente a esencia dos problemas que aducen a un servizo fundamental da sanidade desta cidade. A súa presenza, Sra. Silvia en representación deste colectivo, nos reconcilia co mellor da profesión, cos valores éticos e sociais e claro que isto é un Pleno e política porque a política está no fondo das decisións cando se adopta por un modelo e por outro, porque o que está aquí, o que late non é consecuencia dun déficit puntual dun déficit de persoal dun servizo, isto é problema estrutural, é un problema de política sanitaria, de política con maiúsculas por iso temos a lexitimación e a lexitimidade de abordalo con todo o rigor pero tamén con toda a contundencia neste Pleno, polo tanto gratitude inmensa por estar presente neste foro que é o foro de representación da sociedade civil de Vigo, porque como dicía antes, estamos a falar dun problema que é a expresión dun conflito, dunha política e dun modelo político, e da expresión por tanto, dese modelo político na expresión dese modelo que se elixiu para dotar a esta cidade do hospital que necesitaba e que realmente non está respondendo ás necesidades que a sociedade e o colectivo desta cidade e da área, necesitaba. Proba diso é a recorrente presenza de conflitos de indeficiencias, de déficit de estruturas que a pesares de tres anos próximos á inauguración se veñen recorrentemente aparecendo nos medios de comunicación e aparecendo en tódolos foros sociais profesionais, polo tanto, debéramos asumir que este é modelo dun fracaso, o fracaso dun modelo político, de por suposto do goberno do Partido Popular de Galicia, e o dicimos aquí con plena lexitimidade igual que eu noutros foros puiden dicir que hai aspectos de nova lei de sanidade que estou de acordo con eles, a pesares de que non son unha corrente predominante, pero así o dixen, coa mesma lexitimidade hoxe Vigo que isto é así, isto é a expresión dun programa político e un problema realmente dun compromiso determinado da política do Partido Popular e así o levamos expresado durante



anos, como foron dende o inicio o episodio das infeccións por Aspergillus, a rotura de cañerías e caídas de teito, os recortes no número de quirófanos e camas de observación, a pésima calidade da construción, a tres anos, onte estiven na hospital por motivos persoais e é patético ver a calidade da estrutura, o prezo abusivo do aparcadoiro, todo iso fixo que 200.000 persoas saísen a rúa nunha manifestación histórica e o posicionamento de máis de 300 facultativos do hospital contra o modelo político do novo hospital, todo iso acabou coa destitución da conselleira, co fin de atenuar o conflito, grave erro porque o problema non é a conselleira é a política sanitaria e os intereses do Sr. Feijóo e do Partido Popular. Por todo iso, os problemas continúan e se agravarán no tempo porque os problemas están relacionados coa política sanitaria como o demostra o sangrante e clónico proceso de descapitalización da poboación e dos recursos da área para beneficiar artificialmente e politicamente e contra toda evidencia e principio básico e ético a planificación da área sanitaria de Vigo, o colapso nas urxencias a pesares de se dixera que non volverían co novo hospital, os recentes problemas co modelo imposto en esterilización, laboratorio, a conflictividade recorrente de varios colectivos como se demostra aquí, auxiliar de clínicas, celadores, gran parte dos problemas son derivados do modelo do hospital pero por suposto, en beneficio das grandes construtoras e en contra dos intereses da sanidade pública porque os recortes que se producen en persoal son de medios fundamentalmente para sufragar os sobrecustes do propio hospital, e ese realmente o problema que temos, e o peor está por vir.

PRESIDENCIA: Rematados os grupos, dona Silvia Gonçalves quero reiterarlle o apoio do goberno desta cidade as súas demandas, a súa posición e recoñecerlles que vostedes, profesionais coa súa praza en propiedade, co seu traballo asegurado o que están a facer é defendendo a calidade da asistencia sanitaria e a prestación da súa labor o cal aínda dignifica máis a súa presenza aquí e lle da máis valor porque están vostedes actuando en defensa de tantas mulleres e da súa capacidade profesional para atendelas e polo tanto este goberno seguirá atento á evolución, seguirá prestándolles o apoio e seguirá recoñecendo a súa gran calidade profesional e a súa razón absoluta na súa demanda, moitas grazas Sra. Silvia.

## **DITAMES DAS COMISIÓNS INFORMATIVAS:**

### **3(77).- CESIÓN GRATUÍTA DE USO DE PARCELA MUNICIPAL DE CARÁCTER PATRIMONIAL Á ASOCIACIÓN AMENCER-ASPACE PARA A CONSTRUCCIÓN DUN CENTRO DE ENSINANZA E ATENCIÓN INTEGRAL PARA USUARIOS POR PARÁLISE CEREBRAL. EXPTE. 1473/110. REXISTRO PLENO 1766/1101.**

ANTECEDENTES.- Con data 18 de maio de 2018, o secretario xeral do Pleno co conforme do concelleiro delegado de Parques e Xardíns, Comercio, Participación Cidadá e Distritos, emite o seguinte informe proposta,

“Lexislación aplicable.

LPAP. Lei 33/2003, de 3 de novembro, do Patrimonio das Administracións Públicas.

LBRL. Lei 7/1985, de 2 de abril, Reguladora das Bases do Réxime Local.

RB. Real Decreto 1372/1986, de 13 de xuño, polo o que se aproba o Regulamento de Bens das Entidades Locais.

Antecedentes. Con data de 28.12.2017 a Xunta de Goberno Local adoptou acordo aprobar convenio de colaboración coa Fundación Amancio Ortega (FAO) e a Asociación de atención á parálise cerebral e afines “AMANCER- ASPACE” para a construción pola Asociación no termo municipal de Vigo, e co financiamento da FAO, un novo centro de ensinanza e atención integral para usuarios afectados por parálises cerebral en grado severo e no tramo de idade dende os 0 aos 21 anos e dirixido a unha poboación estimada de 145.

O Convenio foi asinado en data 8.01.2018; na súa cláusula Segunda o Concello de Vigo, comprométiase, no prazo dos tres meses seguintes á súa sinatura, a tramitar e resolver expediente de cesión gratuíta (transmisión) a favor de AMANCER ASPACE relativo a parcela da súa propiedade dunha superficie de 6.068,00 m<sup>2</sup>, localizada en finca matriz sita no camiño de Areeiro s/n, Bembrive, identificada provisionalmente no Inventario Municipal de Bens baixo o número 1-1805; a tales fins, previo acordo da Xunta de Goberno Local de data 13.03.2018 se ten procedido a segregar da parcela matriz a superficie indicada (6.068,00 m<sup>2</sup>) e, de conformidade co sinalado no artigo 36.1 da LPAP, a inscrición da finca resultante no Rexistro da Propiedade N<sup>o</sup>2 de Vigo con expresión das súas representacións gráficas, resultando, segundo nota simple informativa que consta no Expediente, a seguinte descrición:

Localización: camiño do Areeiro, Bembrive.  
Superficie: 6.068,00 m2.  
Titular. Concello de Vigo, 100 %.  
Natureza do dominio: Patrimonial.  
Destino: Centro de atención integral. Ordenanza 4.5. Uso dotacional.  
Tomo: 2896. Libro: 1662. Folio: 143. Finca: 83830.  
Norte: Camiño de Areeiro.  
Sur: Resto de finca matriz.  
Leste: Resto de finca matriz.  
Oeste. Finca 83828 do Rexistro.  
Ref. Cat.:54057A10200700000BS

Instrumentado o Expediente de cesión advirtiose que o valor da parcela a transmitir elevábase, segundo informe técnico emitido pola xefatura de planeamento en data 23.03.2018, a cantidade de 1.120.346,98 euros; tal importe recomendaba que a cesión gratuíta prevista non fora unha “cesión de propiedade” (transmisión), senón unha “cesión de uso”, tamén gratuíta, mais acorde co espírito do artigo 145.4 da LPAP que, aínda que referíndose a Administración do Estado, contempla as cesións gratúitas en propiedade dos bens patrimoniais tan so para o caso de que os cesionarios sexan Comunidades Autónomas, Entidades Locais ou Fundacións Públicas, que non é o caso.

En tal consideración o Concelleiro delegado de Distritos, no uso da facultade prevista no acordo adoptado pola Xunta de Goberno Local en data 28.12.2017, acordou aprobar o proxecto de modificación do convenio de colaboración asinado en data de 8.01.2018 coa FUNDACIÓN AMANCIO ORTEGA (FAO) e a ASOCIACIÓN DE ATENCIÓN A LA PARÁLISIS CEREBRAL Y AFINES “AMENCER-ASPACE” no sentido de outorgar unha nova redacción ás Cláusulas Segunda e Terceira do Convenio mudando a prevista “cesión gratuíta de propiedade” a “cesión de uso” a trinta anos sen prexuízo de que, transcorrido tal prazo, se pacte unha nova cesión para os mesmos ou similares fins e por un novo prazo dun máximo de trinta anos, ou, no seu caso, cesión gratuíta da propiedade da parcela.

En virtude do exposto procede instrumentar o procedemento de cesión de uso gratuíto da parcela segregada a favor de “AMENCER-ASPACE”, a tal efecto emítase o seguinte,

#### INFORME-PROPOSTA

I. O RB non contempla as cesións gratúitas de uso de bens patrimoniais, ante o silencio legal, en aplicación do sinalado no artigo 1 do RB, cabe acudir o dereito supletorio contido na LPAP cuxo artigo 145.1 -aínda que referíndose á Administración do Estado- sinala que os bens cuxa afectación non se xulgue previsible poderán ser cedidos gratuitamente para a realización de fins de utilidade pública ou interese social da competencia do cesionario podendo ser beneficiarias asociacións declaradas de utilidade pública; o artigo 145.3 da mesma norma admite que a cesión gratuíta pode ter por obxecto a “propiedade” do ben ou exclusivamente o seu dereito de “uso”; conclúe indicando que tal cesión levará

aparellada para o cesionario a obriga de destinar o ben o fin expresado no correspondente acordo.

A Asociación de atención á parálise cerebral e afines "AMENCER-ASPACE" foi declarada de interese público en virtude de Orde do Ministerio de Interior de 22.04.1997 e inscrita no Rexistro Provincial de Asociacións co número 1991/002358-1

II. A lexislación de réxime local non regula o procedemento de cesión de uso gratuíta dos bens patrimoniais; respecto da cesión gratuíta da propiedade o RB, dado o carácter da transmisión (enaxenación), sinala un procedemento rexido e garantista que, sen prexuízo de que sexa orientativo, non require ser reproducido na súa integridade no suposto dunha mera cesión de uso na que o Concello conserva a propiedade do ben.

III. No Expediente consta a seguinte documentación:

Certificación catastral descritiva e gráfica da parcela.

Convenio de colaboración coa Fundación Amancio Ortega (FAO) e a Asociación de atención á parálise cerebral e afines "AMANCER- ASPACE" para a construción pola Asociación no termo municipal de Vigo, e co financiamento da FAO, un novo centro de ensinanza e atención integral para usuarios afectados por parálises cerebral no que se xustifica que o fin perseguido redunda de maneira evidente e positiva en beneficio dos cidadás do Concello de Vigo.

Nota simple informativa do Rexistro da Propiedade nº 2 de Vigo expedida en data 23.04.2018 acreditativa de que a finca se atopa debidamente inscrita en concepto de ben patrimonial do Concello de Vigo, a nota informa que a parcela ten o número 4806 do epígrafe 1 do Inventario Municipal de bens e dereitos do Concello de Vigo.

Informe de data 23.03.2018 suscrito pola arquitecta da Xerencia municipal de Urbanismo no que se indica que a parcela non está comprendida dentro de ningunha área de desenvolvemento urbanístico ou plan de reforma, non constando que sexa previsible, nun prazo de dez anos, a súa incorporación a un plan de desenvolvemento, non estando previsto outro uso distinto o dotacional para tal zona.

IV. Aínda que referíndose a cesións gratuítas de propiedade (enaxenacións), o artigo 110.1 do RB sinala que, en todo caso tales, cesións requirirán de acordo do Pleno do Concello adoptado co voto favorable da maioría absoluta legal dos membros da Corporación; enténdese que as cesións gratuítas de uso corresponden o Pleno en aplicación do sinalado no artigo 123.1.p) da LBRL, non obstante a maioría cualificada citada atópase modificada en virtude do indicado no artigo 122.2 da mesma norma que advirte que os demais acordos do Pleno, é dicir, todos aqueles outros non previstos no precepto, adoptaranse por maioría simple de votos. número 4806 do epígrafe 1 do Inventario Municipal de bens e dereitos.

En virtude do exposto propónse o Pleno a adopción do seguinte..."

Deseguido o funcionario informante formula a proposta que se contén na parte dispositiva deste acordo.

A Comisión Informativa de Política Social, en sesión ordinaria de data 23.05.2018, ditamina favorablemente dita proposta.

#### DEBATE:

SR. RIVAS GONZÁLEZ: A cernacía existente e dentro das políticas asociativas deste goberno, o pasado día 8 de xaneiro fixo que o Alcalde de Vigo a Fundación Amancio Ortega e a Asociación Amencer-Aspace asinasen un convenio co obxectivo dunha cesión do uso gratuíto dunha parcela municipal de carácter patrimonial á Asociación Amencer-Aspace para a construción dun centro de ensinanza e atención integral para usuarios por parálises cerebral, coa finalidade de construír un centro de atención integral que cubra as necesidades educativas e de carácter rehabilitador social e familiar, de nenos de idade escolar afectados por parálises cerebral e afíns con grave dependencia todos eles de Vigo e a súa área metropolitana. A localización desta parcela de uso gratuíto será no Camiño do Areeiro, na parroquia de Bembrive, é unha parcela con 6.068 metros cadrados e con esta cesión leva consigo unha obrigas que con as seguintes; que a Fundación Amancio Ortega dona a cantidade necesaria para a construción de dito centro, Amencer-Aspace asumirá a xestión da actividade e o mantemento e conservación da instalación-edificación unha vez finalizadas as obras e a construción, como non, da parcela; e o Concello de Vigo asume a cesión gratuíta da parcela e ademais facilitará no posible os medios adecuados para achegar os servizos ás familias viguesas e da área metropolitana con nenos/as afectadas con parálises cerebral co motivo de xerar, como non, unha calidade e cercanía. Os nenos que acoden a este tipoloxía de centros fano porque non teñen posibilidade de estar integrados en centros ordinarios, e en case máis dun 87% dos casos teñen asociados problemas sanitarios importantes, crises epilépticas, riscos de aspiracións, problemas respiratorios severos, etc. así mesmo un 96% dos mesmos teñen que desprazarse en cadeira de rodas. Dende o goberno municipal intentamos contribuír á toma de conciencia da necesidade de integración social das persoas con diminucións físicas

e psíquicas, esta iniciativa se suma ás iniciativas deste Concello, deste goberno, coa creación dunha nova escola infantil tamén en colaboración coa Fundación Amancio Ortega na mesma parroquia e que vai dar cabida a 82 nenos/as de entre 0 e 3 anos, o custo de ambos proxectos superará os 5 millóns de euros, o período da cesión desta parcela será de 30 anos a favor de Amecer-Aspace sen prexuízo de que transcorrido o prazo se pacte unha nova cesión para os mesmos ou similares fins, e os beneficiarios serán unha poboación estimada de 145 afectados por parálises cerebral, con diferentes grados de afectación e o tramo de idade dende os 0 aos 21 anos. Se estima que aproximadamente 60 nenos acudirán de forma permanente diaria a este novo centro polo severo grado de afectación, e pola súa dificultade de acudir a centros ordinarios de educación e ata 85 acudirán de modo ambulatorio, nenos que precisan reforzo de rehabilitación pero a súa capacidade cognitiva lles permite estar escolarizados en centros ordinarios ou en algunhas aulas de integración, así que, por tódolos postos solicito o apoio de tódolos concelleiros a esta iniciativa.

SR. JÁCOME ENRÍQUEZ: Evidentemente imos votar a favor desta cesión á asociación Amecer-Aspace, non está demais en todo caso lamentar a falla de compromiso firme por parte da consellería de Benestar Social da que dependen este tipo de asociacións, que Amecer dependa de mecenas privados para a construción deste centro é unha cuestión que debería preocuparnos é moito, asociacións que prestan atención imprescindible á poboación especialmente vulnerable e que cumpren funcións que tería que cumprir o estado, tal e como expresan con toda claridade os sindicatos. Esta falla de compromiso ten como resultado un deterioro claro da atención e prexudica gravemente as condicións das traballadoras/es do sector, falamos dun sector onde a media do salario non chega nin sequera aos mil euros mensuais, estas condicións das traballadoras/es non se soluciona con mecenas privados senón con compromisos firmes por parte das administracións competentes, sendo evidentemente necesarias as instalacións, a calidade na atención a dan as persoas e sen calidade no emprego a calidade na atención a este sector de poboación especialmente vulnerable complícase moito.

SR. FIDALGO IGLESIAS: Nos parece unha boa noticia que por fin Amecer-Aspace

poida construír coa axuda da Fundación Amancio Ortega o seu centro na cidade de Vigo, queremos dicir que xa hai anos que dispoñía dunha parcela de 2.000 metros cadrados no centro da cidade en Bouzas, cedida pola presidenta do Porto a Sra. Corina Porro que foi a mellor alcaldesa da cidade e que foi a persoa que puxo de releve os servizos sociais en Vigo, ninguén como de entendeu unha cuestión básica e fundamental que é atender ás persoas que máis o necesitan.

SR. RIVAS GONZÁLEZ: En principio dicir que este é un gran proxecto e moi importante para dar servizo a un colectivo cunha necesidade de integración social e necesita todo tipo de apoio, apoio que ben é verdade que son competencias da Xunta de Galicia e nin se lles ve, nin se lles oie, nin se lle escoita, e agora acabamos de escoitar ao Partido Popular falando da mellor alcaldesa e dunha concesión, unha concesión que foi dada con todo o que realmente as normas que permite o Porto non con outras distintas, e polo tanto hai que dicir que pasaron 11 anos, que fixo o Partido Popular? Que fixo a Sra. Corina Porro que non o levou adiante? Adiante vai coas políticas e co que realmente quere levar adiante este Alcalde, o Sr. Abel Caballero, o mellor Alcalde desta cidade, Sr. Figaldo, o mellor Alcalde desta cidade, co mellor resultado da historia desta cidade, co maior apoio social desta cidade por moito que lle pese, Sr. Fidalgo, incluso con todos aqueles que realmente poden ter ideoloxías similares as súas Sr. Fidalgo, quere dicir que vostedes non están, non se lles ve, nin se lles escoita, Sr. Fidalgo non se poña nervioso, véxoo moi nervioso, será a moción de censura do próximo venres a que lle pon preocupado? Será iso? Ou será a Gürtel? Non Sr. Fidalgo, aquí o mellor Alcalde desta cidade é o Sr. Abel Caballero cos votos, o mellor político social co 52% de votos desta cidade, algo inédito nesta cidade por moito que lle pese Sr. Fidalgo, por moito que lle pese. A verdade é que me preocupa, Sr. Fidalgo que para vostede entra a facer política de algo tan importante como é falar dos colectivos sociais e que necesitan integración, a política do Sr. Feijóo, que non a fai e que dalgunha forma dende este goberno co Sr. Caballero á cabeza é o capaz de facelo e levalo a cabo, coa mellor política social, Sr. Fidalgo, dende cheques social, albergues, bolsas de comedor, de inglés, todo tipo de política social que se pode levar adiante, aquí non queda ninguén tirado, pagando os desafuizamentos, pagando a enerxía á xente que realmente non pode, Sr. Fidalgo, non nos dea

leccións de nada, simplemente súmense e asuman as competencias que lle correspondan, eu creo que vostede é senador e polo tanto ademais parece que presume de ser amigo do Sr. Feijóo, trasládelle o que realmente lle corresponde, cales son as súas competencias e que nesta cidade as aplique o Sr. Feijóo e como hoxe falo dun gran proxecto para esta cidade, para un gran colectivo como é Amencer-Aspace, simplemente dicirlles que este gran proxecto que se leva adiante, que se leva dentro da etapa do noso Alcalde, o Sr. Abel Caballero con este goberno, o goberno máis apoiado na historia desta cidade, pois gustaríame que se sumaran a esta iniciativa e poder satisfacer as necesidades de 145 nenos que vano agradecer.

**VOTACIÓN:** Por unanimidade dos vinte e catro membros presentes da Corporación, dos vinte e sete que a constitúen de dereito e feito, adóptase o seguinte,

**ACORDO:**

**PRIMEIRO.** Ceder á Asociación de atención á parálise cerebral e afíns “AMANCER-ASPACE”, declarada de interese público en virtude de Orde do Ministerio de Interior de 22.04.1997, o uso gratuíto da parcela de titularidade municipal de natureza patrimonial (número 4806 do epígrafe 1 do Inventario Municipal de Bens e Dereitos) localizada no camiño de Ariero, Bembrive, dunha superficie de 6.068,00 m<sup>2</sup>, Referencia Catastral 54057A10200700000BS, Tomo: 2896. Libro: 1662. Folio: 143. Finca: 83830 do Rexistro da Propiedade nº 2 de Vigo, ao obxecto de que, co financiamento da Fundación Amancio Ortega (FAO), proceda á construción dun Centro de Ensinanza e atención integral para usuarios afectados por parálises cerebral en grado severo e no tramo de idade dende os 0 aos 21 anos e dirixido a unha poboación estimada de 145 persoas.

**SEGUNDO.** A cesión de uso gratuíta se establece por un prazo de trinta (30) anos e realízase co exclusivo fin indicado; en todo caso, se a parcela non fora destinada ao uso previsto dentro do prazo sinalado na Cláusula Sexta do Convenio suscrito coa cesionaria en data de 8.01.2018, ou deixara de selo nos trinta anos seguintes á data do presente acordo, considerarase resolta a cesión revertendo, previo



expediente contradictorio, a posesión da parcela o Concello de Vigo con todas as súas pertenzas e accesións.

TERCEIRO. Concluído o prazo de cesión a edificación integrarase no patrimonio do Concello; non obstante, doce meses antes da conclusión do prazo de cesión, "AMENCER-ASPACE" instará do Concello de Vigo o pacto dunha nova cesión para os mesmos ou similares fins e por un novo prazo dun máximo de trinta anos, ou, no seu caso, cesión gratuíta da propiedade da parcela. O novo acordo de cesión, calquera que sexa a súa natureza, requirirá acordo expreso do Concello de Vigo adoptado por órgano competente. No caso de que a nova cesión gratuíta tamén o fora de uso, unha vez concluído o novo prazo poderase acordar un novo e terceiro prazo, e así sucesivamente.

CUARTO. Proceder a inscrición da presente cesión no Inventario de Bens e Dereitos do Concello de Vigo.

QUINTO: Someter o presente acordo a información pública por un prazo de quince días mediante anuncio no BOP e na sede electrónica do Concello nos cales poderanse examinar o Expediente e presentar reclamacións, suxestións ou alegacións que se consideren oportunas; o acordo entenderase adoptado de xeito definitivo se durante o citado prazo non se presentaran reclamacións, suxestións ou alegacións.

SEXTO. Notificar o presente acordo, unha vez definitivo, o cesionario que procederá á práctica do correspondente asento o seu favor no Rexistro da Propiedade, non surtidor efecto a cesión en tanto non se cumprimente este requisito, para o cal el cesionario comunicará o Servizo de Patrimonio do Concello de Vigo a práctica do mesmo. Na inscrición farase constar o fin a que debe dedicarse a parcela e as condicións y cargas que leve apareada a cesión, así como a advertencia de que o incumprimento das mesmas dará lugar a súa resolución.

#### **4(78).- APROBACIÓN DEFINITIVA DO REGULAMENTO DO REXISTRO DE**

**SOARES DO CONCELLO DE VIGO. DESESTIMACIÓN DE RECLAMACIÓNS PRESENTADAS Á APROBACIÓN INICIAL. EXPTE. 185/408. REXISTRO PLENO 1710/1101.**

ANTECEDENTES.- Con data 9 de maio de 2018, o secretario xeral do Pleno co conforme da concelleira delegada de Urbanismo, emite o seguinte informe proposta,

“Lexislación aplicable.

CE. Constitución Española 1978.

LBRL. Lei 7/1985, de 2 de abril Reguladora das Bases de Réxime Local.

LPAC. Lei 39/2015, de 1 de outubro, do Procedemento administrativo Común.

LSG. Lei 2/2016, de 10 de febreiro, do Solo de Galicia.

R.D. 128/2018. Real Decreto 128/2018, de 16 de marzo, polo que se regula o réxime xurídico dos funcionarios de Administración Local con habilitación de carácter nacional.

Antecedentes. O Concello Pleno, en sesión de 28.02.2018, acordou a aprobación inicial da Ordenanza Reguladora do Rexistro de Soares e terreos sen edificar instrumentando a súa información pública por un período de 30 días mediante anuncios insertados no BOP do 15 de marzo e na sede electrónica municipal ao obxecto da presentación de reclamacións e suxestións. Segundo certificación emitida polo responsable do Rexistro Xeral no período de información pública se ten presentado unha única reclamación polo que procede o estudo da mesma; en cumprimento do sinalado no artigo 3.3.d).1º do R.D. 128/2018, emítase o seguinte,

**INFORME**

I. Considera a reclamación que a Ordenanza, (i) é un atentado á propiedade privada e aos dereitos lexítimos do cidadás recollidos na Constitución; (ii) que a publicidade da norma ten sido insuficiente; (iii) que é xeralista e que a súa finalidade debe ser a de evitar situacións puntuais de ruína; (iv) que, en base ao anterior, procede a súa revisión, a súa suspensión ou a súa anulación.

II. A Constitución recoñece no artigo 33 o dereito de propiedade privada de xeito limitado toda vez que a función social que debe cumprir delimitase de acordo coas leis. Son as leis urbanísticas as que, desde sempre, teñen establecido o deber de edificar e deber de conservación das edificacións.

III. Conforme o artigo 49.b) da LBRL, tras a aprobación inicial as Ordenanzas locais someteranse a información pública e audiencia dos interesados por un prazo mínimo de trinta días para a presentación de reclamacións e suxestións.

Como se ten exposto a “información pública” instrumentouse mediante anuncios no BOP de Pontevedra, artigo 83.2 LPAC, e na sede electrónica municipal [www.vigo.org](http://www.vigo.org), artigo 13.d) LPAC. O anuncio no BOP sinalaba a oficina municipal onde se atopaba o Expediente e o horario de consulta, desde o anuncio en [www.vigo.org](http://www.vigo.org) facilitouse o acceso completo ao Expediente, é dicir, á totalidade dos trámites realizados e dos informes emitidos.

No que se refire ao trámite de “audiencia dos interesados”, no Expediente non consta que se teña persoado ninguén na defensa de intereses lexítimos, individuais ou colectivos, afectados pola Ordenanza que implique a necesidade dunha notificación individualizada do acordo de aprobación inicial; por outra banda, suprimidas as Cámaras da Propiedade, tampouco constan asociacións e organizacións representativas de intereses económicos e sociais titulares de intereses lexítimos colectivos afectados pola Ordenanza que requiran da mesma notificación individualizada.

A publicidade do acordo da aprobación inicial foi o conforme a Dereito.

IV. A finalidade da Ordenanza do Rexistro Municipal de soares non é nin pode ser, como advirte a reclamación, “evitar situacións de ruína”. O deber de conservación das construcións, é dicir, as actuacións de mantemento das edificacións para evitar a súa ruína, corresponden aos propietarios, artigo 135.2 LSG, non á Administración municipal.

A Administración municipal debe velar polo cumprimento de tal obriga mediante ordes de execución, e, no seu caso, medidas de execución forzosa sen prexuízo de declarar a ruína da edificación, unha declaración que suporá a inscrición da edificación no Rexistro de Soares para a súa posterior venda e poxa pública que tamén pode ser considerada como unha medida coercitiva do lexislador para “evitar situacións de ruína”.

A finalidade da Ordenanza do Rexistro de soares é a inscrición no mesmo de soares que incumpren o deber edificar e de edificacións que incumpren o deber de conservación. O artigo 137.1 da LSG sinala que os municipios con poboación superior a 50.000 habitantes crearán un Rexistro de Soares, no cal se incluírán os soares unha vez constatado que as medidas de execución forzosa ditadas para o cumprimento de deber de edificar resultan ineficaces.

V. De conformidade co exposto, previo Ditame do Consello da Xerencia na súa condición de Comisión Informativa, proponse ao Pleno do Concello (maioría simple) a adopción do seguinte...”

Deseguido o funcionario informante formula a proposta que se contén na parte dispositiva deste acordo.

O Consello da Xerencia Municipal de Urbanismo, de data 16.05.2018, ditamina favorablemente dita proposta.

#### DEBATE:

SRA. CARIDE ESTÉVEZ: Estamos hoxe de novo aquí co tema da ordenanza de Soares que como saben se lle presentou unha alegación e foi o que derivou que tiña que vir de novo a este Pleno para a súa aprobación definitiva, no Consello da Xerencia de Urbanismo tivo o respaldo de tódolos grupos entendendo que é un instrumento eficaz para conseguir o que todos desexamos, que os soares que hai na cidade podan ser construídos no prazo axeitado, que as ruínas que existen na cidade poidan ser transformadas en edificacións e polo tanto para poder permitir a actividade residencial ou a actividade económica na cidade e que polo tanto que poidan satisfacer esa utilidade pública que necesariamente necesitamos que teñan, polo tanto, dado que existen algunhas construcións inacabadas ou inadecuadas, algunhas ruínas, algúns soares abandonados na nosa cidade, establecemos este mecanismo como un mecanismo axeitado para darlle saída e polo tanto para que máis alá do deber privado que teñen os propietarios de edificar cando non o fan, podamos colocalos no mercado, polo tanto, a quen está dirixida, a que tipo de instalación ou soares está dirixida este Rexistro municipal de soares? A soares sen edificar, edificacións en ruínas, derruídas, inadecuadas, ou construcións abandonadas. A inscrición no Rexistro de soares supón a necesidade de que o Concello habilite un mecanismo para a poxa destes inmobles unha fixado o prezo de saída, de tal xeito que se establece un prazo máximo dun ano para que se poidan poxar, iso si, co deber inexorable de fixar un prazo para a construción dos mesmos, de tal xeito que se no prazo dese ano esa poxa non se materializara deben decaer do rexistro de soares e do mesmo xeito se queda deserta esa poxa, pode habilitarse no período seguinte de seis meses, unha nova poxa, cunha rebaixa do prezo do 25%, de tal xeito que ademais no caso de que quede deserta ese segundo proceso tamén, o Concello poderá inscribila no Inventario do Patrimonio Municipal do Solo para darlle saída por ese mesmo prezo de saída.

Polo tanto, entendemos que é un instrumento eficaz, un instrumento que xunto coas axudas a rehabilitación, contribúen a mellorar especialmente os centros urbanos da nosa cidade e polo tanto a idea que temos é concentrar o noso esforzo porque este Rexistro unha vez aprobado por este Pleno, que entendemos que así vai a ser, logo da súa publicación no Boletín Oficial da Provincia en 15 días estará activo e o que temos é a idea de concentrar fundamentalmente a acción deste Rexistro en primeiro lugar no Casco Vello, en Bouzas, no ensanche e en aqueles casos onde ou ben por prexuízos ás vías pública ou ben por prexuízos aos colindantes, teñamos unha situación que é necesario resolver, polo tanto, en primeiro lugar, imos a incorporar ás ruínas que xa están establecidas no Casco Vello, no ensanche en Bouzas, en particular un total de 42 soares, que se incorporarán inicialmente a ese Rexistro, ademais de todos aqueles que son soares vacantes ou como dicíamos construcións inadecuadas ou inacabadas non só nestas tres zonas da cidade senón en tódolos aqueles espazos onde o necesitemos. Entendemos que esta ordenanza de soares é un mecanismo axeitado como dicía para cumprir a función pública que eses soares teñen e ademais para intentar evitar a especulación sobre os mesmos, de tal xeito que todo aquilo que sexa susceptible de construír nos prazos legalmente establecidos, nos prazos fixados polo Planeamento ou nos prazos máximos fixados pola lei que son de tres anos, todo aquilo que non se fixera, é necesario que se coloque a disposición da actividade económica da cidade e con este mecanismo entendemos que así o estamos a promover, e polo tanto, pido o apoio de novo para esta iniciativa.

SR. PÉREZ CORREA: Obviamente nós imos a votar afirmativamente porque entre outras cousas tamén foi a primeira aprobación o que foi ao anterior Pleno o que falamos tamén nas Comisións pois estamos de acordo, tamén que non se estimara esa alegación, que entre outras cousas un particular o que viña a poñer enriba da mesa é que hai un dereito constitucional á propiedade privada, e nós dicimos que fronte a ese dereito á propiedade privada, ten que prevalecer o interese público e tamén o dereito á vivenda que tamén ás veces cremos que debería estar por enriba da propiedade privada e cando existen este tipo de activos, son activos sociais, para nós non activos inmobiliarios, son activos sociais porque poden formar parte da acción de vivenda das administracións públicas e polo tanto está

ben, nós presentáramos tamén unha serie de emendas a esta proposta de modificación da ordenanza reguladora, unha serie de emendas porque nós notamos que en Vigo si que falla un mecanismo que no momento que hai o rexistro, no momento que é posible que formen parte do Patrimonio Público, obviamente primeiro a incoación da responsabilidade dos propietarios para que leven adiante esa obriga de urbanizar, pero nós tamén pensamos que é unha empresa municipal de vivenda que fora capaz de facerse con ese activo e que con ese activo levara adiante unha política de promoción pública 100% de vivenda, tamén sería interesante, vou poñer un exemplo que é o Concello de Córdoba, que a través da empresa municipal de vivenda e través do Rexistro de Soares, o que está a facer é quedarse cos soares e as edificacións ruinosas que non se levan adiante, a través da empresa municipal de vivenda e incluso cos fondos EDUSI que nós empregamos para cousas bastante surrealistas, utilizan os fondos europeos para crear unha iniciativa de cooperativas habitacionais, que sexan os propios veciños os que poidan levar adiante con axuda e desenvolvemento de fondos europeos, e ter un parque público de vivenda que por desgracia e tamén pola xestión nefasta de urbanismo dos últimos 20 anos nesta cidade, non temos practicamente vivenda pública porque cando tiñamos quedarnos co 10% do aproveitamento lucrativo de grandes promocións decidimos venderlles aos promotores ou liquidar ese 10% do aproveitamento lucrativo en moitos convenios urbanísticos. Estamos de acordo e estamos de acordo que isto forme parte dunha iniciativa pública, estamos de acordo ademais que sexan nos cascos históricos, o Casco Vello Alto aquí ao carón do Concello é un exemplo de soares abandonados dende hai moitos anos, incluso algúns que non se sabe quen son os propietarios, creo que é bo que se leve, pero tamén nos gustaría avanzar, a nós nos gustaría que estiveran gran parte desa cantidade edificios de propiedade das entidades bancarias, imos poñer un exemplo, na rúa Aragón onde falecida a promotora VialMar, hai un bloque completo de edificios a rematar dende hai moitos anos que nos gustaría tamén que dalgunha maneira puideran formar parte do patrimonio municipal para crear un sistema de vivenda social que hoxe en día non temos, e digo vivenda social de emerxencia non vivenda de promoción pública. Estamos de acordo con que este Rexistro tamén vaia avanzando nos xeitos urxentes de expropiación, e que todo sirva tamén para poñer en valor que fronte ao dereito da

propiedade privada está o dereito a que nas nosas cidades non existan están bolsas de abandono e polo tanto, é unha boa nova para a cidade, para o urbanismo e seguramente tamén para contrarrestar coa acción pública determinados incrementos de vivenda ou alugueres que imos a vivir nos próximos anos.

SR. FIDALGO IGLESIAS: Pois, estou de acordo en moito coa intervención do Sr. Pérez Correa porque ese é o urbanismo de Vigo, o abandono do barrio de Teis, o abandono de Guixar, do Barrio do Cura, da Panificadora, de Jacinto Benavente, de Toural, de Espiñeiro, iso é como está a cidade de abandonada, totalmente abandonada e como lle dicíamos no Pleno do mes de febreiro, na aprobación inicial sobre este Rexistro en primeiro lugar dicir que o regulamento é obrigatorio, este Rexistro é obrigatorio porque o esixe a Lei de solo de Galicia e tamén o Regulamento, en segundo lugar, este rexistro Sra. Caride xa existía, en Vigo creouse hai 10 anos e agora nolo queren vender como novo algo que xa existía, vostedes non fixeron nada no o van facer porque teñen a cidade totalmente abandonada e aquí se ve unha proba máis os representantes do barrio de Teis que parece que Vigo que se acaba en García Barbón e remata en Bouzas, porque nin para un lado nin para o outro e na Avenida de Madrid aí e onde se acaba Vigo para vostedes, no centro e nas ramplas da Gran Vía e esnaquizar un bulevar gastándose 9 millóns de euros, ese é o urbanismo do Partido Socialista e do Sr. Abel Caballero, quedamos sen Plan Xeral hai dous anos e medio e dixo o Alcalde que íamos a ter un Plan Xeral para 100 anos, que ía estar a cidade chea de grúas e ao final a realidade non foi esa, a realidade é que tivemos un Plan só para sete anos e as grúas as puxo a Xunta de Galicia construindo o hospital, a Cidade da Xustiza e a depuradora, por exemplo. Logo dixo cando se caeu o Plan que íamos ter un Plan en tempo récord, en tempo récord será de Egipto ao mellor ou nin sequera récord de Egipto porque eu creo que as pirámides de Egipto tardaron menos tempo en construílas que Vigo ter un Plan Xeral, e iso é a crúa realidade, este Rexistro Sra. Caride nunca funcionou, ten 10 anos e non funcionou, oxalá nos equivoquemos e que agora funcione, pero cremos sinceramente porque xa os coñecemos, xa son 11 anos aquí e xa tódalas películas de vaqueiros xa as vimos moitas veces, xa intentaron enganar mil veces aos do barrio de Teis e á xente ao

final non se lle engana porque por moito que manipulen, que intenten mentir, enganar ao final a xente vive o día a día e ve que non reciben servizos polos impostos máis caros de Galicia, pagan o IBI máis caro de Galicia pero non hai un acceso digno para as vivendas e o barrio da Igrexa está por exemplo abandonado. Sabe cantos soares se inscribiron nesta ordenanza que xa existía e que leva 10 anos funcionando, eses soares abandonados? Parece que non atoparon ningún soar abandonado en Vigo porque non inscribiron ningún soar, cero soares inscritos no que levan vostedes de mandado, en 11 anos, cero soares, e iso é o que terían que explicarlles aos cidadáns de Vigo, que queren redactar outra ordenanza, que queren poñerlle outro envoltorio como o estadio de Balaídos, unha obra nefasta na que nos gastamos 15 millóns de euros e non hai nin aparcadoiro nin ascensores e aínda non está rematada esa obra, pois sigan por esa liña.

Nós ímoslle a apoiar, imos votar a favor desta ordenanza, deste Rexistro, cremos que é interesante, fixémoslo na Xerencia de Urbanismo, o fixemos tamén o Pleno do Concello, non fixemos nin sequera alegacións pero o dito, o seu urbanismo é a súa folla de servizo e ese é o urbanismo, o Barrio do Cura, o barrio de Teis, a Panificadora, a rúa Jacinto Benavente, os terreos da fábrica de Álvarez, ese é o modelo de urbanismo que vostedes están a vender, dous anos e medio sen Plan Xeral e non foron capaces nin sequera de sacar a concurso o proxecto de redacción do novo Plan, a vostedes o urbanismo xa sabemos que só lles interesa para subirse á Alcaldía, para falar e falar e dicir que o 40% de vivenda protexida, agora se queren poñer e bloquear 1.600 vivendas protexidas en Navia, claro, non todo o mundo se pode ir a vivir a un chalet en Toralla, non todo o mundo pode facelo, por iso a xente que ten acceso a esa vivenda protexida vai ter que esperar porque o Partido Socialista vaille seguir bloqueando a construción desas vivendas, lamentable Sra. Caride.

SRA. CARIDE ESTÉVEZ: Imos poñer un pouco de normalidade porque logo da última intervención eu xa non sei do que estábamos a falar. A Marea de Vigo, eu non sei o que pretendía que fixéramos cos recursos dos EDUSI pero a min non me parecen surrealista mellorar a accesibilidade na cidade, mellorar as contornas na cidade, a min dende logo non me parece nin á maior parte dos cidadáns de Vigo surrealista. Sr. Fidalgo eu si que non entendo nada do que vostede di, cal é o seu urbanismo



para Teis? Facer adosados na parcela da Etea, esa era o urbanismo para vostede? Que é o urbanismo do Partido Popular para a Panificadora, facer tres torres de quince pisos na Panificadora, eu o escoitei calada. Mire vostede, o seu urbanismo era ese, na Panificadora tres torres de quince edificios, o seu urbanismo era en Teis bloques de apartamentos e adosados para o goce duns cantos, non de tódolos cidadáns de Vigo, ese é o urbanismo do Partido Popular.

PRESIDENCIA: Sr. Fidalgo, é a 2ª vez que lle advirto, cando vostede falou todo o mundo gardou silencio, lle escoitamos todos respectuosamente, faga o favor de gardar silencio.

SRA. CARIDE ESTÉVEZ: Mire, non habería ningún problema co Plan Xeral de Vigo se a vía Parejo fora utilizada pola Xunta de Galicia, por certo, o Ministerio de Fomento está intentando recuperala agora para facer unha lei que habilite un mecanismo para tentar solucionar os problemas que hoxe ten por exemplo o Concello de Vigo e moitos outros teñen de nulidade do seu Plan Xeral, polo tanto, claro que este Concello ía ben encamiñado pero que o que é surrealista é que nesta intervención falen vostedes tamén de Balaídos, nós xa sabemos que o modelo do Partido Popular é que o estadio de Balaídos marche para Mos e que o Celta xogue en Mos, pero dende logo este Concello defende que o Celta siga xogando en Vigo e no estadio de Balaídos, un investimento público de todos e que si existe un estadio en Vigo non hai ningunha xustificación que a se faga outro estadio no municipio limítrofe para xogar o Celta de Vigo, e mire, non é necesario facer todos estes escándalos que vostedes pretenden facer, claro que a cidade deportiva do Celta se podería facer en Vigo, como xa o dixemos, o que non se podería facer en Vigo era un centro comercial de 120.000 metros cadrados en chan rústico de especial protección forestal, por certo, o informe da Xunta de Galicia dille o mesmo ao Concello de Mos, que para a cidade deportiva non ten ningún tipo de problema pero para o centro comercial si, que non pode ubicalo e que non pode conectalo coa A-55, que ten que preguntar aos limítrofes e ao comercio de Vigo o di a propia Xunta de Galicia no seu informe, polo tanto, esperamos que este sexa un instrumento eficaz, moi eficaz porque Vigo o necesita e esperamos o seu apoio.

VOTACIÓN: Por unanimidade dos vinte e catro membros presentes da Corporación, dos vinte e sete que a constitúen de dereito e feito, adóptase o seguinte,

ACORDO:

PRIMEIRO. Desestimar a reclamación presentada por D. J.A.F.

SEGUNDO. Aprobar definitivamente a Ordenanza Reguladora do Rexistro Municipal de Soares segundo o texto que consta no Anexo a este acordo.

TERCEIRO. Publicar a Ordenanza aprobada no BOP a efectos da súa entrada en vigor.

CUARTO. Notificar o presente acordo ás Administracións estatal e autonómica.

## ANEXO

### ORDENANZA DO REXISTRO MUNICIPAL DE SOARES

#### EXPOSICIÓN DE MOTIVOS

A Constitución recoñece no artigo 33 o dereito de propiedade privada de xeito limitado toda vez que a función social que debe cumprir delimítase de acordo coas leis; no artigo 47 advirte que os poderes públicos establecerán as normas pertinentes para facer efectivo o dereito a gozar dunha vivenda digna e axeitada regulando a utilización do solo conforme o interese xeral para impedir a especulación.

O Real Decreto Legislativo 7/2015, de 30 de outubro, polo que se aproba o Texto Refundido da Lei do Solo e Rehabilitación urbana, contén diversas medidas destinadas a garantir o cumprimento da función social da propiedade inmobiliaria e evitar a existencia de prácticas de retención e xestión especulativas dos solos que obstrúen o cumprimento da súa función; neste sentido o artigo 9.6 sinala, “En todo solo en situación de urbanizado no que así se prevexa pola ordenación urbanística e nas condicións por ela establecidas, o propietario terá o deber de edificar nos prazos establecidos na normativa aplicable”.

Este deber de edificar, tradicional na nosa lexislación urbanística, tamén se recolle na Lei 2/2016, de 10 de febreiro, do Solo de Galicia, así artigo 135.1. a), referido aos deberes de uso do solo, sinala que os propietarios de toda clase de terreos haberán de emprender a edificación nos términos e prazos establecidos na lexislación vixente; un prazo que a mesma norma o establece en tres anos no solo urbano consolidado no suposto de que non veña sinalado nas determinacións do Plan Xeral de Ordenación Municipal.

O artigo 136.1. a) da Lei galega indica que os concellos ditarán ordes de execución que obriguen aos propietarios a realizar as actuacións necesarias para dar debido cumprimento ao deber de edificar e que en caso de incumprimento da orde a administración municipal procederá á execución forzosa da mesma mediante a imposición de multas coercitivas; o artigo 137.1 sinala que os municipios con poboación superior a 50.000 habitantes crearán un Rexistro de Soares, no cal se incluírán os soares unha vez constatado que as medidas de execución forzosa ditadas para o cumprimento de deber de edificar resultan ineficaces, unha inclusión que, en todo caso, leva consigo a venda forzosa mediante poxa pública do inmovible incluído co tipo de valoración que resulte da súa valoración e a obriga do adquirente de a iniciar ou reanudar as obras de edificación no prazo dun ano a partir da data de toma de posesión da finca, artigos 138 e 139.

O Rexistro municipal de Soares do Concello de Vigo foi creado mediante Ordenanza aprobada polo Pleno do Concello de Vigo en sesión do 27.10.2008 e publicada no BOP nº 239 do 10.12.2008, o funcionamento do Rexistro nela previsto atópase adecuado ao que sinalaba a derogada Lei 9/2002 de 30 xuño, de ordenación urbanística e protección do medio rural de Galicia, razón suficiente para entender que procede a elaboración dunha nova Ordenanza -continuista do Rexistro existente- que procura unha ordenación dos trámites procedementais e secuencias sinalados na actual normativa.

## CAPÍTULO PRIMEIRO. DISPOSICIÓNS XERAIS

### Artigo 1. Obxecto.

A presente Ordenanza regula o contido, organización e funcionamento do Rexistro Municipal de Soares do Concello de Vigo que inclúe as edificacións declaradas en ruína, as derruídas ou inadecuadas e as construcións abandonadas.

### Artigo 2. Natureza xurídica do Rexistro Municipal de Soares.

1. O Rexistro Municipal de Soares ten natureza xurídico administrativa e a consideración de rexistro público para consulta e disposición de calquera cidadá sen que sexa necesario acreditar a condición de interesado.

2. As certificacións que se expidan dos seus datos teñen o carácter de documento público con valor probatorio a efectos administrativos; serán transcripción íntegra e literal dos asentos correspondentes a cada soar ou edificación, acreditando, no seu caso, a inexistencia de asento.

## CAPÍTULO SEGUNDO. DEBER DE EMPRENDER A EDIFICACIÓN

### Artigo 3. Deber de emprender a edificación.

1. Os propietarios de soares, de edificacións declaradas en ruína, derruídas ou inadecuadas e de construcións abandonadas iniciarán as obras de edificación nas condicións e prazo fixados no planeamento, ou, no seu defecto, pola lexislación urbanística. O deber de edificar inclúe o deber de rematar as edificacións para cuxa execución se obtivo licenza.

2. O cumprimento do deber de edificar corresponde ao propietario. A transmisión das fincas non modificará a situación do seu titular respecto ós deberes establecidos pola lexislación urbanística ou dos esixidos polos actos de execución derivados da mesma. O novo titular queda subrogado nos dereitos e deberes urbanísticos do anterior propietario e nos compromisos que este tivera adquirido coa Administración urbanística.

Artigo 4. Supostos inscribibles no Rexistro Municipal de Soares.

Son susceptibles de inclusión no Rexistro Municipal de Soares os soares e edificacións e construcións que se atopen nalgún dos seguintes supostos:

a) Soares sen edificar. Aqueles que carezan de edificacións permanentes ou a parte dos mesmos non utilizada e susceptible de aproveitamento. Teñen a condición de soar as superficies de solo urbano legalmente divididas e aptas para a edificación, que contén con acceso por vía pública pavimentada e servizos urbanos de abastecemento de auga potable, evacuación de augas residuais á rede de saneamento, subministro de enerxía eléctrica e alumeadado público en condicións adecuadas para o uso permitido. De existir planeamento, ademais, deberán estar debidamente urbanizadas.

b) Edificacións en ruína. As declaradas en situación de ruína mediante resolución administrativa firme.

c) Edificacións derruídas. Aquelas nas que haxa desaparecido como mínimo o cincuenta por cento do volume aproveitable. Teñen este carácter as edificacións nas que mais dun cincuenta por cento da súa capacidade como vivenda son declaradas «inhabitables» por resolución firme.

d) Edificacións inadecuadas. A inadecuación vincúlase á incompatibilidade da edificación co planeamento en canto uso, aliñación, volume, altura e demais requisitos previstos do planeamento cando obstaculicen proxectos municipais, sempre que se trate de edificacións que,

1) Teñan consumida unha edificabilidade inferior ó 50% da permitida pola ordenanza correspondente

2) Cando máis do 50% do seu volume ou superficie construída estea destinada a un uso contrario o previsto no planeamento.

3) Edificacións cuxa altura se encontra en manifesta desproporción coa legalmente autorizada na zona desmerecendo pola súa condición, clase ou estado ás demais existentes no ámbito.

4) Edificacións provisionais que se estimen inadecuadas.

d) Construcións abandonadas. O deber de edificar inclúe o deber dos propietarios terminar as edificacións para cuxa execución obtiveron a preceptiva licenza; son construcións abandonadas aquelas iniciadas e abandonadas ou suspendidas que, sen causa xustificada, teñen incumplido o prazo da súa terminación previa declaración de caducidade da licenza.

Artigo 5. Prazos para emprender a edificación e cómputo.

1. Os propietarios de soares e de edificacións declaradas en ruína, derruídas ou inadecuadas e de construcións abandonadas emprenderán as obras de edificación no prazo fixado polo planeamento xeral ou de desenvolvemento, en función da clasificación ou cualificación do solo e das circunstancias específicas que concorran en determinadas áreas ou soares e, no seu defecto, no prazo de tres anos.

2. O prazo para cumprir co deber de edificar en solo urbano consolidado computarase dende a aprobación definitiva do planeamento urbanístico que conteña a ordenación detallada. No caso de que os terreos non reúnan a condición de soar, o deber de edificar inclúe a obriga de completar a urbanización necesaria para a súa conversión en soar.

En solo urbano non consolidado e urbanizable, o prazo computarase dende a conversión dos terreos en soares.

O deber de edificar afecta igualmente aos propietarios de edificacións declaradas en ruína, derruídas, inadecuadas e de construcións abandonadas; o prazo computarase dende a recepción da correspondente declaración administrativa ou, no seu caso, da resolución pola que se ordena a finalización das obras.

3. No caso de declaración de caducidade dunha licenza polo incumplimento dos prazos para o inicio, execución e finalización da obra autorizada por causa imputable ó interesado, o tempo transcorrido dende a concesión da licenza ata a declaración de caducidade, terase en conta ós efectos do cómputo do prazo establecido para cumprir co deber de edificar. Producirá o mesmo efecto a declaración de desestimento e arquivo do procedemento por causa imputable ó interesado.

Artigo 6. Supostos que excepcionan a obriga de emprender a edificación no prazo establecido.

1. Cando o Concello de Vigo adquira ou posúa soares para fins de interese público poderá acordar prazos mais amplos dos establecidos para emprender a edificación. Para a mesma finalidade poderanse autorizar prazos superiores de edificación a solicitude doutras Administracións ou entidades sen ánimo de lucro, previa a avaliación do fin alegado.

2. Por razóns de interese público, a Xerencia Municipal poderá:

a) Ampliar o prazo para cumprir co deber de edificar ata un máximo dun ano cando os interesados acrediten impedimentos tecnicamente xustificadas que serán valorados polo órgano concedente.

b) Reducir o prazo para o cumprir co deber de edificar nos casos de ruína inminente ou risco de grave e rápido deterioro da edificación previa xustificación incorporada o expediente contradictorio que se tramite.

Artigo 7. Incumprimento do deber de emprender a edificación. Orde de execución e execución forzosa da orde.

1. Acreditado o incumprimento do deber urbanístico de emprender a edificación mediante resolución ditada ao efecto, a Vicepresidencia da Xerencia Municipal de Urbanismo, previo expediente e audiencia do interesado, ditará a orde de execución obrigando ao propietario do inmovible a levar a cabo as actuacións necesarias para dar cumprimento o deber de edificación, entre elas a presentación da documentación para a solicitude de licenza urbanística.

2. A resolución de inicio advertirá das consecuencias xurídicas do incumprimento da Orde que, no seu caso, se dite, en particular do inicio de procedemento para a inclusión do inmovible no Rexistro Municipal de Soares.

3. As ordes de execución contendrán a determinación concreta das actuacións a realizar conforme as condicións sinaladas na lexislación e no planeamento urbanístico e fixará prazo para o cumprimento voluntario do ordenado; o prazo determinarase en razón á importancia e complexidade da actuación.

4. No caso de incumprimento da orde de execución a Administración municipal procederá a súa execución forzosa mediante a imposición de multas coercitivas de 1.000 a 10.000 euros reiterables trimestralmente.

## CAPÍTULO TERCEIRO. PROCEDEMENTO DE INSCRICIÓN NO REXISTRO MUNICIPAL DE SOARES

Artigo 8. Procedemento para a inclusión no Rexistro Municipal de Soares.

1. Constatado que as medidas de execución forzosa sinaladas no artigo anterior resultan ineficaces para o cumprimento do deber de emprender a edificación iníciárase procedemento para a inclusión do inmovible no Rexistro Municipal de Soares; a ineficacia acreditarase tras a imposición de dúas multas coercitivas.

2. O procedemento de inclusión axustarase o previsto na Lei 39/2015, de Procedemento Administrativo Común das Administracións Públicas.

Será condición para incoar o procedemento a concorrencia dalgunhas das seguintes circunstancias:

a) A declaración de incumprimento do deber urbanístico de edificar os soares no prazo establecido ao efecto e a ineficacia das ordes de execución ditas.

b) A declaración administrativa da situación de ruína dunha edificación e a ineficacia das ordes de execución ditas.

c) A declaración administrativa dunha edificación derruída ou inadecuada e dunha

construción abandonada e a ineficacia das ordes de execución ditadas.

3. A determinación e comprobación dos datos para ditar resolución referiranse á correspondencia do inmovible con aquel no que se declarou o incumprimento do deber urbanístico de edificación e a ineficacia das ordes de execución ditadas.

4. O trámite de audiencia realizarase respecto dos propietarios, titulares de dereitos reais, arrendatarios, ocupantes ou titulares de calquera dereito que conste no Rexistro da Propiedade ou sexa comunicado polos interesados. Transcorrido o prazo de audiencia, previa resolución das alegacións e practicadas as probas admitidas a Vicepresidencia da Xerencia Municipal, logo de informe dos servizos xurídicos, resolverá a inclusión do inmovible no Rexistro Municipal de Soares ou, no seu caso, pronunciarase sobre a improcedencia da inclusión.

5. A resolución ditarase no prazo de tres meses dende a súa iniciación.

6. A resolución notificarase ao propietario e demais interesados; o mesmo día que adquira firmeza vía administrativa realizarase asento de inclusión no Rexistro.

Artigo 9. Comunicación o Rexistro da Propiedade.

1. A resolución de inclusión de inmovibles no Rexistro Municipal de Soares comunicarase ó Rexistro da Propiedade.

2. Unha vez sexa firme en vía administrativa remitirase ó Rexistro da Propiedade certificación expedida pola Secretaría da Xerencia Municipal de Urbanismo que conteña a transcripción literal da resolución ditada solicitando se deixe constancia da mesma mediante nota ao marxe da última inscrición de dominio.

3. A nota marxinal e a aplicación do réxime de venda forzosa consignarase nas certificacións rexistrais que se expidan. Esta nota cancelarase mediante certificación do acordo de cancelación do asento practicado no Rexistro Municipal.

4. Se o inmovible incluído no Rexistro non estivera inmatriculado ou non exista constancia dos titulares, estenderase anotación preventiva que caducará polo transcurso do prazo de catro anos, sen prexuízo do disposto no parágrafo anterior.

Artigo 10. Expediente de valoración.

A inclusión dun inmovible no Rexistro Municipal de Soares implicará a iniciación do expediente de valoración, o seu resultado constará no Rexistro.

## CAPÍTULO CUARTO. PROCEDEMENTO DE VENDA FORZOSA

Artigo 11. Venda forzosa.

1. No prazo máximo dun ano desde a inclusión do inmovible no Rexistro Municipal de Soares a Xerencia Municipal de Urbanismo convocará poxa pública co tipo de licitación que resulte da valoración do inmovible. A convocatoria fixará garantía para

o cumprimento do deber de edificar.

2. Se a poxa fose declarada deserta a Xerencia no prazo de seis meses poderá adquirir o inmovible con destino ao patrimonio municipal do solo ou convocará no mesmo prazo nova poxa con minoración do tipo nun 25 %.

3. Se a segunda poxa quedara deserta a Xerencia, no prazo doutros seis meses, poderá adquirir o inmovible con destino ao patrimonio público do solo polo prezo de licitación desta poxa.

4. O prezo obtido entregarase ao propietario; en ningún caso corresponderalle unha cantidade superior á valoración do inmovible deducidos os gastos ocasionados e, se é o caso, as sancións aplicables; corresponderá o diferencial á Xerencia Municipal de Urbanismo que o aplicará o patrimonio municipal do solo.

5. Transcorridos os prazos establecidos nos apartados anteriores sen que a Xerencia realizase os correspondentes trámites, a inclusión do inmovible no Rexistro Municipal de Soares quedará sen efecto, circunstancia que comunicarase ao Rexistro da Propiedade.

Artigo 12. Título transmisivo.

A certificación de adxudicación expedida pola Secretaría da Xerencia será título transmisivo inscribible no Rexistro da Propiedade. Na resolución de adxudicación constarán as condicións e prazos do cumprimento do deber ao que queda obrigado o adquirente que serán resolutorias da adquisición en caso de incumprimento.

Artigo 13. Obrigas do adquirente.

O adquirente de soares e construcións no procedemento de venda forzosa queda obrigado a iniciar as obras de edificación e, no seu caso, de urbanización, no prazo dun ano a partir da data de toma de posesión do inmovible; o incumprimento desta obriga determinará a inclusión do inmovible no Rexistro Municipal de Soares. A toma de posesión do inmovible materialízase coa notificación do acordo de adxudicación do inmovible ditado polo órgano municipal competente.

## CAPÍTULO QUINTO. ORGANIZACIÓN DO REXISTRO MUNICIPAL DE SOARES.

Artigo 14. Organización do Rexistro Municipal de Soares.

O Libro de Rexistro é o soporte físico no que constan inscritos todos os inmobles incluídos no Rexistro Municipal de Soares; reflectirán dúas Seccións, Sección Primeira e Sección Segunda, referidas, respectivamente, a soares e edificios; constará dun Anexo de planos de situación e deslinde relacionando estes cos asentos.



## Artigo 15. Contido do Libro de Rexistro.

No Libro Rexistro consignarase para cada soar ou edificación os seguintes datos e circunstancias:

### a) Relativos á finca:

- Situación: nome e número da vía onde se sitúa.
- Datos catastrais: referencia e superficie da finca.
- Valor da finca: valor os efectos da súa venda forzosa-
- Datos rexistrais: Número de Rexistro, Libro, Tomo, Folio, Finca, Inscrición.
- Identificación do titular e o seu domicilio a efectos de notificación.

b) Situación urbanística da parcela, facendo constar a clasificación, cualificación, uso global e específico, número máximo de andares e prazo de edificación. Acompañarase plano de situación e de deslinde.

c) Datos administrativos: número de expediente administrativo no que se ditou orde de execución; número de expediente de inclusión no Rexistro e data da Resolución ditada; no seu caso, cumprimento das obrigas urbanísticas expresadas mediante a cancelación do correspondente asento; as demais resolucións que lles afecten.

d) Observacións: de ser o caso, identificación de ocupantes; resto de circunstancias que puidesen afectar ao solar ou ao edificación.

## Artigo 16. Órganos competentes.

1. Correspóndelle á Vicepresidencia da Xerencia Municipal de Urbanismo as competencias relativas á xestión do Rexistro, en particular, as seguintes:

- a) Incoar os procedementos de inclusión de inmobles no Rexistro.
- b) Ditar a resolución de inclusión e cancelación de inmobles no Rexistro.

2. Correspóndelle á Secretaría da Xerencia as seguintes funcións:

- a) Levar e custodiar o Libro de Rexistro.
- b) Autorizar as dilixencias de apertura e peche de cada Libro e Sección.
- c) Expedir certificacións do seu contido.
- d) Expedir certificacións das resolucións de inclusión e cancelación.

Disposición adicional primeira. Soares e edificacións existentes á entrada en vigor desta Ordenanza.

O expediente de orde de execución sinalado no artigo 7.1 poderase iniciar respecto de soares ou edificacións existentes á entrada en vigor da presente Ordenanza cando se acredite, previo informe emitido ao efecto, que o incumprimento do deber legal de emprender a edificación tense producido fai mais de tres anos segundo o cómputo sinalado no artigo 5.

Disposición adicional segunda. Programas de edificación forzosa. Expropiación de soares.

O Concello de Vigo poderá aprobar programas de edificación forzosa nos que se delimiten áreas prioritarias a efectos de edificación. Cando se incumpra o deber de edificar nalgún soar incluído nestas áreas, o Concello poderá expropialo a fin de asumir a edificación.

Disposición adicional terceira. Rehabilitación de edificios.

O deber de rehabilitar e conservar as edificacións corresponde aos seus propietarios e alcanza ata o importe correspondente a metade do valor actual de construción dun inmovible de nova planta equivalente ao orixinal en relación coas características construtivas e superficie útil, realizado coas condicións necesarias para que a súa ocupación sexa autorizable.

O contido da presente Ordenanza é extensible aos supostos do incumprimento deste deber sen prexuízo de instrumentar o réxime de substitución forzosa previsto no Real Decreto Legislativo 7/2015, de 30 de outubro, polo que se aproba o Texto Refundido da Lei do Solo e Rehabilitación Urbana.

Disposición adicional cuarta. Normativa aplicable.

Para o non previsto nesta Ordenanza, estarase ó disposto no Real Decreto Legislativo 7/2015, de 30 de outubro, polo que se aproba o Texto Refundido da Lei do Solo e Rehabilitación Urbana; Lei 2/2016, de 10 de febreiro, de Solo de Galicia e Decreto 143/2016, de 22 de setembro, polo que se aproba o Regulamento da Lei do Solo de Galicia. Será de aplicación a normativa reguladora da contratación no sector público e Lei 39/2015, de 1 de outubro, do Procedemento Administrativo Común.

Disposición derogatoria.

Queda derogada a Ordenanza reguladora do contido, organización e funcionamento do Rexistro Municipal de Soares e edificacións a rehabilitar, aprobada polo Pleno do Concello de Vigo en sesión do 27.10.2008 e publicada no BOP nº 239 do 10.12.2008.

Disposición final. Entrada en vigor.

A presente Ordenanza entrará en vigor unha vez publicada no BOP e transcorrido o prazo de quince días dende a recepción da súa copia polas Administracións estatal e autonómica.

*Neste intre e en cumprimento de acordo plenario, a Corporación e máis todas as*

*persoas presentes no salón de Plenos, postas en pé, gardan un minuto de silencio en memoria das vítimas da violencia de xénero.*

## **MOCIÓNS:**

**5(79).- MOCIÓN DO GRUPO MUNICIPAL DE MAREA DE VIGO, INSTANDO AO GOBERNO CENTRAL PARA QUE FREE O DETERIORO DO SERVIZO DE CORREOS NA PROVINCIA DE PONTEVEDRA, A FALLA DE PERSOAL NO MUNICIPIO DE VIGO E A SÚA COMARCA E POLA REVERSIÓN DOS RECORTES EN FINANCIAMENTO, E OUTROS ACORDOS COMPLEMENTARIOS. REXISTRO PLENO 1774/1101.**

ANTECEDENTES.- Por escrito de data de entrada no Rexistro do Pleno do 24 de maio de 2018, número 1774/1101, o concelleiro do grupo municipal de Marea de Vigo, Sr. Jácome Enríquez, formula a seguinte,

### MOCIÓN

“MOCIÓN PARA O CESE DO DETERIORO DO SERVIZO DE CORREOS NA PROVINCIA DE PONTEVEDRA, A FALLA DE PERSOAL NO MUNICIPIO DE VIGO E A SÚA COMARCA E POLA REVERSIÓN DOS RECORTES EN FINANCIAMENTO.

O servizo postal público, deficitario en boa parte do territorio, tamén na comarca de Vigo, especialmente en ámbitos non urbanos, depende de Correos, entidade que, xa no exercicio orzamentario do 2017 viu recortado o seu financiamento pola prestación do Servizo Postal Universal nun 66% (120 millóns de euros).

No día de onte, tras a aprobación no Congreso dos Deputados dos Orzamentos Xerais do Estado, estes volven levar a cabo un novo recorte, alén de que o propio Estado xa lle endebeda á empresa postal pública máis de 250 millóns de euros correspondentes aos exercicios dos últimos anos.

Os prexudicados están sendo, no primeiro lugar, a cidadanía e as empresas de zonas rurais, lugares diseminados poboacionalmente así como polígonos industriais, ámbitos nos que o servizo prestado por Correos está experimentando un deterioro considerable, con medidas extremas como a supresión do propio servizo en moitos casos.

Neste sentido, e a consecuencia da redución dos medios de financiamento cos que conta Correos para a prestación do servizo público, a empresa recortou 15.000 postos de traballo desde o ano 2010, 155 na provincia de Pontevedra, que, ademais de provocar o empeoramento do servizo postal, supuxo unha perda de emprego na nosa provincia.

O recorte de servizos prestados á cidadanía, especialmente en zonas como Vigo e a súa comarca, implica a desaparición ou recorte do reparto domiciliario de correspondencia, peche de oficinas en zonas rurais ou de escasa poboación, redución de horarios de atención ao público ou supresión de postos de traballo de ámbito rural, que actualmente prestan servizo en miles de núcleos de poboación que se virán privados dun acceso mínimo aos servizos postais.

Este recorte, no ámbito do estado, afectará a máis de 16 millóns de persoas que viven en medianas e pequenas poboacións. Na nosa provincia, o axuste poderá implicar: 335 postos de carteiras e carteiros suprimidos e poboacións sen reparto regular de luns a venres, afectando a practicamente toda a veciñanza pola perda e/ou debilitamento do servizo postal.

Ante esta situación, os sindicatos de Correos xa advertiron do inicio dun proceso de mobilizacións e conflito laboral aberto no caso de non corrixiarse o recorte en financiamento e emprego, feito xa consumado tras a aprobación dos Orzamentos Xerais do Estado. Estas mobilizacións xa darán comezo no ámbito do Estado o vindeiro 7 de xuño, con paros de 2 horas.

Polo exposto, o Grupo Municipal da Marea de Vigo presenta ao Pleno para a súa aprobación se procede as seguintes propostas de

#### ACORDOS:

1.- O Pleno do Concello de Vigo manifesta o seu rexeitamento ao recorte de financiamento, recorte que afectará a todas as localidades, e de forma especial a poboacións de ámbito rural e zonas non rendibles economicamente, implicando unha desigualdade manifesta respecto a ámbitos urbanos e grandes centros de poboación.

2.- Instar ao Goberno, como máximo responsable na determinación de recursos adicados a garantir o servizo de Correos á cidadanía, a corrixi-lo un recorte que ten consecuencias claramente negativas para a cidadanía, para Correos e para os seus traballadores e traballadoras. Así mesmo, esíxese a restitución dos 120 millóns de euros recortados nos Orzamentos Xerais do Estado do 2017 para garantir a prestación do Servizo Postal Universal a viabilidade da empresa pública.

3.- Instar ao Ministerio de Facenda, como propietario de Correos, á aprobación do Plan Estratéxico que permita a súa adaptación empresarial ás necesidades e á demanda da cidadanía, así como á garantía do cadro de persoal suficiente para a prestación adecuada do servizo.

4.- Instar ao Goberno a desbloquear o Convenio Colectivo e o Acordo funcional, bloqueado dende fai máis de 4 anos, da maior empresa pública do noso país con máis de 50.000 traballadoras e traballadores.

5.- Instar ao conxunto de Grupos Parlamentarios con representación nas Cortes Xerais a impulsar as iniciativas necesarias para facer posible dita rectificación.”

#### DEBATE:

SR. JÁCOME ENRÍQUEZ: O servizo postal público deficitario en boa parte do territorio tamén na comarca de Vigo, especialmente en ámbitos non urbanos depende de Correos, entidade que viu recortado o seu financiamento pola prestación do Servizo Universal Postal a partires do ano 2011, ata entón Correos recibía dos Orzamentos do Estado subvencións para financiar o custo do servizo postal universal. A partires do 2011 Correos pasou a percibir unicamente subvencións de explotación a conta da compensación do carga financeira pola prestación do servizo, o propio Estado xa lle endebeda á empresa Postal Pública, máis de 250 millóns de euros, correspondentes aos exercicios dos últimos anos, como exemplo parte das subvencións correspondentes ao ano 2009-2010, cobráronse non anos 2011 e 2012, segundo o Tribunal de Contas de Correos, a 31 de decembro do ano 2016, o saldo de subvencións pendentes de cobro ascendían a 259 millóns de euros, os prexudicados están sendo en primeiro lugar a cidadanía e as empresas de zonas rurais, lugares diseminados poboacionalmente, así como polígonos industriais, ámbitos nos que o servizo prestado por Correos están experimentando deterioro considerable, con medidas extremas nalgúns casos como a supresión do propio servizo, situación especialmente alarmante no conxunto de Galicia polo reparto poboacional.

Neste sentido e a consecuencia da redución dos medios de financiamento cos que conta Correos para a prestación do servizo público, a empresa recortou 15.000 postos de traballo dende o ano 2010, 155 na provincia de Pontevedra, que ademais de provocar o empeoramento do servizo postal supuxo unha perda de emprego non só importante senón tamén imprescindible para a prestación do servizo.

O recortes de servizos prestados á cidadanía, especialmente en zonas como Vigo e

a súa comarca, implica a desaparición ou recorte do reparto domiciliario de correspondencia, peche de oficinas en zonas rurais ou de escasa poboación, redución de horario de atención ao público ou supresión de postos de traballo de ámbito rural que actualmente prestan servizo en miles de núcleos de poboación que se viran privados dun mínimo de acceso aos servizos postais.

Este recorte no ámbito do Estado afectará a máis de 16 millóns de persoas que viven en medianas e pequenas poboacións, na nosa provincia o axuste poderá implicar 335 postos de carteiras/os suprimidos e poboacións e reparto regular de luns a venres, afectando a practicamente a toda a veciñanza pola perda ou debilitamento do servizo postal, dos cales un 80 afectarían directamente á cidade de Vigo, non debemos perder de vista a rendabilidade social, tal e como expresa a Lei do 2010 do Servizo Postal Universal, a existencia dun servizos postais de ampla cobertura territorial de calidade e fiabilidade é unha condición necesaria para a promoción dun desenvolvemento equilibrado e sostible das actividades económicas no Estado español, a propio normativa comunitaria consagra que os servizos postais son un medio esencial de comunicación, comercio e cohesión social, e contribúen ao logro dos obxectivos de equidade, emprego e protección social. As traballadoras/es do sector denuncian que este recorte de fondos e de persoal prexudican gravemente as condicións de prestación do servizo e as condicións laborais, non se cobren con rigor as ausencias, baixas ou vacacións, dende o ano 2008 perdéronse na empresa pública 15.000 postos de traballo e dende entón as ofertas de emprego foron no ano 2015 de 1.600 prazas, no 2018 de 2.300 prazas e no 2019 están previstas 1.900 prazas, queda claro que as contas non dan, máis aínda cando a previsión dos sindicatos é de 7.000 xubilacións nos próximos anos, moito nos tememos que a estratexia é a de sempre, precarízase o servizo con recortes de fondos e de persoal e cando o servizo está nunha situación insostible entrase ao fondo nunha estratexia de privatización salvaxe.

A facturación de paquetería experimenta un aumento anual do 20%, e por factores do prezo e beneficio unha empresa pública que está nunha situación idónea para recoller ese nicho de mercado, habería que preguntarse como é posible que empresas públicas como SEUR ou DHL estean operando con gran éxito no noso país, mentres que Correos, cunha estrutura invidiabile está sendo desmantelada.

Recentemente o goberno francés, fixo fortes investimentos na sociedade postal francesa, cun importante investimento que foi aprobado pola proia Comisión Europea xa que non se catalogaba como axuda fiscal dentro desa política de considerar ao Servizo Postal Universal como un dereito da cidadanía, e por iso que a petición da sección sindical de Comisións Obreiras presentamos este Pleno para a súa aprobación o seguintes acordos: Manifestar o rexeitamento ao recorte de financiamento que afectará a tódalas localidades; instar ao goberno como máximo responsable na determinación dos recursos adicados á garantir os servizo de correos á cidadanía; instar ao Ministerio de Facenda como propietario de Correos á aprobación do Plan Estratéxico; instar ao goberno a desbloquear o Convenio Colectivo e o acordo funcionarial bloqueado dende hai máis de 4 anos e instar ao conxunto de grupos parlamentarios con representación nas Cortes Xerais a impulsar as iniciativas necesarias para facer posible esta rectificación.

SR. FIDALGO IGLESIAS: Correos, nace fai 301 anos e se crea como un servizo público para tódolos españois, sempre foi un servizo esencial para a vertebración e a cohesión social en España e un motor tamén de desenvolvemento económico, Correos que este ano 2018 conta cun presuposto de 120 millóns de euros é o mellor provedor de comunicacións físicas, dixitais e de paquetería de España traballando con eficiencia, calidade e sostibilidade, cos mellores profesionais a maior presenza territorial e os equipamentos máis innovadores, forma por tanto, Correos parte do noso día a día, dillo un neto dun funcionario de Correos e está implicado nas nosas empresas, nas nosas institucións e fai dende hai moitos anos a nosa vida moito máis sinxela e máis fácil.

Correos ademais é unha das principais empresas españolas, máis de 51.000 empregos, 51.205 empregos, 8.787 puntos de atención, 13.500 vehículos que percorren diariamente preto de 600.000 quilómetros o que equivale a darlle a volta ao mundo 15 veces ao día, e xestiona ao ano ao redor de 2.700 millóns de envíos que se distribúen diariamente a fogares e a empresas de toda España desenvolvendo a súa actividade de maneira sostible e medio ambientalmente responsable. Hoxe en día Correos está nun proceso como toda a sociedade española de constante cambio e adaptación aos retos xurdidos do actual contexto de madurez do sector postal, e a xeneralización do uso de medios alternativos

substitutivos ao correo tradicional, que deriva nos últimos anos nunha importante perda de volume postal. Os mercados nos que opera o grupo Correos experimentaron unha intensificación na competencia, se impuxeron novas formas de identificación e comunicación dixital como a sinatura biométrica, se cumpriron as expectativas de crecemento do comercio electrónico e por extensión da paquetería cuxo volume de negocio podería multiplicarse varias veces nos próximos anos. Ante este novo escenario as liñas estratéxicas de correos se dirixen cara onde? Pois a asegurar un servizo postal universal eficiente e de calidade, profundizar nas liñas de diversificación do negocio a través do fortalecemento da empresa no mercado da paquetería, sobre todo, a transformación tecnolóxica e dixital ou a consecución dun emprego de calidade e estable entre outras actuacións tendentes a incrementar a eficiencia e a competitividade empresarial que garantan a viabilidade da empresa. Correos é unha historia dende logo de éxito, correos pasou por moitas vicisitudes pero ningunha como a que se atopou o Presidente o Sr. Feijóo en 1996, ninguén naquel momento cría en Correos e o Sr. Feijóo sacouno adiante no momento máis difícil cando o servizo deixou de ser un monopolio e se abriu á libre competencia.

En resumo, a lexislación vixente garante os dereitos de tódolos cidadáns a gozar dun servizo público universal accesible e de ampla cobertura territorial e de calidade prestado de forma permanente en todo o territorio nacional e a prezos accesibles e competitivos para tódolos cidadáns e cuxa prestación como operador designado polo Estado, se encomendaron a Correos. O futuro de Correos está garantido mentres governe o Partido Popular en España, o Partido Popular cree en Correos, o Partido Popular aposta por Correos, o Partido Popular por iso creou o fondo de financiamento do servizo público universal e hai un ano o Partido Popular creou tamén un grupo de traballo interministerial encargado de redactar o Plan de Prestación do Servizo Público Universal cuxo borrador acaba de rematar, polo tanto, dende o grupo municipal do Partido Popular de Vigo, todo o noso apoio, todo o noso cariño, todo a nosa consideración aos traballadores do Servizo Público de Correos que teñen un traballo estable, non así como os traballadores do Concello de Vigo que seguen na precariedade laboral, seguen na temporalidade permanente, non se saca oferta pública de emprego, non así como en Correos que se sacaron máis de 2.000 prazas nestes últimos anos e vanse seguir sacando, polo



tanto, o noso apoio, noso cariño porque o Partido Popular cree en Correos e salvou a Correos das súas situacións máis complicadas.

SR. LÓPEZ FONT: Algúns confunden este Pleno co Pleno do Senado. Vou falar en positivo, sen cinismo de Correos, Correos data como sociedade de xullo de 1716 e se encarga do Servizo Postal Universal, as cifras de correos dan conta da súa importancia, atende a 8.000 entidades locais e ten efectivamente 57.000 empregados percorrendo 700.000 quilómetros ao día, pero a garantía deste dereito, do servizo público, fai necesaria garantir a súa viabilidade futura, e é certo que se necesita diversificar a súa actividade pero tamén equilibrar a súa conta de resultados para manter a rede do servizo postal, é incuestionable o esforzo que fixeron os traballadores e as organizacións sindicais para garantir este servizo, e como se atreve o Sr. Fidalgo dende o maior cinismo político de dicir aquí que está de acordo, que apoia, que o Partido Popular garante o servizo, se esta é unha moción para poñer branco sobre negro, as súas vergoñas, Sr. Fidalgo, si, mire, vostedes estaban obrigados como goberno dende hai sete anos a levar a cabo a directiva postal e a manter un marco estratéxico e vostedes non o fixeron, vostedes son responsables dos recortes que sufriu o servizo, vostedes son responsables dos 15.000 empregos que se perderon, polo tanto, Sr. Fidalgo, esta é unha moción que se presenta por parte de Marea de Vigo que nós asumimos pero que asumimos dende a responsabilidade de falar cos sindicatos e de que nos trasladaron cal é situación legal e a situación real de Correos. Mire, non entendo como se lle esqueceu o que vostedes dende Correos adoptouse unha decisión, en decembro de 2017, sobre un servizo público universal no que establecen dous tipos de tarifas, un para as grandes cidades e outro para os núcleos rurais e os núcleos rurais están penalizados co 30%, co cal vostedes coas súas actuacións estanse cargando o que é o servizo público, polo tanto, nós apoiamos a moción de Marea de Vigo, fixemos dous engadidos precisamente ao que é o Plan Estratéxico porque consideramos que hai que matizalo máis pero tamén fixemos e presentamos un engadido sobre a necesidade de negociar no ano 2018, un convenio que leva parado 4 anos, pero como nos conta vostede unha película dun mundo ideal como neto de traballador de Correos que non se corresponde coa realidade? O que vostede contou aquí non se corresponde coa realidade, o que

vostede contou aquí non se corresponde co que está facendo o goberno, a realidade como sociedade xestora é que dende hai sete anos vostedes deberían trasladar a directiva comunitaria ao que é o servizo de Correos, e o incumpriron, a realidade é que vostede que levan 4 anos sen negociar cos traballadores e que houbo recortes nestes catro anos que vostede non ten en conta, polo tanto, nós presentamos estes dous engadidos e entendemos que debemos de ir a un Plan de Prestación de Servizo Postal que garanta precisamente esa universalidade. O que vostede nos contou aquí é certamente outra situación de Correos que a xulgar polos murmuros que se escoitaron comparten comigo en que non se corresponde. E logo deben de haberse proposto o día de hoxe como o día reivindicativo da Sra. Porro, do Sr. Feijóo e demais, eu creo que conviría que lle preguntase a algún representante sindical que tivo que sufrir ao Sr. Feijóo como director xeral de correos, se en Correos se lembra unha etapa absolutamente nefasta no que é a representación dos traballadores é cando o Sr. Feijóo foi o responsable de Correos, aínda se lembran del. Mire, colla a intervención por se lle encargan defender no Senado o que dixo aquí, pero o que dixo aquí nin defende o servizo para os cidadáns de Vigo nin defende aos traballadores e se por vostede fora e pola súa intervención fora se cargarían como parece ser que se temen e nos tememos o servizo público universal.

SR. JÁCOME ENRÍQUEZ: Indicar que si aceptamos os engadidos do Partido Socialista á nosa moción e moi brevemente amosar a nosa sorpresa, o Sr. Fidalgo fala de creación de emprego cando nesta etapa do Partido Popular se destruíron 15.000 prazas e só se convocaron 5.800 prazas, as contas non dan por ningún lado e aínda por enriba, repetimos, 7.000 xubilacións nos próximos anos, hai menos choio aí queda iso, é dicir, como efectivamente as notificacións por escrito baixan pero o negocio da paquetería aumenta un 20% cada ano e empresas públicas postais, francesas, como DHL ou SEUR están operando en España mentres que Correos non se lle da ningunha opción de internacionalizar o seu servizos, resulta que é menos choio, home claro que é menos choio, se queremos liquidar a entidade pública dende logo que vai haber moito menos choio e moito menos servizo nas áreas rurais do noso país, pasemos a votacións xa porque as veces hai que escoitar cada cousa, que de verdade.

PRESIDENCIA: Hai dúas emendas aceptadas a tramitación e polo tanto cumpre votalas. E a emenda de engadir un texto co punto terceiro que fala de Plan Estratégico e engadir un texto co punto cuarto de negociar o pacto convenio colectivo cos traballadores de Correos.

No transcurso do debate, o voceiro do grupo municipal Socialista, Sr. López Font, presenta a seguinte emenda de engádeda:

“3.- Diseñar e aprobar un Plan Estratégico para aumentar a competitividade e garantir a viabilidade da Sociedade Estatal de Correos e Telégrafos, S.A. Este Plan debe conter, entre outros elementos, a diversificación a través de actividades como: paquetería, servizos financeiros, retail, dixital, etc. Deberá contar na súa elaboración coa participación dos representantes dos traballadores e traballadoras, e cos grupos políticos representados no Congreso dos Deputados.

4.- Negociar, ao longo de 2018, un novo pacto colectivo cos traballadores que busque, entre outras cousas, garantir a taxa de reposición, a estabilidade no emprego mediante convocatorias de consolidación nos próximos anos, o rexuvenecemento do persoal, a garantía e mellora das condicións laborais e un pacto salarial que, ademais de buscar recuperar o salario perdido nos últimos anos, responda á singularidade da compañía pública.”

*Ao seren aceptada a anterior emenda de engádeda polo relator da moción, “Sr. Jácome Enríquez, a Presidencia somete a votación a anterior emenda.*

VOTACIÓN DA EMENDA: Con dezoito votos a favor dos membros do grupo municipal Socialista, señores e señoras Alonso Suárez, Aneiros Pereira, Blanco Iglesias, Caride Estévez, Fernández Pérez, Iglesias González, Lago Rey, López Font, Marra Domínguez, Pardo Espiñeira, Regades Fernández, Rivas González, Rodríguez Díaz, Rodríguez Escudero e a Presidencia, e máis dos membros do grupo municipal de Marea de Vigo, señores e señora, Jácome Enríquez, López Barreiro e Pérez Correa, e seis abstencións dos membros do grupo municipal do Partido Popular señores e señoras, Egerique Mosquera, Fidalgo Iglesias, Gago Bugarín, González Sánchez, Muñoz Fonteriz e Piñeiro López, acórdase aprobar a emenda de engádeda.

VOTACIÓN: Con dezaoito votos a favor dos membros do grupo municipal Socialista, señores e señoras Alonso Suárez, Aneiros Pereira, Blanco Iglesias, Caride Estévez, Fernández Pérez, Iglesias González, Lago Rey, López Font, Marra Domínguez, Pardo Espiñeira, Regades Fernández, Rivas González, Rodríguez Díaz, Rodríguez Escudero e a Presidencia, e máis dos membros do grupo municipal de Marea de Vigo, señores e señora, Jácome Enríquez, López Barreiro e Pérez Correa, e seis abstencións dos membros do grupo municipal do Partido Popular señores e señoras, Egerique Mosquera, Fidalgo Iglesias, Gago Bugarín, González Sánchez, Muñoz Fonteriz e Piñeiro López, adóptase o seguinte,

ACORDO:

Aprobar a Moción presentada, en data 24.05.2018 (Rex. Nº 1774/1101), polo concelleiro do grupo municipal de Marea de Vigo, Sr. Jácome Enríquez, coa emenda de engádeda presentada polo voceiro do grupo municipal Socialista, Sr. López Font, quedando o acordo do seguinte xeito:

1.- O Pleno do Concello de Vigo manifesta o seu rexeitamento ao recorte de financiamento, recorte que afectará a todas as localidades, e de forma especial a poboacións de ámbito rural e zonas non rendibles economicamente, implicando unha desigualdade manifesta respecto a ámbitos urbanos e grandes centros de poboación.

2.- Instar ao Goberno, como máximo responsable na determinación de recursos adicados a garantir o servizo de Correos á cidadanía, a corrixir un recorte que ten consecuencias claramente negativas para a cidadanía, para Correos e para os seus traballadores e traballadoras. Así mesmo, esíxese a restitución dos 120 millóns de euros recortados nos Orzamentos Xerais do Estado do 2017 para garantir a prestación do Servizo Postal Universal a viabilidade da empresa pública.

3.- Diseñar e aprobar un Plan Estratéxico para aumentar a competitividade e garantir a viabilidade da Sociedade Estatal de Correos e Telégrafos, S.A. Este Plan debe conter, entre outros elementos, a diversificación a través de actividades

como: paquetería, servizos financeiros, retail, dixital, etc. Deberá contar na súa elaboración coa participación dos representantes dos traballadores e traballadoras, e cos grupos políticos representados no Congreso dos Deputados.

4.- Negociar, ao longo de 2018, un novo pacto colectivo cos traballadores que busque, entre outras cousas, garantir a taxa de reposición, a estabilidade no emprego mediante convocatorias de consolidación nos próximos anos, o rexuvenecemento do persoal, a garantía e mellora das condicións laborais e un pacto salarial que, ademais de buscar recuperar o salario perdido nos últimos anos, responda á singularidade da compañía pública.

5.- Instar ao Ministerio de Facenda, como propietario de Correos, á aprobación do Plan Estratéxico que permita a súa adaptación empresarial ás necesidades e á demanda da cidadanía, así como á garantía do cadro de persoal suficiente para a prestación adecuada do servizo.

6.- Instar ao Goberno a desbloquear o Convenio Colectivo e o Acordo funcional, bloqueado dende fai máis de 4 anos, da maior empresa pública do noso país con máis de 50.000 traballadoras e traballadores.

7.- Instar ao conxunto de Grupos Parlamentarios con representación nas Cortes Xerais a impulsar as iniciativas necesarias para facer posible dita rectificación.”

**5(bis)(80).-MOCIÓN DO GRUPO MUNICIPAL DO PARTIDO POPULAR, INSTANDO AO Mº FOMENTO A INCOAR UN SANCIONADOR Á CONCESIONARIA AUTOPISTA DO ATLÁNTICO PARA GARANTIR A FLUIDEZ E SEGURIDADE DO TRÁFICO NA AP9, E OUTROS ACORDOS COMPLEMENTARIOS. EXPTE. 1773/1101.**

ANTECEDENTES.- Por escrito de data de entrada no Rexistro do Pleno do 24 de maio de 2018, número 1773/1101, a voceira do grupo municipal do Partido

Popular, Sra. Muñoz Fonteriz, formula a seguinte,

### MOCIÓN

“A obra de ampliación da ponte de Rande, largamente demandada e prometida dende o ano 2007 supón un importante avance nesta infraestrutura para toda a área metropolitana.

A Autoestrada AP9 constitúe unha das principais vías de acceso á nosa cidade que nas derradeiras datas se está a ver colapsada polas obras de ampliación da ponte de Rande o cal está a causar numerosas protestas dos usuarios.

Mesmo en fins de semana e pontes festivas, miles de usuarios se viron atrapados en colas kilométricas que esgotaron a paciencia de miles de condutores que viaxan pola mesma.

O feito de acceder a unha autoestrada e verse atrapado en enormes atascos de tráfico dos que unha vez dentro da autoestrada non se pode saír enerva con toda a razón aos usuarios.

Mentras esto ocorre a concesionaria da autopista continúa coas obras sen tomar ningunha medida para garantir a calidade do servizo e a fluidez do tráfico na autopista, e por mor destas obras incluso se ten reducido ostensiblemente o límite de velocidade nesta infraestrutura de gran capacidade.

Que moitos cidadáns queden atrapados durante horas na autoestrada forma parte do inmovilismo coa que Audasa xestiona a autoestrada que nin toma medidas nin pon a disposición medios para garantir a mobilidade do conxunto dos usuarios.

Dende o Partido Popular de Vigo entendemos que esta situación é profundamente censurable e que tanto o Ministerio de Fomento como a concesionaria deben garantir medidas para manter a calidade do servizo para os usuarios.

Por todo o anteriormente exposto, o grupo municipal do Partido Popular insta ao Pleno da Corporación á adopción do seguinte acordo:

- Instar ao Ministerio de Fomento a incoar un expediente sancionador á concesionaria Autopistas del Atlántico e tomar cantas medidas estime oportunas para obrigar á concesionaria da autoestrada AP9 a garantir a fluidez e a seguridade do tráfico.
- Instar á concesionaria Autopistas del Atlántico a realizar as obras pendentes nun horario no que se minimize o impacto sobre o tráfico.
- Instar á concesionaria Autopistas del Atlántico á devolución das peaxes cobradas a todos aqueles usuarios que se teñan visto afectados polos colapsos orixinados polas obras.
- Instar á concesionaria Autopistas del Atlántico ao levantamento das barreiras das peaxes cando non se garante a fluidez propia dunha vía de alta capacidade.”

## DEBATE:

SRA. MUÑOZ FONTERIZ: Moitas gracias Alcalde por darme a palabra para defender esta moción que presentamos para reclamar o que para nós dende logo xa se converteu nunha cuestión de xustiza e é reclamar actuacións inmediatas e urxentes, Sr. Alcalde non me diga que se vai a marchar agora que estamos a falar da ampliación da Ponte de Rande, unha mostra máis do respecto que ten por este Pleno o Alcalde de Vigo, por esta Corporación municipal, lamentable, unha vez máis a ausencia do Alcalde.

Imos falar porque eu creo que a pesares de que o máximo representante despreza ao Pleno, os vigueses non desprezan á Corporación municipal e queren que falemos do que pasa na Ponte de Rande, eu comprendo que claro, que nesta moción el sabe que vai escoitar cousas que non quere escoitar porque hai cousas das que sentirse bastante avergoñado, a realidade é que a ampliación da Ponte de Rande é unha ampliación moi necesaria que se fai porque hai unha necesidade extraordinaria non só para Vigo senón para a área metropolitana de mellorar as comunicacións na nosa cidade, unha necesidade, unha ampliación, obra insisto, importante, un investimento de 191 millóns de euros, a primeira ponte atirantado en todo o mundo que é ampliado, polo tanto, un investimento que é ademais extraordinariamente complexa, e que polo tanto se fixo porque era necesario e era algo que os vigueses levábamos pedindo moitos anos. Polo tanto, a súa necesidade é incuestionable, a complexidade e a importancia da obra tamén o é, incuestionable absolutamente pero tamén é incuestionable que dende hai uns meses se veñen producindo de forma repetida e sistemática atascos na Ponte de Rande despois de ter aberto os dous novos carrís que dende logo para nós son absolutamente intolerables, atascos recorrentes, non puntuais, non por un accidente en concreto, senón atascos que se repiten día si, día tamén. Isto levou ao Partido Popular de Vigo a saír protestando por este feito, recollendo as protestas de tódolos veciños da área metropolitana atrapadas en moitas ocasións na Ponte de Rande neses atascos e enviarlle unha carta á concesionaria para que tomara medidas, para que fixera unha reprogramación dos horarios das obras, que as fixeran no horario nocturno previsiblemente ou de menor afluencia de tráfico, que

devolvera a peaxe a tódalas aqueles persoas que foran afectadas por eses atascos e en terceiro lugar levantar as barreiras cando a fluidez non fora a necesaria. Dende ese 10 de maio que xa lle diriximos esa carta a Audasa, porque hai outras que lles gusta facer moito ruído pero eu creo que hai que comunicarse como se debe e dende logo coa concesionaria ten esta comunicación do Partido Popular de Vigo, dende o día 10 de maio. A situación se mantivo, a situación non mellorou desgraciadamente, o que nos levou a decidir traelo aquí ao Pleno porque tódolos concellos do Morrazo estanse mobilizando de forma activa e a cabeza da área metropolitana, a cidade principal da área metropolitana e a principal de Galicia tamén se ten que pronunciar e tamén ten que esixir a quen ten competencia que dende logo tome medidas, non facer demagogia barata, non, facer peticións lóxicas razoables e a quen ten na súa man resolver este problema por iso presentamos esta moción, unha moción na que volvemos a pedir unha vez máis que Audasa devolva as peaxes nos casos que se sufriran atascos, nas que volvemos pedir que se levanten as barreiras cando haxa eses atascos e non se cobre porque se está a incumprir por parte da concesionaria unha obriga que é garantir esa fluidez do tráfico e tamén por suposto esixirlle ao Ministerio de Fomento que tome cantas medidas sexan necesarias para obrigarlle á concesionaria a garantir a e cumprir co que está obrigada e nese sentido cremos que unha primeira medida importante e necesaria é abrir con efecto inmediato un expediente sancionador á concesionaria porque insistimos, non se está a cumprir coas obrigas que teñen.

Polo tanto, esta é a moción que traemos ao Pleno, entendo que esa moción vai ser compartida por tódolos grupos municipais, que é unha moción razoable, dirixida a quen ten competencias, insisto, e esperemos que nos centremos niso porque xa vimos que nos presentaron unha contramoción e en fin, xa para a replica deixareime algún comentario.

SR. PÉREZ CORREA: Nós como non podía ser menos, estamos moi contentos de que o Partido Popular presente unha moción “bolivariana” de empresas absolutamente espoliadoras ser sancionadas, está ben, eu creo unha política que en América latina se fai e cre que é bo que neste país a determinadas empresas que espolian ó público apliquen ese criterio bolivariano e como digo tan ben está



resultando noutras latitudes, nos parece sorprendente porque creo que non viaxamos no tempo, creo que non estamos no luns, non se produciu unha moción de censura, non hai outro goberno e polo tanto, o goberno que é copartícipe desta situación é o goberno do Partido Popular, non creo que viaxáranos non tempo nin lle déramos a razón a teoría de relatividade de Einstein e esteamos noutros espazo temporal, agora mesmo o Partido Popular ten ou tivo a capacidade de levar adiante políticas de control desta concesión por desgracia privada e incluso cun bloqueo sistemático na mesa do Congreso do Deputados, a posibilidade de transferencia da xestión e da titularidade desta infraestrutura ao ámbito galego que tamén permitiría certa marxe de manobra. Estamos incluso de acordo coas cuestións que poñen enriba da mesa, estamos de acordo que se lle faga o expediente sancionador, pensamos que é absolutamente insuficiente, entre outras cousas, porque Audasa ten demostrado unha capacidade incluso de litigar coas administracións públicas, e de xogar incluso moitas veces no borde da lei, moitas veces incluso fora dese borde sobre todo no que ten que ver en materia de facenda e fiscalidade.

E polo tanto, e estando de acordo con esta moción si que queríamos poñer enriba da mesa, polo menos algunhas dúbidas, unha é a cuestión do horario, non estamos a falar dunha obra que sexa exemplar en canto á seguridade laboral, non estamos a falar dunha obra na que podamos dicir que non houbo mortes, non estamos a falar dunha obra que non podamos dicir que se incumpriron cuestións moi importantes en materia de convenio laboral tamén da construción e da obra pública e polo tanto nos gustaría certa cautela co acelerar os traballos nocturnos que en determinadas infraestrutura públicas como estas, podería ter incluso un compoñente de seguridade laboral bastante discutible, e logo tamén, cremos que aquí, obviamente, falaremos na outra moción desta cuestión o que falla é unha decisión para nós errónea proposta no seu día polo goberno do Partido Socialista porque nunca entendimos porque tiña que ser unha concesionaria privada a que levara adiante o investimento de máis de 300 millóns de euros, a cambio dunha suba de 1% durante 20 anos no momento da finalización das obras, porque iso significa que o que se fixo é intentar acelerar o proceso para poder chegar a decembro, finalizar en teoría as obras e supostamente entendíamos que a partir de aí entraría esa cláusula que no seu día asinou o Ministro o Sr. Blanco, que dicía

que a partir desa finalización das obras ademais do incremento do IPC que ten blindado a concesionaria habería un 1% nun período de 20 anos pero curiosamente non o hai, curiosamente o goberno do Partido Popular decidiu que por agora aínda non vai a aplicar esa suba, e polo tanto, tampouco entendemos a celeridade de facer unha inauguración e rematar unhas obras porque se non imos aplicar esa suba do 1%, a suba do IPC normal de tódolos anos se aplica polos acordos que non teñen nada ver coa ampliación da infraestrutura e polo tanto, o que hai é cando menos unha política bastante ridícula de inaugurar algo que non estaba rematado, non sabemos aínda a día de hoxe moi ben por que, porque se non está aplicando como digo ese 1% que viña no convenio urbanístico.

Aquí hai dúas solucións, posiblemente unha parcial sería subir as barreiras pero nós pensamos que xa é o momento de abordar e este Pleno deberíamos nalgún momento facer esa labor de traballo colectivo, de abordar xa a reclamación do fin de todas as peaxes no tramo de autoestrada máis amortizada posiblemente da Unión Europea, isto é unha máquina de triturar diñeiros dos contribuíntes e convertelo en beneficios moitas veces en paraísos fiscais e moitas veces nin sequera que teñan retorno no noso país, e pensamos que é o momento de abordar xa a nacionalización, a expropiación se fai falla aos grupos económicos que hoxe en día teñen a Audasa, e convertelo nunha vía gratuíta, porque non pode ser que os polos económicos deste país estean conectados hoxe en día por tramos de autoestrada absolutamente prohibitivos para moitas familias, pensamos que este debate sería bo que se fora abrindo ademais de estas cuestións que como digo estamos complementemente de acordo.

SR. REGADES FERNÁNDEZ: Que raro que coincida eu en reflexións co grupo Marea de Vigo, non, pero neste caso si coincido. Eu non entendo moito esta moción porque parece que ao final o Partido Popular é un comentarista político, non ten responsabilidades e nós o que si lle esiximos, esiximos no tema de Rande é responsabilidades políticas porque cremos que as autoestradas a AP-9 depende dunha responsabilidade política porque segue dependendo do goberno de España e do Ministerio de Fomento, entón, alguén ten que esixir á concesionaria non iso, o fixemos moi ben porque lle fixemos unha carta no mes de maio, xa estamos a piques de rematar o mes de maio no que lle pedíamos que se abriaran as barreiras

cando había atascos polas obras, que as obras se fixeran de noite, onte mesmo as obras se seguían facendo durante o día e que esixíamos nesa carta maior planificación, non Sra. Muñoz, isto é moito máis importante, hai un Ministro de Fomento que ten que esixirlle á concesionaria a que faga esas medidas, eu lle dicía o outro día que se o Partido Socialista despois deste venres gobernamos España, pois tomaremos medidas moi concretas, levantaremos as barreiras de forma automática durante as obras, retrotraeremos a subida da peaxe ao ano pasado, porque non se pode subir nin o 1%, nin o 2%, nin o 3%, nin o 0,1%, hai que retrotraer eses prezos porque están sendo adulterados, esixémoslle porque a día de hoxe as nosas veciñas/os seguen sen saber o plan de obras, hoxe líamos no xornal que fontes da concesionaria dicía “non, temos que ter tódalas corporacións ao plan de obras ata o remate das obras”, sabemos cando van acabar, saber que actuacións van facer, e sobre todo en que tempos van facer. Dicíamoslle tamén que habería que impulsar dunha forma contundente e clara a A-57, esa autovía que é a alternativa real á AP-9 porque hoxe en día non ten alternativa real, calquera alternativa por outra vía supón un investimento de máis de 40 minutos en estrada, co tal temos que facer de forma decidida e de forma contundente a nova autovía e como se fai iso? Non se fai unha carta Sra. Muñoz, faise meténdoas no orzamento e meténdoas en licitación de obra, iso é como se fan os compromisos cando se ten o Boletín Oficial do Estado, cando se goberna un país, non se pode mirar para outro lado, eu a verdade que lle vou a dicir que o Partido Socialista estaba disposto a votar a esta moción sempre e cando sexan responsabilidade políticas, sempre e cando asuma esta emenda que lle imos facer agora mesmo “in voce”, instar ao Ministro de Fomento e ao Presidente da Xunta de Galicia a pedir publicamente desculpas aos miles de cidadáns que se viron atrapados nas largas e reiteradas retencións que se producen en Rande, por non adoptar ningunha medida durante os últimos cinco meses e tamén instar ao Ministerio de Fomento, a Xunta de Galicia e a concesionaria a adopción inmediata dun plan de prevencións de atascos, en devandito plan deben de fixarse os momentos de riscos das retencións e transmitir por tódolos medios as posibles situacións aos usuarios, tamén se debe contemplar no devandito plan que no caso de atascos procédanse de forma inmediata a levantar as peaxes, que as obras necesarias a realizar se efectúen nos momentos de menor densidade de tráfico esta é a emenda de

incorporación que nós lle propoñemos porque ten que esixirse responsabilidades políticas, eu dende aquí tamén quería felicitar ao fiscal provincial pola iniciativa de ter aberto un expediente para intentar solucionar o que está a pasar na Ponte de Rande, por iso dende aquí, dende o Pleno do Concello, pídolle a tódolos usuarios, a tódalas mulleres e homes que usaron as autoestradas que garden os tíquets, aos que o fixeron a través da OVE que garden tódalas facturas da OVE porque vaise ter, e a lei vains dar a razón, vai a ter que retrotraerse todas estas peaxes que se pagaron de forma ilícita porque o Partido Popular, o goberno do Sr. Feijóo e o goberno do Sr. Rajoy non foron capaces de tomar as medidas adecuadas, co cal lle dicimos cando se está nos gobernos se debe esixir, nós as concesionarias municipais como vostedes lembran cando chegamos ao goberno o prezo do coche/quilómetro de Vitrasa estaba en 4,7328 céntimos a nós nos parecía un abuso, gobernou o Partido Popular dúas veces con dous alcaldes aquí e non o cambiaron, gobernaron outros alcaldes e non o cambiaron, o Sr. Abel Caballero rebaixou do 4,7328 ao 4,0709 que significa unha rebaixa do 15%, si Sr. Fidalgo, a subida das subvencións de Vitrasa foron aos colectivos sociais e que nós queremos seguir facendo unha aposta decidida polos colectivos sociais.

SRA. MUÑOZ FONTERIZ: A verdade é que non me estraña que a vostedes lles estrañe que presentemos unha moción para pedir algo ao goberno de España que é do Partido Popular, é que vostedes cando gobernan son incapaces de esixir lle nada ao goberno do Partido Socialista, nin son capaces de esixir nada cando gobernan os seus propios partidos, pero nós si porque o que estamos a defender son os intereses de tódolos vigueses e de tódolos veciños da área metropolitana, sinceramente Sr. Pérez que fala vostede de réximes bolivarianos e de mocións bolivarianas, venezolanas, iso son vostedes, non se confunda, son vostedes o que pasan é que como están nesa crise de identidade dende que se compran chalets de 600.000 euros, pois eu comprendo que agora pretendan ou crean que os demais imos por un camiño que en absoluto é o seu camiño e o camiño que vostedes defenden, pero o que máis me sorprende é o Partido Socialista, non se pode ser máis hipócrita politicamente, dígollo de verdade Sr. Regades, é sinceramente increíble que coa hemeroteca que teñen vostedes as súas costas aínda por enriba queiran dicir algo, miren, o primeiro, se gañan vostedes e

conseguen esa moción de censura que non a van a conseguir, sería unha desgracia para España porque vostedes non teñen escrúpulos, porque a vostedes todo lles vale, pactar con independentistas con separatistas, pactar con Bildu, dálles igual, todo para que con oitenta e pico deputados conseguir o goberno de España, o que non lle deron os españois, vergoñento o Partido Socialista e vergoñento un Partido Socialista que o que fixo durante todos estes anos foi estafar a tódolos vigueses, no ano 2007 prometeron unha ampliación que non fixeron, 2008, 2009, 2010, promesas incumpridas e maquetas Sr. Regades, ese é o balance do Partido Socialista na ampliación de Rande, por certo, e outro balance o de deixar no Boletín Oficial do Estado, blindado que tiñamos que pagar esas obras con cargo ao incremento das peaxes, esa é a realidade, esa é herdanza envelenada do Ministro o Sr. Blanco, que por certo falando de pedir desculpas, que comece o Sr. Caballero por pedir desculpas, que siga o Sr. Blanco pedindo desculpas e os que son realmente responsables do que estamos agora neste momento aquí padecendo porque ao Sr. Caballero, non lle importaba todo o que había cando veu á inauguración de Rande, agora parece ser que parece que nunca estivo, non, estivo alí e estivo apoiando esa inauguración, por certo, que xa recoñecemos que foi inoportuna porque a partir de aí xerouse a expectativa de que as obras se remataran e as obras non se acabaron, polo tanto, o que queremos é en primeiro lugar que se acaben as obras, en segundo lugar, que se devolva os cartos e que non se cobre aos afectados e en terceiro lugar o que queremos é que siga gobernando o Partido Popular porque a alternativa Vigo-Porriño que tamén necesitamos só será unha realidade se segue gobernando o Partido Popular, se gobernan todos vostedes, desgraciadamente quedará outra vez na hemeroteca e en papel mollado como xa nos teñen acostumados.

PRESIDENCIA: A verdade non me sorprende nada, acepta a emenda.

SRA. MUÑOZ FONTERIZ: Xa dixen que si engadimos toda a ristra de pedir perdón o Ministro o Sr. Blanco, o Alcalde de Vigo, vostedes polo que lle fixeron a España, se comezamos a pedir perdón non nos chegan os folios.

PRESIDENCIA: Non acepta a emenda, procedemos á votación.

*(No momento da votación preside o 1º Tenente de Alcalde, Sr. Regades Fernández, por ausencia do Presidente).*

VOTACIÓN: Con nove votos a favor dos membros do grupo municipal do Partido Popular señores e señoras, Egerique Mosquera, Fidalgo Iglesias, Gago Bugarín, González Sánchez, Muñoz Fonteriz e Piñeiro López e máis dos membros do grupo municipal de Marea de Vigo, señores e señora, Jácome Enríquez, López Barreiro e Pérez Correa e catorce abstencións dos membros do grupo municipal Socialista, señores e señoras, Alonso Suárez, Aneiros Pereira, Blanco Iglesias, Caride Estévez, Fernández Pérez, Iglesias González, Lago Rey, López Font, Marra Domínguez, Pardo Espiñeira, Rivas González, Rodríguez Díaz, Rodríguez Escudero e a Presidencia, adóptase o seguinte,

ACORDO:

Aprobar a Moción presentada, en data 24.05.2018 (Rex. Nº 1773/1101), pola voceira do grupo municipal do Partido Popular, Sra. Muñoz Fonteriz, cuxo texto consta transcrito nos antecedentes deste acordo.

**6(81).- MOCIÓN DO GRUPO MUNICIPAL SOCIALISTA, INSTANDO Á DIRECCIÓN DA CRTVG QUE RECONSIDERE A SÚA DECISIÓN DE ELIMINAR AS DESCONEXIÓNS LOCAIS DA RADIO GALEGA, DEBENDO ATENDER A DEMANDA INFORMATIVA DOS VECIÑOS DE VIGO E A SÚA ÁREA DE INFLUENCIA. REXISTRO PLENO 1771/1101.**

ANTECEDENTES.- Por escrito de data de entrada no Rexistro do Pleno do 24 de maio de 2018, número 1771/1101, o voceiro do grupo municipal Socialista, Sr. López Font, formula a seguinte,

## MOCIÓN

“O mandato legal que rexe o funcionamento da Televisión e a Radio públicas de Galicia establece coma obriga destes medios de comunicación “cubrir as necesidades de información, educación, cultura e entretemento da sociedade galega, e contribuir a preservar o pluralismo nos medios de comunicación”. A lei aprobada polo Parlamento Galego é moi concreta ao sinalar que radio e televisión teñen unha función de servizo público que se inspira entroutros principios “na plena cobertura do conxunto do territorio”.

A decisión de suprimir da grella de programación os informativos locais que dende hai máis dunha década ven emitindo a Radio Galega supón un importante paso atrás no cumprimento das obrigas recollidas no mandato marco da CRTVG, que se suma a outras desafortunadas decisións executadas hai algúns anos coma foron o peche das delegacións da radio e a televisión en Pontevedra e Ferrol.

Os informativos locais constitúen un espazo de referencia para as persoas que viven nas bisbarras das grandes cidades do país, coma é o caso de Vigo. Neles atopan as noticias que lles son máis próximas, as voces das e dos actores máis cercanos a súa realidade; unha información que polas súas características non ten doado acomodo noutros espazos de contido máis xenérico dirixidos a grupos de poboación máis amplos.

A información local ofrécelle aos axentes sociais de ámbito local a posibilidade de facerse oír, axudando así aos medios públicos a atender o cometido de favorecer o pluralismo e o debate democrático e impulsar a participación. Eliminar os informativos locais supón poñer atrancos a que teñan eco nos medios públicos as actividades ou mensaxes de partidos políticos, organizacións sindicais e empresariais, asociacións veciñais e coletivos de calquera outra condición que actúan eminentemente no eido local. A supresión deses espazos reduce as posibilidades de que os axentes locais accedan ás canles públicas e limita o dereito dos cidadáns a ter acceso a unha información útil e necesaria sobre a cidade na que desenvolven a súa vida.

Por mor disto ao Pleno Municipal do Concello de Vigo propoñemos o seguinte:

### ACORDO:

- Instar á dirección da CRTVG que reconsidere a súa decisión de eliminar as desconexións locais da Radio Galega e instámoslle a afondar no deber de atender a demanda informativa dos veciños de Vigo e a súa área de influencia.”

### DEBATE:

SR. LÓPEZ FONT: A verdade é que neste Pleno a capacidade de sorpresa é absolutamente ilimitada e imos a tratar unha moción agora que choca novamente

coas marabillas que nos queren contar e que non se corresponden en absoluto coa realidade. Presentamos unha moción aos efectos de que o Consello da Radio Televisión de Galicia reconsidere a súa decisión de eliminar as desconexións locais da Radio Galega, o primeiro que hai que lembrar é que o mandato legal que rexe para a televisión e para as radios públicas de Galicia establece como obriga destes medios, literalmente e textualmente, cubrir as necesidades de información, educación, cultura e entretemento da sociedade galega e contribuír a perseverar o pluralismo nos medios de comunicación, esta Lei foi aprobada polo Parlamento galego e é moi concreta ao definir este servizo como servizo público, ademais co principio de buscar a plena cobertura do conxunto do territorio, polo tanto, ese concepto de servizo público e ese concepto de plena cobertura son os conceptos polos que non se entende esta decisión de suprimir da grella de programación os informativos locais que se veñen xa desenvolvendo dende hai unha década na radio galega e que foi un importante paso no cumprimento das obrigas recollidas nese mandato que mencionaba anteriormente pero é que esta decisión que creou alarma, indignación naquelas cidades onde se pretende suprimir estes informativos locais se engade a outras decisións desafortunadas tomadas anteriormente polas que se eliminaron as delegacións de radio e televisión nas cidades de Pontevedra e Ferrol, polo tanto, uns informativos que veñen dunha década, como dicía, uns informativos locais que constitúen un espazo de referencia para as persoas que viven nas comarcas das grandes cidades do país, como é o propio caso de Vigo, e nestes informativos locais teñen eco, se trasladan e teñen a súa razón de ser as noticias máis próximas e as voces dos actores máis preto a súa realidade que evidentemente tal e como están concibidos neste momento non teñen encaixe noutro tipo de espazos máis xenéricos dirixidos a grupos de poboación máis amplos, polo tanto, entendemos que esta información local que reitero vense facendo dende hai máis dunha década e a satisfacción de aqueles que a escoitan, ofrecen esta información, unha oportunidade imprescindible aos axentes sociais de ámbito local unha posibilidade de facerse oír, e ten o cometido de favorecer o pluralismo e o debate democrático e impulsar a participación, eliminar de raíz estes informativos locais supón poñer obstáculos, supón poñer dificultades para ceder aos medios públicos e para trasladar as súas mensaxes a partidos políticos, a asociacións sindicais, a organizacións



empresarias, a organizacións de veciños e a colectivos de calquera condición que actúan nese ámbito local que teñen cobertura a día de hoxe nos espazos dos informativos locais.

Polo tanto, estamos claramente nunha operación de censurar esta información, de intentar tapar esta información que dende o pluralismo chega a tódalas voces, aqueles que escoitan a Radio Galega. Polo tanto, como dicía ao principio e remato desta maneira o acordo que propoñemos á aprobación deste Pleno é moi concreto e moi conciso e é instar á dirección de Radio Televisión de Galicia que reconsidere a súa decisión de eliminar as desconexións locais de Radio Galega e instámoslle a fundar no deber de atender a demanda informativa dos veciños de Vigo e da súa área de influencia.

Non tomar en consideración este acordo que seguro que imos adoptar é como dicía ao longo da intervención intentar tapar a voz de tódolos axentes sociais que se fan eco a través destes informativos locais.

SR. PÉREZ CORREA: Nós estamos absolutamente de acordo con esta moción e completamente de acordo tamén porque temos falado con seccións sindicais e co Comité Intercentros do ente público e tamén porque é certo que o que estamos vivindo debería indignarnos cando menos aos tres grupos municipais que estamos aquí, porque neste mundo cada vez máis difícil de poder visibilizar as diferentes opcións políticas dentro dun espazo normal de comunicación e digo cada vez máis difícil porque cada vez interactúan máis os poderes económicos ou os gobernos tanto de concellos como autonómicos, deputacións provinciais que condicionan moitas veces non polos traballos profesionais dos medios de comunicación senón polo traballo dos seus xefes superiores, condiciona moitas veces a información, si que existía un servizo público de comunicación audiovisual, neste caso a parte que corresponde a Radio Pública que polo menos, ao longo de programacións diarias en determinadas franxas había unhas desconexións locais que permitían visibilizar a pluralidade, eu quero felicitar ao traballo e como grupo municipal Marea de Vigo agradecer que durante este tempo as traballadoras/es da Radio Galega adicaron o pequeno tempo que lle corresponda a este grupo municipal a visibilizar precisamente as cuestións que nós poñemos na política local que moitas veces noutros medios, sobre todo nalgúns medios escritos non se fai de carácter

análogo, pensamos que iso é o que diferencia un servizo público esencial como é a Radio Galega, é un desmantelamento absoluto dun servizo público, é exactamente igual que desmantelar a sanidade ou a educación, e é converter practicamente as portas, ou a uns meses das eleccións municipais, en un varrido completo por parte do Partido Popular de que esa pluralidade se poida dar no que é a precampaña electoral, o Partido Popular ten medo de perder e aínda máis poder municipal e que mellor maneira que de eliminar da grella dos medios públicos sobre todo nas conexións locais, para nós é evidente, coincide coa reflexión que tamén fixo o Comité Intercentro, pero tamén hai a eliminación dunha parte substancial dun servizo público que emitía en galego, a labor importante da normalización lingüística, que significa ter un servizo dende o ano 85 que emitía integramente en galego, cada vez teremos menos pluralidade e cada vez haberá menos noticias de carácter local en galego nos nosos medios de comunicación públicos e privados, cremos que tamén é un problema, por non falar da parte cultural, eliminar un magacín cultural que levaba 28 anos sendo referencial en tódalas cadeas da antiga Forta, non sei se segue chamando Forta, pero que son as canles autonómicas de todo o país, o magacín cultural que tiñamos nós o diario cultural era referencial na televisión vasca, catalá, en moitas televisións autonómicas que copiaron ese formato de magacín cultural, aquí se desmantela coa escusa de que a parte cultural xa a iremos metendo, imos converter o que son os informativos centrais os imos converter nun "totum revolutum" cunha pequena sección de noticias locais e cunha sección cultural, para nós é suficiente motivo para apoiar esta moción e creo que o Partido Popular sobre todo os seus grupos municipais en toda Galicia deberían pedirlle ao goberno do Partido Popular que reconsidere porque tamén é eliminar a pluralidade do seu traballo municipal e creo que é bo que aquí sacáramos un consenso das tres forzas políticas.

SRA. EGERIQUE MOSQUERA: A verdade é que eu vou defender este debate cunha dobre vertente, hoxe como concelleira por suposto do grupo Popular de Vigo pero como extraballadora dun centro territorial, de varios centros territoriais da CRTVG, de produtoras diferentes, adicada plenamente na miña traxectoria profesional á información local, exclusivamente case local, polo tanto, nós imos comezar dicindo que cremos que é imprescindible que se manteña a información local, cremos que

é un tema ademais, como expuxeron xa os demais voceiros importante para que se difundan as diferentes sensibilidades das áreas metropolitanas, dos concellos porque si é verdade que quizais o que pasa noutra área territorial máis ao norte ou máis ao leste que non nos quede tan próxima non nos interesaría tanto, o que pasa é que aquí hai que diferenciar varias cousas, ao Sr. Pérez diríalle que neste caso os tempos electorais porque falou de que isto é un arrase polo tema das eleccións, os tempos electorais están determinados por lei e eu tamén cubrín eleccións determinadas e traballando ademais con diferentes equipos directivos porque isto é un tema dunha reconsideración da programación por parte dun equipo directivo da CRTVG que hai que respectar, hai veces que nos gustan máis unhas programacións e outras veces que non, como servizo público temos e hai que ofrecer ese servizo aos oíntes e aos telespectadores pero moitas veces os equipos directivos son os que reconsideran as programacións, tamén en base as veces ás diferentes audiencias ou intereses, e nas eleccións e nos tempos electorais dos diferentes grupos políticos están medidos por lei, eu creo que iso non o pode saltar ningún equipo directivo dun medio público, polo tanto está garantida a presenza e despois o que é a desconexión local o que é, o contido é o que nós queremos defender neste Pleno, e queremos que saía deste Pleno municipal de Vigo o interese á reconsideración por parte da CRTVG da importancia da información local, porque si é verdade que eses 10 minutos, eses 20 minutos diarios son moi importantes para tódolos oíntes da radio galega do entorno da área metropolitana de Vigo. E tamén hai diferenza entre a reestruturación das delegacións que houbo que foi por un tema de reestruturación xeral da compañía e o que estamos a falar hoxe que é un tema de programación, e vai por tempadas, eu traballei como dixen antes con diferentes equipos directivos, con diferentes gobernos, é verdade que hai uns intereses ás veces por parte dos profesionais duns determinados programas e outras veces doutros determinados programas, é verdade ademais que dentro do propio ente pois hai persoas que teñen unhas afinidades diferentes pero no caso que nos ocupa, no tema da programación, eu quero reiterar aquí é unha petición por parte do noso grupo o respecto e ademais a defensa absoluta dos traballadores porque nós cremos que isto pode ser unha modificación en programación, que temos que adaptarnos moitas veces ao que a programación propia pode determinar en cada momento pero os traballadores que

sexan considerados sobre todo na área de Vigo.

Creo que é importante que queden claras tres cousas, unha defensa absoluta dos medios públicos, por suposto por todo o que se dixo aquí, pola defensa da lingua, pola importancia que hai de dar visibilidade a moitos colectivos que moitas veces moitos grupos políticos que doutra forma non terían visibilidade noutros medios, pola programación local, a programación local de proximidade que cremos que é fundamental e moi importante en calquera medio público, tamén nos outros pero sobre todo nos medios públicos que son os que nos teñen que garantir esa programación local e como dixen antes dos traballadores.

Quero tamén que quede constancia de que vai ser unha petición que xa é por unha moción pero que é unha petición do Pleno municipal de Vigo porque todos, os tres grupos estamos de acordo en que chegue este acordo como por unanimidade do Pleno municipal da Corporación para que se poida reconsiderar este tema, polo tanto, nós xa tamén asistimos á pregunta do grupo de Marea, unha pregunta do Bloque Nacionalista Galego, non temos ese grupo representación aquí no grupo Parlamentario e contestou tamén o Vicepresidente da Xunta de Galicia a algunha pregunta concreta, determinada polo propio goberno galego pero insisto, isto foi unha reconsideración do equipo directivo, e nós cremos que neste caso como nos afecta directamente, como sabemos a importancia que pode ter esta información local pois queremos que este acordo saía por unanimidade e que ademais os profesionais que temos xusto nesta área de Vigo e de Pontevedra, son profesionais, a verdade de moita calidade e que fan moitos esforzos moitas veces porque toda a información saía en tempo e forma e nos informativos locais que teñen un tempo moi limitado.

SR. LÓPEZ FONT: Mire Sra. Egerique, eu lle agradezo moito se van a votar a favor, pero da intervención o único que se desprende é un exercicio de hipocrisía e de cinismo político, inverteu vostedes 4 minutos para dicir e para dar a entender que se ven obrigados a votar a favor desta moción, pero para desvirtuar absolutamente o que aquí se pretende no texto da moción porque escoitándoa a vostede calquera que non soubese de que vai este tema, a conclusión que quitaría é “home están ante unha cuestión técnica, de equipos directivos, de outro tipo”, non Sra. Egerique esta é unha decisión política e se vostede traballou nos medios

de comunicación do que evidentemente nos fai aquí mención é vostede a primeira que debería sabelo e isto non é unha restructuración, isto non é unha reconsideración, non hai nada que diferenciar Sra. Egerique, nada, aquí hai unha utilización política dos medios públicos de radio e de televisión, e vémosla tódolos días, e se vostede é unha profesional disto eu lle fago a reflexión a que faga unha análise de como se trata na radio e televisión de Galicia a sentenza de Gürtel, seguro que para a súa profesión era un exercicio moi interesante. Polo tanto, é que de verdade, facer mención ao que me di, permítese vostede dicir, “hai que respectar aos traballadores”, esa frase illadamente queda fabulosa pero respectar aos traballadores Sra. Egerique é respectalos no seu traballo diario, é non impoñerlles o que teñen que dicir nin impoñerlles o tempo sobre o que teñen que falar dunha sentenza ou dunha información polo tanto esta é a realidade, por moito que se rían, por moito que me queiran contestar, esta é a realidade, vostedes con esta moción vense abocados, porque xa se aprobou na Deputación de Ourense, porque seguro que se aproba en moitos máis sitios pero ten vostede de verdade a hipocrisía de vir a falar de reconsiderar e de reestruturación, é dicir, escoitándoa a vostede a culpa disto a teñen os equipos directivos, manda truco, pero si esta é unha decisión política, e nos fala de tempos electorais, Sra. Muñoz tranquila, os tempos electorais os teñen que respectar, pero saben cal é o problema, que vendo a televisión e Galicia estamos sempre en tempo electoral do Partido Popular, sempre, eu o outro día fun a unha cena, estábamos cargos de todo tipo e só enfocaron aos representantes do grupo Popular, só, e a conclusión cando cheguei a casa me preguntaron, “pero ti estiveches nesta cena?” Por que solo saíron os do Partido Popular.

*(No momento da votación preside o 1º Tenente de Alcalde, Sr. Regades Fernández, por ausencia do Presidente).*

VOTACIÓN: Por unanimidade dos vinte e tres membros presentes da Corporación, dos vinte e sete que a constitúen de dereito e feito, adóptase o seguinte,

ACORDO:

Aprobar a Moción presentada, en data 24.05.2018 (Rex. Nº 1771/1101), polo voceiro do grupo municipal Socialista, Sr. López Font, cuxo texto consta transcrito nos antecedentes deste acordo.

**7(82).- MOCIÓN DO GRUPO MUNICIPAL SOCIALISTA, INSTANDO AO MUSEO DO MAR, DEPENDENTE DA XUNTA DE GALICIA, A PROCEDER DE FORMA URXENTE Á REPARACIÓN DO ACCESO PEONIL SITUADO NO ESPAZO INTERIOR DO MUSEO, DE ACCESO Á PRAIA DE A MOURISCA. REXISTRO PLENO 1775/1101.**

ANTECEDENTES.- Por escrito de data de entrada no Rexistro do Pleno do 25 de maio de 2018, número 1775/1101, o voceiro do grupo municipal Socialista, Sr. López Font, formula a seguinte,

#### MOCIÓN

“Como consecuencia dos efectos dos últimos temporais, produciuse un deterioro moi importante no acceso á Praia de A Mourisca desde o espazo interior do Museo do Mar.

Na práctica faise imposible acceder a devandita praia sen que meses despois procedeurase á reparación necesaria que posibilite o acceso nas condicións habituais.

Por mor disto, ao Pleno Municipal do Concello de Vigo propoñemos o seguinte

ACORDO:

-Instar ao Museo do Mar, dependente da Xunta de Galicia, a proceder de forma urxente á reparación do acceso peonil que se atopa no espazo interior de devandito Museo á praia de A Mourisca.”

DEBATE:

SR. REGADES FERNÁNDEZ: A verdade que hai uns días recibíamos a través do servizo telemático de queixas e de suxestións do Concello de Vigo unha carta dun

veciño da nosa cidade que se queixaba da rampa de acceso.

SRA. EGERIQUE MOSQUERA: Unha cuestión de orde, é que esta moción se presentou fora de prazo, 24 horas despois da Xunta de Voceiros e polo tanto, nós xa remitimos escritos, xa propuxemos que isto non é obxecto de debate nun Pleno que non foi á Xunta de Voceiros, polo tanto, cremos que non é obxecto de debate esta moción neste Pleno. O Sr. Secretario debería explicar isto.

SR. LÓPEZ FONT: A explicación é moi sinxela porque no escrito seu se fai alegación á realizaición da Xunta de Voceiros, primeiro, discrepar absolutamente coa interpretación que fan vostedes do Regulamento, pero hai algo peor aínda, discrepar da súa intencionalidade porque saben ou deberían saber porque esta mes realizouse a Xunta de Voceiros o xoves, realizouse por unhas circunstancias especiais, e da mesma forma que cando nun período normal chegamos á Xunta de Voceiros e poden estar alí fisicamente ou non as mocións non hai ningún problema, vostedes con este escrito e con esta proposta están actuando de mala fe porque o Pleno se debe de convocar o venres e as mocións están presentadas antes da convocatoria do venres e insisto que é un problema que vostedes queren converter nunha interpretación do Regulamento, primeiro, que non se axusta pero o que máis nos molesta é a mala fe á hora de propoñer isto, pero sabe por que o propoñen? Porque non queren falar de Zona Franca, porque non queren falar das mocións que lle propoñemos. Polo tanto, eu lles aconsello que actúen de boa fe e en aplicación do Regulamento porque hai ocasións, e non quero mencionalas nas que vostedes tamén se viron nestas situacións e os demais actuamos de boa fe.

SR. PÉREZ CORREA: Nós entendemos que se se nos di que hai un prazo de presentación das mocións, entendemos que se non é difícil para un grupo de tres, non debería ser para un grupo de 17, entendo que se se nos di un prazo para a presentación da mocións é certo que é un período, foi unha circunstancia dun cambio de día, pero tamén digo que sería bo para a democracia política, sería bo para evitar determinadas cuestións que están pasando coa presentación de mocións, que volvamos ao formato tradicional de presentar as mocións nas comisións e que teñamos tempo e que teñamos todos enriba da mesa e que

pasemos tódalas mocións que imos presentado os grupos polas Comisións Informativas a efectos de volver ao que foi tradicionalmente o funcionamento deste Concello.

PRESIDENCIA: Cun respecto escrupuloso á democracia e ás normas de convivencia que acordamos entre todos e o Regulamento que regula este Pleno, consultado ao secretario deste Pleno, habilitado nacional, e alto funcionario deste Concello nos di que a orde do día está perfectamente constituído co cal que procedamos a continuar co Pleno. Novamente este Pleno e este Presidente que neste momento está exercendo as labores deste Pleno pois di que se proceda.

SR. FIDALGO IGLESIAS: Sr. Regades, o secretario está aquí, é o garante, é un habilitado nacional, de que non se pisen os dereitos lexítimos dos grupos e queremos saber si esta moción presentouse ao día seguinte, queremos que o secretario o diga senón recorreremos aos tribunais para que nos digan cando hai que presentar as mocións.

PRESIDENTE: Sr. Fidalgo, as normas de convivencia e democracia marcan que hai unhas regras que todos temos que cumprir, ata o Partido Popular, e eu lle digo unha cousa, vostede cando quere ir ao xulgado vaia, pero lle imos gañar nas urnas e no xulgado, en todos lados.

Orde do día do Pleno do Concello de Vigo, consultado ao secretario e así constará en acta, o secretario di que cumpre toda normativa, os regulamentos.

Procedamos por instrución do secretario dicindo que a legalidade da orde do día é pleno, co cal procedamos ao debate do punto 7. O que é tremendo é o nerviosismo que ten o Partido Popular pero non me estraña, miúdo mes e ano lle están dando á sociedade española, cando non ten que dimitir a presidenta dunha comunidade, ten que dimitir un presidente do goberno de España cousa que non fai, que é o único sitio e Europa, dun país de Europa que un partido político é acusado de corrupción, acusado de mentir e non se toma ningunha medida, non se marcha e non se vai. Eu creo que as mocións no Partido Popular e as dimisións no Partido Popular non existen, pero o que di o punto da orde do día é que facemos con esta rampla que é competencia da Xunta de Galicia, é a Xunta de Galicia a que non fai



nada na cidade e Vigo, seguramente non fará nada en ningunha cidade de Galicia, pero a nós neste Pleno o que nos preocupa é o que non fai na cidade de Vigo, entón un cidadá diríxese a este Concello e nos di o grado de abandono que está o Museo de Mar, os seus accesos e o acceso á praia. Este veciño, nós remitimos a carta ao conselleiro responsable do Museo do Mar, á Xunta de Galicia sen que ata día de hoxe tivésemos ningunha notificación. Levamos facendo reclamacións desta situación, desta rampla de acceso á praia dende o Museo do Mar dende hai 3 anos, sen que teñamos ningunha resposta por parte da Xunta de Galicia, pero o peor de todo é que nin fai nin deixa facer, a Xunta de Galicia tomou, Sr. Gago, eu lle rogaría que gardase silencio, se ten que comentar algo co súa compañeira vaise un segundo fora, comentano e despois entran senón é difícil que o resto da xente poida escoitar as intervencións, eu solo facer así para todos Sr. Piñeiro, e eu creo que todo o mundo que me coñece e que ten visto como presidimos este Pleno dáme a razón, pero o que nos ven ao caso, o Museo do Mar e a a rampla e non acción da Xunta de Galicia, eu creo que temos que cambiar de actitude por parte do Partido Popular e da Xunta de Galicia porque este modelo de non facer na cidade de Vigo, de boicotear todo o que facemos na cidade de Vigo non lles funciona, de 13 concelleiros pasaron a 7, de 7 segundo as enquisas van pasar a 4 e vostedes seguen sen cambiar a actitude, se creen que o hai que facer e seguir boicoteando as accións da cidade, eu creo que coa cidade vostede non van a poder e a cidade váiselle poñer en contra, e se fará esa rampla porque lle esixiremos que fagan esa rampla, ese acceso á praia porque non entendemos nada, vemos xa que temos un Museo sen orzamento, vemos que temos un Museo do Mar sen ningún tipo de organización, abandonado, pero tamén a contorna abandonada, tamén os accesos abandonados, eu creo que o Partido Popular ten que cambiar a campaña de non facer nada por Vigo e comezar a facer cousas en Vigo, seguramente así non lle irá mellor electoralmente pero si lles irá mellor no ámbito ético e moral porque se mirarán vostedes realizados vendo como colaboran en axudar a esas mulleres e a ese homes, veciños/as que depositaron a súa confianza en vostedes para defender á cidade non para atacar á cidade, e vemos que nestes momentos de forma reiterada están atacando á cidade. Eu estou convencido que esta moción vai saír aprobada por unanimidade porque é unha moción moi sinxela, lle dicimos incluso que seguramente debido aos temporais,

debido ao mal tempo e ás mareas, produciuse unha desfeita moi importante no acceso a esta praia de Mourisca, á praia que está na contorna do Museo do Mar, e este acceso dende o Museo do Mar, por iso lle dicimos que este Pleno lle inste ao Museo do Mar, dependente da Xunta de Galicia, a proceder de forma urxente á reparación do acceso peonil que se atopa no espazo interior do devandito museo e que accede á praia de Mourisca.

SR. PÉREZ CORREA: Obviamente calquera persoa que teña pasado recentemente por aí ve o estado lamentable, nós temos dúbidas de quen é a administración que ten facer esta actuación, eu podo entender que o Museo do Mar é unha entidade que depende da Xunta de Galicia pero estamos falando tamén dun dominio marítimo terrestre, dun camiño de servidume á praia que podería ter tamén e sabendo ademais que é o último deslinde que se fixo ía dende Redondela precisamente a esa praia pois poda haber algunha competencia estatal, eu pediría que polo menos dende o Concello a efectos de a que administración lle corresponde facer ese acceso, que eu creo que tiña que ser colaborativo, que tamén o Concello de Vigo ten responsabilidade, por exemplo en materia de servizo de salvamento en praias e sería bo tamén ter un acceso digno, creo que lle interesa tamén ao Concello de Vigo no caso de que haxa un accidentado nesa praia pois por exemplo, un equipo médico o tería moi difícil con ese acceso, en todo caso que se clarexe a efecto de dominio marítimo terrestre, incluso de afectación do Porto de Vigo, do Plan non sei se o Plan de usos pero polo menos si que as delimitacións de responsabilidade do Porto de Vigo, pois non sei se tamén entraría esa responsabilidade, pero que en todo caso que clarexe porque nós temos dúbidas e non será unha responsabilidade do Ministerio de Fomento a través de que iso forma parte do deslinde do dominio público marítimo terrestre.

SRA. EGERIQUE MOSQUERA: Nós queremos seguir insistindo no incumprimento reiterado do Regulamento, a regras do xogo están enriba da mesa e temos que realizar este Pleno e os demais Plenos porque temos outros exemplos, tamén como puido ser na realización do Pleno de proclamación da Área Metropolitana, no cambio dos estatutos do Marco de Vigo, é dicir, nós queremos que regras de xogo están enriba da mesa, teñen vostedes maioría absoluta, por suposto, pero non

teñen un absolutismo e nós agora, o meu compañeiro acaba de dicir a ver se temos que ir aos tribunais, pois ao mellor temos que ir aos tribunais, porque nos temos que cumprir as regras do xogo para que os grupos políticos representados no Pleno de Vigo teñan a cantidade de concelleiros que teñan, teñan as mesmas condicións, porque vostedes esixiron Sr. Font, que as mocións as presentásemos antes das 11,30 do xoves, non poña vostedes de pretexto que non foi o venres, porque claro cambiou o día, non valen os pretextos, as excusas, entón vou ler o artigo para que conste en acta o artigo 54.9 “Mocións de control. A moción de control é a formulación dunha proposta de actuación destinada a instar, impulsar, orientar, fiscalizar ou reprobado a acción política ou administrativa de órganos de goberno do Concello de Vigo ou actuacións, ou propostas de actuación doutras administracións públicas que teñen incidencias nas aspiracións e satisfacción dos intereses da comunidade veciñal do Concello de Vigo, as mocións presentaranse ben na reunión da Xunta de Voceiros que coñeza da orde do día da sesión que pretendan incluírse, ben no rexistro do Pleno en calquera momento anterior á reunión da Xunta de Voceiros.”

PRESIDENCIA: Ese punto xa foi debatido, tense que centrarse e ceñirse á moción.

SRA. EGERIQUE MOSQUERA: Centrareime nas mocións que estean incluídas na orde do día de maneira legal.

PRESIDENCIA: Se vostede non se centra na moción volve retirar o tempo.

SRA. EGERIQUE MOSQUERA: Estou falando da moción, que está mal presentada, estou falando desa moción non de outra.

PRESIDENCIA: Vólvolle dicir, a orde do día xa foi aprobada.

SRA. EGERIQUE MOSQUERA: Dígolle unha cousa, se vostede mete ademais esta moción fora de prazo, de tapadillo, para falar, para poñer de pretexto do éxito do Museo do Mar porque vai como un tiro porque esa rampla é cuestión de arranxo do Concello, pois entón vostedes verán, agora nos cremos que o principal é que todos

teñamos as regras do xogo sobre a mesa e as cumpramos, iso é o principal, despois debateremos e haberá discrepancias políticas como ten que ser, pero a maioría absoluta non pode ser un auténtico absolutismo que é o que estamos a vivir neste Pleno e neste Concello.

SR. REGADES FERNÁNDEZ: A verdade é que eu xa non entendo nada, porque eu entendo que este equipo que vai gañando por goleada se lle poida cuestionar e dicirlle é que corren moito, é que están fisicamente mellor, é que traballan máis, pero que esteamos cuestionando neste momentos as regras do xogo, iso si que non o podo entender por unha sinxela razón, de que a maioría absoluta non se está exercendo para dicir se esta orde do día é legal ou non legal, estamos dicindo que o árbitro, que é o habilitado nacional que é o secretario deste Pleno acáballe de dicir a esta presidencia, que este Pleno, esta orde do día, é completamente legal, a verdade que eu non dou crédito pero iso é así como fai o Partido Popular, se perde o partido, a culpa é do árbitro, se suspende o exame, a culpa é do profesor, non, hai que estudar máis e hai que traballar máis e lle digo o que lle dicía antes, que estamos tan seguros do que facemos que cando queiran que vaian ao xulgado, agora iso si, non se mal usen os recursos públicos porque xa lle digo, gañamos aí afora, gañamos nas urnas por goleada e gañamos no xulgados por goleada.

PRESIDENCIA: O secretario di que o grupo municipal do Partido Popular que se posicionen nesta moción porque o que é ilegal é non posicionarse, pero vostedes como a lei a constitúen e a entenden a súa maneira, pois fagan o que queiran.

*(No momento da votación preside o 1º Tenente de Alcalde, Sr. Regades Fernández, por ausencia do Presidente).*

VOTACIÓN: Por unanimidade dos dezaseis membros que manifestaron o seu voto, dos vinte e dous membros presentes da Corporación e dos vinte e sete que a constitúen de dereito e feito, adóptase o seguinte,

ACORDO:

Aprobar a Moción presentada, en data 25.05.2018 (Rex. Nº 1775/1101), polo voceiro do grupo municipal Socialista, Sr. López Font, cuxo texto consta transcrito nos antecedentes deste acordo.

**8(83).- MOCIÓN DO GRUPO MUNICIPAL SOCIALISTA, INSTANDO AO MINISTRO DE FOMENTO E AO PRESIDENTE DA XUNTA DE GALICIA A PEDIR PUBLICAMENTE DESCULPAS AOS MILES DE CIDADÁNS ATRAPADOS NAS RETENCIÓNS DE RANDE, INSTÁNDOLLES Á ADOPCIÓN DUN PLAN DE PREVENCIÓN DE ATASCOS. REXISTRO PLENO 1776/1101.**

ANTECEDENTES.- Por escrito de data de entrada no Rexistro do Pleno do 25 de maio de 2018, número 1776/1101, o voceiro do grupo municipal Socialista, Sr. López Font, formula a seguinte,

#### MOCIÓN

“Dende a enganosa e falsa inauguración da Ponte de Rande, a finais de decembro de 2017, como consecuencia das obras sen remate viñéronse producindo continuas retencions e atascos.

Sería larguísimo mencionar os moitos días que isto ocorreu. As viguesas e vigueses e o resto de cidadáns víronse atrapados en retencions, sen posibilidade de escapar, por espazo de horas co conseguente prexuízo para as súas ocupacións e enriba, ao non levantar os peaxes, teñen que abonar as tarifas coma se o servizo fose impecable.

Ante esta situación e xa cinco meses despois, dende o Ministerio de Fomento e dende a Presidencia da Xunta de Galicia non se adoptou ningunha medida nin se tivo a consideración de pedir públicamente desculpas aos milleiros de cidadáns afectados.

O clamor de toda a sociedade contra esta situación e ante a falta de adopción de medidas foi total. É incomprendible a falta de resposta do Ministerio de Fomento e da Xunta de Galicia ante a indignación xeralizada. Ata a propia Fiscalía abriu

dilixencias polo "deficiente funcionamento".

Fronte a esta situación, o Alcalde de Vigo dirixiuse por carta ao Ministro de Fomento, ao Presidente da Xunta e á Concesionaria urxiendo á adopción de medidas con carácter inmediato.

Por mor disto, o Pleno Municipal do Concello de Vigo propoñemos o seguinte

ACORDO:

-Instar ao Ministro de Fomento e ao Presidente da Xunta de Galicia a pedir públicamente desculpas aos miles de cidadáns que se viron atrapados nas larguísimas e reiteradas retencions que se produciron en Rande, por non adoptar ningunha medida durante os últimos cinco meses.

-Instar ao Ministerio de Fomento, á Xunta de Galicia e á Concesionaria á adopción inmediata dun Plan de Prevención de Atascos. En devandito Plan deben fixarse os momentos de risco de retención o transmitir por todos os medios posibles a situación aos usuarios. Tamén debe contemplar devandito Plan que, en caso de atascos, procédase de forma inmediata a levantar os peaxes e que as obras necesarias de realizar efectúense nos momentos de menor densidade de tráfico."

DEBATE:

SR. REGADES FERNÁNDEZ: A verdade que o que estamos a sufrir na Ponte de Rande tódolos usuarios é unha forma de facer política inxustificable por parte dos gobernos do Partido Popular, porque é un servizo público e unha concesión pública que ten un responsable político por iso nós neste Pleno queremos facer unha esixencia política e de responsabilidade, porque cremos que en política non vale todo, non entendemos que o Partido Popular non diga agora que eles xa lle solicitaron, lle mandaron unha carta ao concesionario para dicirlle o que tiñan que facer porque non hai que mandarlle unha carta ao concesionario cando se goberna, hai que mandarlle unha carta ao goberno e esixirlle que cumpra e cando somos socios dese goberno ou ese goberno ten a nosa cor política, debemos esixirlle a esa cor política que execute e que dunha vez por todas tome cartas do que está a pasar, porque vostedes din que mandaron unha carta dicindo que levantarán as barreiras cando houbera atascos, que as obras se fixeran de noite e

que planificaran as obras, días despois de que se mandara esa carta non se fixo nada de nada, co cal iso simplemente é un parche á cidadanía, ante a opinión pública pero o que están ocultando vostedes é a gravidade da situación. Esa gravidade que o Fiscal Provincial xa foi quen de detectar e de pedir responsabilidades. Eu a verdade lle pido a tódalas veciñas/os que garden tódolos tiquets dos atascos que levan vivindo nos últimos meses na Ponte de Rande, porque a xustiza nos dará a razón e terán que devolver a tódolos cidadás eses cobros indebidos que está facendo o Partido Popular nas autoestradas, na AP-9, porque é quen o goberno de España de esixir que se cumpran. E tamén o que ten que velar polo cumprimento é o Sr. Feijóo, o Presidente da Xunta de Galicia xa que é o Presidente de tódolos galegos e este ultraxe se produce nunha ponte que está na comunidade autónoma de Galicia. Unha ponte que está unindo unha área tan importante como é a área de Vigo e a área de Pontevedra. O Partido Popular ten que esixirlle responsabilidades políticas, e temos que conseguir que lle pidan perdón a tódalas mulleres e homes que estiveron horas e horas atascados na Ponte de Rande, porque non é explicable e non son atascos menores senón que son atascos superlativos, na maioría dos casos eses atascos chegan ata os túneles da Madroa en ningún momento se levantaron as barreiras, en ningún momento se fixo ningún tipo de notificación.

Eu lles digo máis, eu lles digo que se o Partido Socialista estivera gobernando, estaría actuando nestes momentos e tomaría 4 medidas básicas, a primeira, pediría perdón por estes atascos e estes danos que está ocasionando as mulleres e homes da provincia de Pontevedra, a segunda medida, levaría as barreiras de forma automática durante as obras pero non sería unha solicitude, sería unha orde á empresa concesionaria. A terceira medida, retrotraeríamos as subidas que se fixeron na peaxe, non se pode subir nin un só céntimo a peaxe mentres esta situación se estea a vivir na Ponte de Rande. A cuarta medida, é ter un plan de obras, que os alcaldes da área nestes momentos non teñen un plan de obras do que está acontecendo da zona de Rande. A quinta medida, impulsar de forma contundente a autovía alternativa entre Pontevedra, Porriño, polo alto de Puxeiros, unha alternativa real, e os gobernos cando falamos de alternativa real é cando a metemos nos orzamentos, cando a metemos nos orzamentos e licitamos a obra, de momento todo promesas, falsas promesas, eu lle dicía antes e llo digo, nós que

temos a cargo concesionarias, facemos os feitos e exixímoslle medidas oportunas; cando chegamos a este concello o prezo do coche/quilómetro de Vitrasa estaba a 4,73 céntimos, baixámolo un 15%, baixámolo a 4,09 céntimos o prezo do coche/quilómetro de Vitrasa, iso supón un aforro de máis de 500.000 euros, pero tivemos aforros en tódalas concesionarias, na de limpeza, na de xardíns, na do lixo, na da hora, na do Vitrasa e todo isto sen ter que sufrir o persoal xa que se mantiveron tódalas garantías sociais.

SR. PÉREZ CORREA: A nós non gusta o concepto de perdón en política, porque cremos que non é o concepto que se ten que utilizar en política, senón pedir responsabilidades, nos parece bastante mellor que a categoría de perdón que moitas veces que é cristiá e que ten que ver na Biblia é deixar pasar e nos consideramos que aquí non hai que deixar pasar absolutamente nada, precisamente o que hai que asumir é responsabilidades que é o que nos gustaría que colectivamente o Partido Popular e o Partido Socialista asuman, porque eu, non temos excesivamente tempo para ler e volvemos outra vez a ese convenio asinado polo Partido Socialista no que di “sistema de compensación do investimento feito e de maior custe da conservación da autoestrada da AP-9, como sistema de compensación polo investimento feito”, é dicir, unha obra pública que fai unha empresa privada, unha concesión que logo repercute o prezo “así como polas demais obrigas que Audasa asume en virtude do presente convenio, é dicir, totalidade dos investimentos necesarios para a execución de obras e a súa posterior conservación e explotación se establece un incremento extraordinario de tarifas nos percorridos por pago directo para os usuarios da AP-9, en tódolos seus tramos do 1% anual acumulativo durante 20 anos”, é certo que existían outras fórmulas de financiamento, poderían ser directamente dos Orzamentos Xerais do Estado, o Partido Socialista decidiu que anotarnos durante 20 anos o pago das obras a través do que pagamos os cidadáns directamente cada vez que pasamos por unha peaxe, polo tanto, estaría ben tamén asumir se imos a ese concepto cristiá do perdón, pois tamén asumir a parte de erro garrafal do Partido Socialista de ter consignado unha ampliación necesaria dunha ponte, a unha fórmula de colaboración público-privada que dende logo vai a facer que a asumamos durante 20 anos independentemente do que suba o IPC que xa vai directamente nas tarifas



e ese 1% durante 20 anos, se estamos dispostos a buscar outro sistema eu xa digo que vostedes con este formato xa no momento que vaimos a un rescate da concesión, xa hai que sumarlle 300 millóns de euros que foi o investimento das diferentes actuacións que comporta este convenio e que dende logo a concesionaria que é bastante experta en denunciar ás administracións, dende logo vai querer cobrar, polo tanto, tamén o rescate desta concesión que cremos que é a única solución, o Partido Popular rescata sen ningún tipo de tapuxos e ningún tipo incluso de pudor, a radias de Madrid, a autoestradas quebradas por toda España e por que non rescatar precisamente á que si é rendible, que ten un tráfico importante e á que, poderíamos gradualmente ir eliminando e convertendo nunha autoestrada gratuíta, por que non o facemos? Iso é un debate que dende logo hai que abri-lo. A nós non nos gustou o sistema de construción e o sistema que está neste convenio, 20 anos amarrados cun 1% lineal, é certo que as cuestións das obras, aquí pon 36 meses, pero tamén pon que esa subida sería a partir do final da obra, é dicir, se esa obra rematara en decembro, a partir de xaneiro se aplicaríase ese 1%, é certo que di, ou polo menos da información que nos traslada a voceira do Partido Popular, non se está cobrando ese 1%, pero se cobrará. Polo tanto, nós pensamos que a orixe do mal está no sistema concesional que o Partido Socialista no seu día, podemos entender coa escusa da situación económica que non se podía financiar a obra pública a través dos Orzamentos Xerais do Estado que é a mesma escusa que o Partido Popular utilizou para facer un hospital privado nesta cidade. Polo tanto, cando o Partido Socialista se encha de buscar analoxías con respecto do hospital, pois saibamos tamén que no seu día o Partido Socialista utilizou ese sistema de financiamento que para nós debería de ser 100% vía Orzamentos Xerais do Estado, agora temos este petate, solucionémolo, se hai un compromiso de pedir que se elimine as peaxes no tramo de obras, asumámolo como pleno, pero tamén é iso é un mandato, seguramente non é deste Pleno, pero se hai un futuro goberno socialista, creo que é bo tamén que haxa compromisos de rescatar e nacionalizar directamente a AP-9 e poñela unha vez nacionalizada, a disposición dos galegos e non bloquear, como fai o Partido Popular na Mesa do Congreso de Deputados, esa transferencia solicitada por unanimidade polo Parlamento de Galicia, nós estamos de acordo coa moción pero nós gustaría que se pediran responsabilidades políticas, a cuestión do perdón, como dicimos nós, é

bastante subxectiva.

SR. FIDALGO IGLESIAS: Sr. Presidente, nesta moción non imos entrar no fondo porque esta moción consideramos que non se debería de incluír na orde do día, que é ilegal porque se está a manipular o Regulamento do Concello e, estamos cansados e fartos de que aquí se faga o que a un lle dea a gaña porque ao Presidente desta corporación dálle a gaña, entón, queremos que señor secretario nos diga, se lle van deixar falar, se esta moción foi presentada un día despois da Xunta de Voceiros e como foi presentada un día despois da Xunta de Voceiros vostedes poden presentala por urxencia ou deixala para o Pleno que ven, pero o que non poden facer é presentar neste Pleno, porque iso nolo fixeron a nós varias veces, dúcias de veces, vostedes teñen 17 concelleiros se esqueceron de facer a moción da AP-9 como viron que nós presentamos unha moción da AP-9 ao día seguinte presentan unha pero a presentan fora de prazo, non pasa nada, débátese no Pleno seguinte ou se queren se debate por urxencia pero non pode estar incluída onde está, na orde do día e por iso lle preguntamos ao señor secretario se lle deixan falar, que nos gustaría escoitalo para saber si isto é legal e é conforme ao Regulamento ou non.

SR. REGADES FERNÁNDEZ: A verdade que non me estraña as artimañas do Sr. Fidalgo, eu creo que todos as coñecemos. Eu tamén entendo que non queiran falar porque tiñan que estar avergoñados e están avergoñados, por iso buscan escusas, buscase o profesor tenme manía e non me deixa falar, non, o profesor non lle ten manía, vostede non estudou e como non estudou suspende, Sr. Fidalgo, é responsabilidades políticas si, eu comecei a miña moción explicativa dicindo que nós esixíamos responsabilidades políticas e cando falábamos da prórroga señores do grupo de Marea, deben de estar un pouco despistados porque a prórroga sucedía mentres Galicia estaba inundada polo chapapote, naqueles meses o Sr. Aznar facíalle unha concesión de máis de 40 anos a esta concesión, e non só lle facía unha concesión senón que pasaba dunha empresa pública a unha empresa privada, da empresa pública que herdara do Partido Socialista a transformaba nunha empresa privada e a quitaba a concesión dándolle 45 anos de forma gratuíta sen ningún tipo de esixencias, iso é o que fai o Partido Popular e como di a miña

compañeira e mentres tanto o Sr. Feijóo aplaudindo, porque é o que fai nestes casos dálle as costas a Vigo, a Galicia e neste caso dálle as costas a toda a provincia de Pontevedra. Xa lle dicía noutra ocasión que o financiamento tiña dúas opcións, opcións A que fora en tarifa e a opción B que fora dos Orzamentos Xerais do Estado, se nós estivéramos gobernando sairía dos Orzamentos Xerais do Estado, sairía da hucha común, como nós non estamos a gobernar, o Partido Popular o que decidiu foi gravar as autoestradas de Galicia máis rendibles e como xa temo dito en máis dunha ocasión, saben vostedes cal é o tramo da autoestrada máis caro de toda España? O túnel de Guadarrama, o segundo máis caro de toda España, este, a AP-9, o acceso a Vigo, esa é autoestrada máis cara de toda España e os señores do Partido Popular rin, pois eu non lle miro a risa, eu pido responsabilidades políticas e pido que pidan desculpas porque a cidadanía estivo sufrindo durante moitos meses estes atascos e como dicía a Sra. Muñoz atascos que non eran recorrentes, atascos permanentes Sra. Muñoz, permanentes e constantes, a todas horas do día e da noite, e a cidade se move, e vai seguir esixíndolle ao goberno do Partido Popular no tempo que lle quede que faga estas medidas porque nós así as faríamos.

VOTACIÓN: Por unanimidade dos dezoito membros que manifestaron o seu votos, dos vinte e catro membros presentes da Corporación e dos vinte e sete que a constitúen de dereito e feito, adóptase o seguinte,

ACORDO:

Aprobar a Moción presentada, en data 25.05.2018 (Rex. Nº 1776/1101), polo voceiro do grupo municipal Socialista, Sr. López Font, cuxo texto consta transcrito nos antecedentes deste acordo.

PRESIDENCIA: Tódolos votos emitidos foron a favor. Emitíronse 16 votos e dous votos, un dos membros de Marea de Vigo non estaba presente e non votou, e todos os votos a favor, e polo tanto, queda aprobado por unanimidade.

**9(84).- MOCIÓN DO GRUPO MUNICIPAL SOCIALISTA, MANIFESTANDO O REXEITAMENTO Á INCLUSIÓN NA LEI DE ORZAMENTOS DO ESTADO 2018, DUNHA DISPOSICIÓN QUE OBRIGA Á ZONA FRANCA DE VIGO Á ACHEGA PARA FINANCIAR A OUTRAS ZONAS FRANCAS DO ESTADO, E OUTROS ACORDOS COMPLEMENTARIOS. REXISTRO PLENO 1777/1101.**

ANTECEDENTES.- Por escrito de data de entrada no Rexistro do Pleno do 25 de maio de 2018, número 1777/1101, o concelleiro do grupo municipal Socialista, Sr. Aneiros Pereira, formula a seguinte,

MOCIÓN

“O Consorcio da Zona Franca de Vigo é un dos axentes de desenvolvemento económico local e de xestión da zona franca de comercio internacional máis importantes do noroeste peninsular e de todo o Estado. A súa creación, por Decreto de 1947, veu a establecer en Vigo un importante polo de desenvolvemento industrial e, porén, económico que so tiña comparación coas xa establecidas en Barcelona e Cádiz.

Dende entón, a Zona Franca de Vigo destaca pola súa relevancia como infraestrutura de apoio ao comercio internacional e como ente solventes e autosuficiente que ten, na súa norma de creación e funcionamento, a obriga de trasladar unha parte dos beneficios económicos ao entorno no que están implantadas.

Neste sentido, o Decreto Lexislativo 1/1999 atribúe á Zona Franca de Vigo unha parte da recadación do Imposto sobre Sociedades das empresas establecidas no seu ámbito territorial. Esa financiación adicional, que no 2016 foi de 10.7 millóns e no 2015 de 28.5 millóns, está vinculada nun 75 % do seu importe a inversións.

O Goberno do Partido Popular, ademáis de dotar deste mesmo recurso ás demais Zonas Francas do Estado, incluiu no articulado da Lei de Orzamentos Xerais do Estado para 2018 unha Disposición Adicional Quincuaxésimo Sexta pola que se crea o Fondo de Compensación dos Consorcios da Zona Franca que se financiará coas aportacións dos Consorcios con resultados positivos como é o caso do de Vigo.

Sen perxuizo da solidaridade entre as distintas partes do territorio estatal, o certo é que o importe da aportación ao devandito fondo é elevado e suporá na práctica unha merma de recursos públicos, de fondos, para inversións en Vigo en na súa Área para paliar problemas derivados das decisións do Goberno central en relación con outras zonas francas.

As necesidades de chan industrial de Vigo, de investimentos na cidade e na súa Área, de financiación de proxectos que cofinancia Zona Franca de Vigo, de facilitar un entorno propicio para o emprendemento, de mitigar os efectos da competencia desleal que provoca decisións de deslocalización das empresas se verán afectados si os recursos da nosa zona franca se destinan a sufragar o custo das malas decisións do Goberno de Rajoy, máxime nun momento como o actual no que Galicia e Vigo presentan un atractivo loxístico derivado do crecemento do transporte marítimo, das novas rutas derivadas da apertura do Canal de Panamá, da conexión entre portos internacionais a través das autoestradas do mar e da recuperación económica que lidera a construción naval da cidade e o resto de empresas.

Por mor disto ao Pleno Municipal do Concello de Vigo propoñemos o seguinte:

#### ACORDO:

Primeiro. Manifestar o rexeitamento á inclusión na Lei de Orzamentos do Estado para 2018 dunha Disposición que obriga á Zona Franca de Vigo a aportar un elevado importe de euros para financiar ás zonas francas doutras zonas do Estado. A solidariedade non debe implicar o vaciamento de recursos propios e necesarios e, en todo caso, a aportación coactiva ao Fondo non debería superar o 4% do recurso financeiro que se percibe por parte do Consorcio.

Segundo. Instar ao Goberno de España e ao Ministerio de Facenda a que rectifique a fórmula de cálculo establecida na Lei de Orzamentos e manteña o importe do recurso financeiro asignado á Zona Franca de Vigo de xeito que se destine a inversións que mellore o tecido productivo, económico e social de Vigo así como as infraestruturas necesarias para o desenvolvemento da nosa Área.”

#### DEBATE:

SR. ANEIROS PEREIRA: Neste caso para rexeitar enerxicamente unha medida que o aínda goberno do Partido Popular incluíu no Proxecto de Orzamentos Xerais do Estado para este ano 2018, por certo un proxecto de Orzamentos para 2018 que chega xa a metade do ano polo tanto, que chega tarde para a cidadanía pero un proxecto que continúa nesa liña que marca o Partido Popular, non só xa en Galicia, no ámbito do goberno do Sr. Feijóo, senón tamén en España, que pretende que o goberno do Partido Popular invita pero paga sempre Vigo. Miren, as zonas francas que é do que trata a moción, son un importante instrumento para o comercio, especialmente para o comercio internacional porque favorece un establecemento de empresas, favorecen o establecemento de fábricas como as que temos en Vigo,

especialmente ao do grupo PSA, pero favorecen tamén a comercialización de mercadorías e sobre todo as actividades de loxística internacional e tamén nacional de mercadorías porque para iso están creadas, son en definitiva en termos fiscais un almacén en réxime suspensivo dos impostos pero o que importa á cidadanía é que as zonas francas son un axente de desenvolvemento do ámbito no que están implantadas, son un importante axente dinamizador da economía e do investimento na cidade nas que están implantadas.

Isto deriva de que a súa norma de creación que establece a necesidade de trasladar a esa cidade na que están implantadas, eu entendo o nerviosismo do Partido Popular porque non lle gusta que falemos dos temas que interesan a Vigo e a cidade, porque como dicía unha das obrigas que ten a Zona Franca é trasladar ás cidades nas que están implantadas o 75% dos recursos que recibe, mire, os datos son claros, no ano 2015 os recurso financeiro que recibiu a Zona Franca foi de 28,5 millóns de euros, no ano 2016, despois dun cambio na fórmula pola porta de atrás, a Zona Franca, segundo as súas contas anuais publicadas no Boletín Oficial do Estado, recibiu dez millóns de euros, polo tanto, xa recibimos un primeiro machazo nos recursos que tan a Zona Franca de Vigo para investir na cidade. Así o reflicte por exemplo, un titular do xornal de Faro de Vigo do 8 de xaneiro deste ano, do 2018, non que xa fai referencia a que a Zona Franca de Vigo sofre ese primeiro recorte do goberno do estado, pero non contentos con isto, como dicía no proxecto de Lei de Orzamentos Xerais do Estado para este ano xa en curso 2018 o que fai o goberno do aínda goberno do Partido Popular, esperemos que ata dentro de pouco, esperemos que o venres teñamos un novo presidente do goberno, limpo, sen casos de corrupción detrás, sen enganar nas súas declaración nos tribunais, na Audiencia Nacional, un goberno limpo, respectable que faga país, despois dese cambio o que temos actualmente que é o proxecto de Lei de orzamentos para 2018, contempla non só a sinalización do recurso que recibe a Zona Franca de Vigo a outras zonas francas, senón que tamén que as zonas francas especialmente a de Vigo, ten que contribuír a un fondo común co resto das zonas francas do Estado para achegar entre un 4 e un 12% dos seus beneficios para financiar as zonas francas deficitarias que foron por certo creadas polo goberno do Partido Popular. Isto significa que a cidade de Vigo, a Zona Franca de Vigo vai ser expropiada dunha boa parte dos seus recursos para adicar eses recursos a soste outras zonas

francas que non son rendibles e que son deficitarias. En definitiva imos menor nivel de recursos para os investimentos na cidade que necesita o noso tecido produtivo nun contexto de internacionalización das economías e das empresas que precisamente de instrumentos de apoio para que as empresas sexan competitivas a nivel internacional, infraestruturas de apoio a esas infraestruturas e máximo nun momento como no actual no que a apertura do canal de Panamá, quero dicir, potencia o carácter loxístico deste Porto e deste área xeográfica do noroeste peninsular.

Polo tanto, unha vez máis o goberno do Partido Popular ataca a Vigo porque expropia recursos da nosa Zona Franca para adicalos a outras zonas francas menos rendibles creadas ás veces por meras vontades políticas, non se entende que Sevilla teña unha Zona Franca cando ten a Zona Franca de Cádiz ao carón, non se entende.

SR. PÉREZ CORREA: Dende logo si que foi unha sorpresa dese fondo que non é en si para financiar outras zonas francas deficitarias, senón que en teoría ou polo menos como se nos dixo por parte do goberno, era para financiar a industria 4.0 e o desenvolvemento do I+D+I, creo que é baixo ese epígrafe de industria 4.0, creo que estamos ante o novo pelotazo posiblemente despois do I+D+I que ten a industria deste país, estamos abrindo un escenario de suposta industria 4.0 o que é ao fin e ao cabo, un uso bastante discutible dos recursos públicos, nós sempre vimos con certo recelo a existencia de novas zonas francas, efectivamente, a de Sevilla non é que non dea arrancado, é que xa é deficitaria dende o seu nacemento, que non ten ningún tipo de sentido que se abra esa zona franca precisamente por esa cuestión que citaba o concelleiro, da existencia dunha zona franca rendible e que xunto con Sevilla e Cádiz son das primeiras que xa estaban tendo unha parte do imposto de sociedades das empresas que estaban aí, xa estaban recibindo esas parte, Vigo tamén, Vigo é unha zona franca que xa recibía unha parte dese imposto de sociedades das empresas que están establecidas na zona franca, pero nós tamén queremos introducir algunhas cuestións, nós discrepamos que a Zona Franca sexa exclusivamente a Zona Franca de Vigo, entre outras cousas porque ten unha serie de infraestruturas que tamén están dando beneficios e que polo tanto teñen que ter retorno para as comunidades onde están

ubicadas como é a Plisan, o Polígono da Granxa, o Porto do Muelle que tamén forma parte do patrimonio da Zona Franca e que polo tanto temos que pensar que a Zona Franca é unha área e non circunscrita exclusivamente a Vigo, polo tanto, non é unha cuestión localista entre Vigo e o resto de Zona Franca senón que hai que ver a Zona Franca como un motor económico alén dos límites do termo municipal de Vigo e si é certo que discrepamos dese fondo, porque non estamos a falar dun fondo de solidariedade, de compensación territorial, non estamos a falar da Seguridade Social nin estamos a falar do reparto dos recursos para diferentes comunidades autónomas, estamos a falar de unidades económicas que teñen que ser independentes, que non ten porque haber unha, máis alá das cuestións xurídicas ou máis alá das cuestións incluso que poidan facerse dentro dese ámbito da posibilidade de que se coordinen as Zonas Francas europeas, cremos que cada Zona Franca ten que ter unha unidade de xestión independente e se unha zona franca está ben xestionada e ten moitos recursos que eses recursos queden obviamente no territorio, xa digo, non exclusivamente Vigo pero si no territorio onde actúa esa Zona Franca. Se nós dixeran claramente para que é ese fondo, que nós estamos de acordo que subxace detrás é o financiamento de novas zonas francas que son absolutamente discutibles, incluída a de Santander, que cremos que é bastante discutible, pois pensamos que ao mellor detrás deste fondo que se vai a obrigar a colocar moitos recursos económicos que poida haber efectivamente que as zonas francas rendibles estean financiando ás menos rendibles, pero tamén nos gustaría, polo menos por parte do goberno, que se clarexara porque ese mal chamado de industria 4.0 porque nós realmente non vemos que estea dentro dos obxectivos dese fondo económico, estamos de acordo con que se retire, de feito o grupo parlamentario de Marea e Unidos Podemos pediuno así no Congreso dos Deputados como unha das cuestións máis discutibles dentro programa orzamentario das cuestións que van análogas ao Orzamento, entendemos que isto efectivamente é un fondo para financiar malas ideas do Partido Popular, estamos de acordo coa moción, pero tamén nos gustaría que dunha vez por todas intentáramos repensar a Zona Franca pois non como nunha cousa exclusiva de Vigo senón como un motor económico de toda a área e como digo tamén daqueles sitios como O Porriño, Nigrán, ou Salvaterra onde tamén está actuando a Zona Franca.



SR. FIDALGO IGLESIAS: Nós como esta moción presentouse con posterioridade á data de Xunta de Voceiros, o día despois, pois teríamos moito que dicir porque aquí fala quen menos sabe sobre ese tema pero non imos falar.

SR. ANEIROS PEREIRA: Si, efectivamente, neste caso non se trata de facer localismo, Sr. Pérez Correa, se trata de defender o tecido produtivo desta cidade, defender polo tanto os postos de traballo que están nesta cidade e defender tamén os recursos que a legalidade vixente ata o de agora asinaba á Zona Franca de Vigo, porque nun contexto internacional como no que nos movemos é importante que as empresas non se deslocalicen, polo tanto, é importante que a Zona Franca invista os seus recursos na nosa cidade tamén nas cidades e nos pobos da nosa contorna pero coa única finalidade de manter, como digo, o tecido produtivo da cidade, da contorna e sobre todo dos postos de traballo.

É importante ter en conta que non podemos mirar a outro lado cando as rutas marítimas pasan por diante das nosas augas, da nosa cidade e a nosa Zona Franca é un importante, digamos, almacén loxístico para o almacenamento, comercialización a fabricación destas mercadorías, Vigo é unha cidade solidaria, somos un goberno solidario, non nos opoñemos a solidariedade pero sempre dentro dunhas regras e non a expropiación sen límite destes recursos que ten a Zona Franca de Vigo que ten polo tanto a cidade de Vigo.

Non nos sorprende a posición do Partido Popular porque este silencio cómplice o que pretende é respaldar a decisión do seu Ministro o Sr. Montoro, do seu presidente o Sr. Rajoy, o aínda presidente do goberno o Sr. Rajoy, aínda lle quedan unha horas de presidente do goberno pero o que fan e a cidade ten que sabe é que o Partido Popular de Vigo non está defendendo os intereses da cidade de Vigo, non está defendendo os intereses dos traballadores/as da cidade de Vigo, tampouco aos empresarios/as da cidade de Vigo, a xeración de capacidade económica, de produtividade, negocio, de desenvolvemento desta cidade, está simplemente gardando silencio, un silencio cómplice para manter unha posición de, digamos de respaldo ao seu aínda goberno no Estado español, non entendemos porque o Partido Popular de Vigo non defende os intereses de Vigo, non sabemos si xa se vai presentar por outro concello, un concello portugués ou doutra localidade, pero a

nós o que nos importa é Vigo, e como Vigo nos importa, defendemos os intereses de Vigo, por iso defendemos o mantemento dos recursos financeiros para a Zona Franca de Vigo e rexeitamos enerxicamente esa inclusión na Lei de orzamentos xerais do estado de 2018, desa expropiación de millóns de euros da Zona Franca de Vigo para destinalos a outras Zonas Francas do Estado.

*(No momento da votación preside o 1º Tenente de Alcalde, Sr. Regades Fernández, por ausencia do Presidente).*

VOTACIÓN: Por unanimidade dos dezasete membros que manifestaron o seu votos, dos vinte e tres membros presentes da Corporación e dos vinte e sete que a constitúen de dereito e feito, adóptase o seguinte,

ACORDO:

Aprobar a Moción presentada, en data 25.05.2018 (Rex. Nº 1777/1101), polo concelleiro do grupo municipal Socialista, Sr. Aneiros Pereira, cuxo texto consta transcrito nos antecedentes deste acordo.

### **PARTE DE CONTROL**

#### **10(85).- DAR CONTA DE RESOLUCIÓNS DA ALCALDÍA.**

ANTECEDENTES: Dáse conta das Resolucións da Alcaldía incluídas no expediente 348-1102.

*De todo o anterior a Alcaldía-Presidencia dá conta ao Pleno da Corporación, que queda enterado.*

**11(86).- DAR CONTA DE RESOLUCIÓNS ASINADAS POR CONCELLEIROS/AS DELEGADOS/AS.**

ANTECEDENTES: Dáse conta das Resolucións dos concelleiros delegados incluídas no expediente 349-1102.

*De todo o anterior a Alcaldía-Presidencia dá conta ao Pleno da Corporación, que queda enterado.*

**12(87).- DAR CONTA DA RESOLUCIÓN DA ALCALDÍA, DE DATA 9.05.2018, POLA QUE SE ORDENA A PUBLICACIÓN NO BOLETÍN OFICIAL DA PROVINCIA DA ORDENANZA REGULADORA DO REXISTRO DE ENTIDADES URBANÍSTICAS COLABORADORAS DO CONCELLO. EXPTE. 5180/401. REXISTRO PLENO 1767/1101.**

ANTECEDENTES.- Dáse conta da Resolución da Alcaldía, de data 9.05.2018, transcrita a continuación.

"O Concello Pleno, en sesión de 28.02.2018, acordou a aprobación inicial da Ordenanza Reguladora do Rexistro de Entidades Urbanísticas Colaboradoras do Concello de Vigo instrumentando a súa información pública por un período de 30 días mediante anuncios insertados no BOP do 15 de marzo e na sede electrónica municipal [www.vigo.org](http://www.vigo.org) ao obxecto da presentación de reclamacións e suxestións. Segundo certificación emitida polo responsable do Rexistro Xeral no período de información pública non se ten presentado reclamacións nin suxestións polo que a Ordenanza, de conformidade co sinalado no artigo 49 da Lei 7/1985, de 2 de abril, Reguladora das Bases do Réxime Local, debe de entenderse definitivamente aprobada. A efectos da súa entrada en vigor, en cumprimento do sinalado no artigo 70.2 da Lei 7/1985, resolvo:

PRIMEIRO. Publicar a Ordenanza Reguladora do Rexistro de Entidades Urbanísticas Colaboradoras do Concello de Vigo no Boletín Oficial da Provincia a efectos da súa entrada en vigor segundo o texto que consta no Anexo a esta Resolución.

SEGUNDO. Dar conta individualizada da presente Resolución ao Consello da

Xerencia de Urbanismo e ao Pleno do Concello de Vigo.

TERCEIRO. O acordo de aprobación da Ordenanza pon fin á vía administrativa, contra o mesmo os interesados, de conformidade coa Lei 29/1998, do 13 de xullo, Reguladora da xurisdición contencioso-administrativa, poderán interpoñer recurso contencioso-administrativo ante a Sala do Contencioso-Administrativo do Tribunal Superior de Xustiza de Galicia, no prazo de dous meses, contados a partir do día seguinte o desta Resolución no Boletín Oficial de la Provincia, sen prexuízo da interposición daqueles outros recursos que estimen conveniente.

JRB

## ANEXO

### ORDENANZA REGULADORA DO REXISTRO MUNICIPAL DE ENTIDADES URBANÍSTICAS COLABORADORAS DO CONCELLO DE VIGO.

#### PREÁMBULO

As entidades urbanísticas colaboradoras constitúen a máis xenuina expresión da colaboración dos particulares na xestión urbanística, como entes instrumentais que asumen funcións públicas para a máis eficaz xestión e execución do planeamento urbanístico.

Na nosa comunidade autónoma esta colaboración ven recoñecida no artigo 322.1 do Decreto 143/2016, de 22 de setembro, polo que se aproba o Regulamento da Lei 2/2016, de 10 de febreiro, do Solo de Galicia (no sucesivo, RLSG) que habilita aos propietarios a participar na xestión urbanística mediante a creación de entidades urbanísticas colaboradoras dependentes da Administración urbanística actuante, a quen competará, segundo o artigo 10.1 do Real decreto lexislativo 7/2015, de 30 de outubro, polo que se aproba o Texto refundido da Lei de solo e rehabilitación urbana (TRLSRU), a aprobación dos seus estatutos, momento a partir do que adquirirán personalidade xurídica.

Estas entidades están dotadas de personalidade xurídica propia e independente da dos membros que a integran e da Administración actuante da que dependen, teñen a súa propia capacidade xurídica, de obrar e procesual e, como tales, dispoñen do seu propio réxime de obrigas e responsabilidades e dun especial réxime estatutario que define a súa estrutura e funcionamento dentro do marco legal que as define.

Con base ao establecido no artigo 27 do Decreto 3288/1978, de 25 de agosto, polo que se aproba o Regulamento de xestión urbanística para o desenrolo e aplicación da Lei sobre réxime do solo e ordenación urbana (afectado pola disposición derradeira segunda do RLSG) e demais normativa concordante, na nosa comunidade autónoma estas entidades inscribíanse no Rexistro de Entidades Urbanísticas Colaboradoras dependente da Xunta de Galicia, momento a partir do que adquirirían personalidade xurídica propia. Hoxe, sen embargo, este requisito queda substituído polo da aprobación dos seus estatutos (artigo 10 do TRLSRU). Neste senso, compre sinalar cómo o Rexistro de Entidades Urbanísticas Colaboradoras autonómico foi suprimido por mor da disposición adicional primeira

do RLSG, en consonancia coa regulación da materia derivada do Real decreto lexislativo 7/2015, do 30 de outubro, polo que se aproba o Texto refundido da Lei de Solo.

Con todo, o artigo 322.6 do RLSG habilita aos Concellos a crear, regular e xestionar os seus propios rexistros administrativos das entidades urbanísticas colaboradoras radicadas no seu ámbito territorial.

Pois ben, malia a non obrigatoriedade deste tipo de rexistros, o certo é que se trata dun instrumento útil como ferramenta para o control e seguemento da actividade destas entidades, facilitando o exercicio das funcións de control, fiscalización e tutela que ten asumidas a Administración urbanística, ademais de contribuír á transparencia no exercicio da función pública urbanística, sendo así que responde aos principios de necesidade e eficacia. A levanza organizada dun rexistro no que se consignan os datos organizativos máis relevantes das entidades urbanísticas colaboradoras permite un control máis eficiente das funcións administrativas, conténdose nesta iniciativa, de acordo co principio de proporcionalidade, a regulación imprescindible para atender tales finalidades de forma coherente co resto do ordenamento xurídico e, singularmente, en exercicio da habilitación contida no artigo 322.6 do RLSG.

Desta forma, a norma opta pola simplificación de trámites e fomenta a iniciativa municipal na inscrición dos diferentes actos e datos, favorecendo o máis eficiente control do funcionamento das entidades urbanísticas colaboradoras e evitando cargas administrativas innecesarias.

Conseguentemente, harmonizando cos diferentes principios consignados no artigo 129 da LPACAP, a norma responde aos principios de necesidade e eficacia, proporcionalidade, seguridade xurídica, transparencia e eficiencia.

Xa que logo, accederán ao Rexistro aqueles datos que teñan relevancia dende o punto de vista das funcións públicas que teñen encomendadas e que afectan directamente á composición deste tipo de entidades, así como ao seu funcionamento no ámbito da xestión urbanística. Así mesmo, o control da levanza organizada destes datos procurará unha maior concienciación sobre a importancia da identificación dos membros de cada entidade, coas posibles subrogacións que puideran terse producido, así como dos seus órganos de goberno, entre outras, cuestións, e todo elo sen xerar novas cargas administrativas innecesarias ou accesorias, fomentándose a incorporación ao Rexistro de oficio dos actos e datos comunicados.

Refórzase, desta forma, a seguridade xurídica do sistema e a transparencia no funcionamento dunhas entidades que, en definitiva, exercen funcións público-urbanísticas de carácter administrativo, tales como: a xestión urbanística, a execución do planeamento e a conservación das obras de urbanización; cumpríndose, así mesmo, coas previsións legais a respecto do acceso e participación activa dos destinatarios tanto durante á elaboración da norma como cara a súa publicidade e coñecemento.

Así mesmo, dotarase a este Rexistro de certa flexibilidade co fin de que poidan incorporarse tamén outro tipo de entidades ademais das estritamente recoñecidas na referida normativa autonómica, tales como as asociacións administrativas facultadas pola lexislación estatal de referencia para actuar no mercado inmobiliario con plena capacidade xurídica e que, na actualidade relaciónanse co deber de conservación e participación en actuacións de rexeneración e renovación urbanas, así como aquelas que contemple a normativa autonómica que regule ese tipo de intervencións, sempre que compartan esa natureza de entidades urbanísticas colaboradoras.

É por elo, que resultando conveniente a creación dun Rexistro municipal propio no que se leven, consignen e arquiven aqueles datos e acordos considerados máis relevantes para o funcionamento e seguimento das entidades urbanísticas colaboradoras dependentes do Concello de Vigo, considérase acaído exercitar a habilitación contida no referido artigo 322.6 do RLSG e poder, así, dispoñer dun instrumento de control propio e con plenos efectos xurídicos, que contribúa ao exercicio das funcións urbanísticas encomendadas a esta Administración tutelante.

Desta forma, a inscrición no Rexistro municipal aínda que non resulta un requisito exigible para a adquisición de personalidade xurídica propia, permitirá dispoñer dunha relación actualizada e organizada dos máis relevantes actos, datos e información que afectan ao funcionamento de cada entidade urbanística colaboradora, dotando a esta ferramenta, para maior garantía xurídica, das formalidades e efectos xurídicos propios dun instrumento desta natureza.

## CAPÍTULO I. DISPOSICIÓNS XERAIS

### Artigo 1. Obxecto.

A presente Ordenanza ten por obxecto regular o Rexistro municipal de entidades urbanísticas colaboradoras dependentes do Concello de Vigo, creado ao abeiro do disposto no artigo 322.6 do Decreto 143/2016, do 22 de setembro, polo que se aproba o Regulamento da Lei 2/2016, de 10 de febreiro, do Solo de Galicia (RLSG), en aplicación do que os concellos poderán crear, regular e xestionar un rexistro administrativo de entidades urbanísticas colaboradoras radicadas no seu ámbito territorial.

### Artigo 2. Ámbito de aplicación.

1. A presente Ordenanza aplicarase a todas aquelas entidades urbanísticas colaboradoras constituídas ou que se constituán no termo municipal de Vigo para a xestión urbanística.

De acordo co establecido no artigo 323 do RLSG, as entidades urbanísticas colaboradoras teñen carácter administrativo e dependen, nesta orde, da Administración urbanística actuante. Dispoñen de personalidade e capacidade xurídica propias para o cumprimento dos seus fins.

2. Teñen a condición de entidades urbanísticas colaboradoras, de conformidade coa clasificación establecida no artigo 322.2 do RLSG:

- a) As asociacións administrativas de propietarios no sistema de cooperación
- b) As entidades urbanísticas de xestión no sistema de concerto
- c) As xuntas de compensación
- d) As entidades urbanísticas de conservación

Terán esta mesma condición todas aquelas entidades que con esta mesma natureza sexan recoñidas pola normativa urbanística.

### Artigo 3. Natureza

O Rexistro Municipal de Entidades Urbanísticas Colaboradoras ten a consideración de rexistro administrativo, electrónico e público e nel se inscribirán todas as entidades urbanísticas colaboradoras constituídas e que se constitúan para o desenvolvemento e xestión urbanística.

## CAPÍTULO II. FUNCIONAMENTO E ORGANIZACIÓN DO REXISTRO DE ENTIDADES URBANÍSTICAS COLABORADORAS

### Artigo 4. Responsable do rexistro

O Servizo competente en materia de xestión urbanística será o responsable da levanza do Rexistro, así como do mantemento, actualización, coordinación e seguemento dos datos que nel se consignen, da práctica das inscricións e anotacións que resulten procedentes e da expedición de copias, informes e certificacións, cando proceda.

### Artigo 5. Inscricións

Causarán alta no rexistro as entidades urbanísticas colaboradoras, de oficio e sen necesidade de previa solicitude polos interesados, aquelas entidades que figuraran inscritas, antes da entrada en vigor desta Ordenanza, no Rexistro de Entidades Urbanísticas Colaboradoras dependente da Xunta de Galicia.

As demais entidades inscribíranse logo da súa formal constitución e, nos casos nos que o exixa a normativa de aplicación, da súa aprobación pola Administración actuante.

A inscrición daqueles acordos ou datos que non requiran de aprobación municipal producirase previa solicitude da entidade urbanística colaboradora. Entederase implícita esta solicitude coa presentación, perante a Administración tutelante, dos acordos e datos susceptibles de acceder ao Rexistro, vía inscrición e/ou vía depósito.

Na inscrición da entidade urbanística colaboradora faranse constar os seus datos identificativos e un código diferenciador.

As entidades urbanísticas colaboradoras serán responsables de comunicar ao Concello de Vigo, a través da Xerencia Municipal de Urbanismo, e instar a aprobación municipal nos casos nos que o exixa a normativa de aplicación, de calquera modificación que se produza nalgún dos apartados referidos no artigo 6.2 desta Ordenanza.

## Artigo 6. Organización

1.O Rexistro levarase en soporte electrónico e estará constituído por seccións e subseccións nas que se consignarán os diferentes datos de todas as entidades que causen inscrición.

O rexistro dividirase nas seguintes seccións en función do carácter de cada unha das entidades constituídas:

- a) xuntas de compensación
- b) asociacións administrativas de propietarios
- c) entidades urbanísticas de xestión
- d) entidades urbanísticas de conservación
- e) outras entidades urbanísticas colaboradoras

2. Cada entidade urbanística colaboradora inscrita dentro da súa sección rexistral dará lugar aos seguintes apartados ou subseccións:

- 1) Asento de inscrición
- 2) Acordo de constitución
- 3) Estatutos e bases de actuación
- 4) Membros do órgano reitor
- 5) Listaxe de xunteiros
- 6) Outros
- 7) Entidades canceladas

3. No asento de inscrición consignaranse os seguintes apartados:

- N.º de rexistro (código diferenciador)
- Data de inscrición
- Denominación da entidade
- Domicilio social
- Cargos
- Obxecto e fins
- Documento de constitución da entidade/data de aprobación

4. Ao apartado correspondente ao acordo de constitución incorporarase un exemplar orixinal ou copia auténtica do acordo e da escritura pública de constitución.

5. Ao apartado correspondente dos estatutos e bases de actuación incorporarase un exemplar orixinal ou copia auténtica dos estatutos e bases de actuación da entidade e as súas modificacións, consignándose, así mesmo, a data de



aprobación en cada caso.

6. Ao apartado correspondente á inscrición dos membros do órgano reitor, consignaranse os datos identificativos das persoas que ocupan os distintos cargos do dito órgano, deixando constancia da data de designación/aceptación do cargo, prórrogas e renovacións que sexan comunicadas. A renovación dos cargos non dará lugar a eliminación das inscricións anteriores, polo que sempre deixárase constancia das persoas que ostentaron cada cargo en cada momento.

7. No apartado destinado á listaxe de xuntesiros, figurarán estes e as súas modificacións, cos seguintes datos mínimos: nome e apelidos, dni, enderezo, data de incorporación/adhesión, parcelas cuxa titularidade lle corresponda, cuota de participación e data na que teña lugar, de ser o caso, a subrogación. As subrogacións non producirán a eliminación das inscricións dos xuntesiros subrogados de tal forma que se deixe sempre constancia das persoas propietarias en cada momento.

8. No apartado “Outros” incorporaranse outros datos de interese non contemplados nas anteriores subseccións (tales como, datas de aprobación de instrumentos de equidistribución, operacións xurídicas complementarias, conta de liquidación definitiva, etc.).

9. O Rexistro disporá dun “histórico” ao que se incorporarán os datos e inscricións correspondentes ás entidades urbanísticas colaboradoras canceladas.

10. Todos os documentos que accedan ao Rexistro deberán ser orixinais ou copias debidamente autenticadas.

#### Artigo 7. Cancelación

Practicarase a cancelación da inscrición das entidades urbanísticas colaboradoras cando sexa aprobada a súa disolución pola administración urbanística actuante por concorrer algún dos supostos legalmente previstos para lexitimar a dita disolución ou ben por resolución xudicial firme.

A cancelación requirirá da previa formalización da disolución en escritura pública ou documento protocolizado notarialmente nos termos do exixido no artigo 328.2 do Decreto 143/2016, de 22 de setembro, polo que se aproba o Regulamento da Lei do Solo de Galicia.

En todo caso, a práctica do asento de cancelación non significará a desaparición das inscricións e demais asentos que tiveran sido practicados a respecto da entidade cancelada, que deberán ser conservados pola administración urbanística actuante.

#### Artigo 8. Asento de rectificación

Os erros materiais, de feito ou aritméticos, que se detecten no contido dos asentos practicados, serán rectificadas, de oficio ou a instancia de parte, polo

encargado do Rexistro mediante anotación de rectificación.

#### Artigo 9. Nota ao marxe

Poderán acceder ao Rexistro mediante nota ao marxe aqueles datos ou circunstancias cuxa constancia se estime de interese para o bo funcionamento do seguemento da xestión urbanística e que non dean lugar a práctica de inscricións.

### CAPÍTULO III. EFICACIA E ACCESO

#### Artigo 10. Eficacia

Os datos consignados no Rexistro presumiranse válidos e veraces, agás proba en contrario, polo que producirán plenos efectos. Así mesmo, presumirase a validez e eficacia dos documentos nel depositados.

#### Artigo 11. Acceso ao rexistro

Terá lugar na forma establecida na lei procedimental común e demais que rexan o acceso aos rexistros públicos.

Os datos persoais que figuren no rexistro estarán protexidos pola lexislación reguladora da protección de datos de carácter persoal.

#### Artigo 12. Certificacións e copias

Nos casos nos que sexa autorizado, expediranse certificacións dos datos que se consignen no Rexistro ou copias dos documentos que figuren nel, sen que con elo quede habilitado o solicitante/consultante para o tratamento posterior deses datos ou a súa inclusión nun ficheiro dos previstos na Lei orgánica 15/1999, de 13 de outubro, de Protección de datos de carácter persoal. A expedición de certificados e copias estará suxeita ao previo aboamento das taxas vixentes no Concello de Vigo.

#### Artigo 13. Taxa

Pola práctica das inscricións devengaranse as taxas que legalmente se aproben polo Concello de Vigo.

#### Disposición adicional única

No caso de entidades urbanísticas colaboradoras constituídas antes da entrada en vigor desta Ordenanza, cando as circunstancias do caso o xustifiquen, será suficiente coa inscrición no Rexistro Municipal de Entidades Urbanísticas Colaboradoras dos datos identificativos da entidade, domicilio social e membros do órgano reitor que consten no Rexistro de Entidades Urbanísticas Colaboradoras dependente da Xunta de Galicia, sen prexuízo do que, os actos posteriores a súa entrada en vigor deberán ter acceso ao Rexistro.

#### Disposición final única

Esta ordenanza entrará en vigor cando, publicado o texto íntegro no Boletín Oficial da Provincia, transcurra o prazo previsto no artigo 65.2 da Lei 7/1985, de 2 de abril, reguladora das bases de réxime local (en diante, LRBRL), de conformidade co establecido no artigo 70.2 da LRBRL.

*De todo o anterior a Alcaldía-Presidencia dá conta ao Pleno da Corporación, que queda enterado.*

**13(88).- DAR CONTA DO ACORDO DA XUNTA DE GOBERNO LOCAL, DE DATA 10.05.18, DE MODIFICACIÓN DO ACORDO DE 19.06.15, DE DELEGACIÓN DE COMPETENCIAS DA XGL NOS CONCELLEIROS DELEGADOS DE ÁREA EN MATERIA DE CONTRATACIÓN. EXPTE. 334/1102. REXISTRO PLENO 1765/1101.**

ANTECEDENTES.- Dáse conta do acordo da Xunta de Goberno Local, de data 10.05.18, transcrito a continuación.

“2.- MODIFICACIÓN DO ACORDO DE DATA 19/06/15, DE DELEGACIÓN DE COMPETENCIAS DA XUNTA DE GOBERNO LOCAL NOS CONCELLEIROS-DELEGADOS DE ÁREA EN MATERIA DE CONTRATACIÓN. EXPTE. 334/1102.  
Dáse conta do informe-proposta de data 7/05/18, asinado pola secretaria do Goberno e polo Excmo. Alcalde, que di o seguinte:

Examinada a proposta da xefa do Servizo de Contratación de data 02/05/18, conformada polo concelleiro-delegado de área, relativo á modificación do réxime de delegación de competencias da Xunta de Goberno Local de data 19 de xuño de 2015 (Expte. 74/1102) co seguinte contido:

*“A Lei 9/2017, de 8 de novembro, de Contratos do Sector Público, pola que se transpoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014 (LCSP), crea un novo procedemento aberto simplificado no artigo 159. No punto 6 do citado artigo prevese unha tramitación abreviada do mesmo para contratos de obras de valor estimado inferior a 80.000 euros, e contratos de subministros e de servizos de valor estimado inferior a 35.000 euros, con excepción dos que teñan por obxecto prestacións de carácter intelectual. Este procedemento caracterízase por a súa simplicidade e axilidade. Para reforzar esta axilidade parece aconsellable delegar nos concelleiros delegados da área a que pertenza o servizo xestor as facultades relativas á aprobación da memoria de obras ou o proxecto de obras, no seu caso,*

*e a adxudicación dos mesmos, sen necesidade de esperar a convocatoria semanal do órgano de contratación.*

*Así mesmo, en aras da mellora na tramitación dos procedementos de contratación, parece aconsellable delegar determinadas competencias do órgano de contratación nos respectivos Concelleiros delegados. Esta delegación redundará na simplificación administrativa, así como na axilidade da tramitación dos procedementos de contratación, que xa son longos de seu pola súa complexidade, e por ende, nunha maior eficacia da organización municipal. Tales competencias serían as relativas a prórroga do prazo de execución das obras e o acordo de suspensión das mesmas.*

*Por último, e polas razóns expostas, resulta aconsellable delegar no Concelleiro delegado de Contratación a aprobación da resposta as aclaracións formuladas polos interesados nos procedementos de contratación durante o prazo de presentación de ofertas. Dados os curtos prazos para responder as mesmas parece preferible que sexan aprobadas polo Concelleiro delegado sen necesidade de esperar a convocatoria semanal da Xunta de Goberno Local.*

*Á vista do exposto propónse:*

*“1º.- A delegación das competencias da Xunta de Goberno Local nos Concelleiros delegados das diferentes áreas municipais para a realización dos seguintes trámites:*

- 1. A prórroga do prazo de execución das obras.*
- 2. O acordo de suspensión do contrato.*
- 3. A aprobación da memoria de obras ou o proxecto de obras, de tratarse dun contrato de obras que se adxudique a través de contrato menor ou polo procedemento simplificado abreviado previsto no artigo 159.6 da LCSP.*
- 4. A adxudicación dos procedementos abertos simplificados de tramitación abreviada previstos no artigo 159.6 da LCSP.*

*2º.- A delegación das competencias da Xunta de Goberno Local no Concelleiro delegado de Contratación relativas á aprobación da resposta ás aclaracións formuladas polos interesados nos procedementos de contratación durante o prazo de presentación de ofertas”.*

Vista a conveniencia de impulsar o cumprimento dos principios de eficacia, eficiencia e axilidade na xestión pública no Concello de Vigo, no uso da potestade de dirección do goberno e das organizativas e estruturais que, en relación coa Administración Municipal ostenta esta Alcaldía -art. 124.4 da Lei 7/1985, Reguladora das Bases do Réxime Local, e de conformidade co previsto nos artigos 43 e seguintes do RD 2568/1986, do 28 de novembro, polo que se aproba o Regulamento de Organización, Funcionamento e Réxime Xurídico das Corporacións Locais, formulo á Xunta de Goberno Local a seguinte:

#### PROPOSTA DE ACORDO:

Primeiro.- Modificar o acordo da Xunta de Goberno Local de delegación de competencias nos

Concelleiros Delegados de data 19 de xuño de 2015, coas súas modificacións, incluíndo o seguinte contido:

Engadir no apartado "Segundo.- *Así mesmo todos os concelleiros delegados das Áreas mencionadas na resolución da Alcaldía do 17 de xuño de 2015 exercerán, por delegación desta Xunta de Goberno Local e con carácter xenérico, as seguintes atribucións:*"

A realización dos seguintes trámites:

1. A prórroga do prazo de execución das obras.
2. O acordo de suspensión do contrato.
3. A aprobación da memoria de obras ou o proxecto de obras, de tratarse dun contrato de obras que se adxudique a través de contrato menor ou polo procedemento simplificado abreviado previsto no artigo 159.6 da LCSP.
4. A adxudicación dos procedementos abertos simplificados de tramitación abreviada previstos no artigo 159.6 da LCSP.

Segundo.- Modificar o acordo da Xunta de Goberno Local de delegación de competencias nos Concelleiros Delegados de data 19 de xuño de 2015, coas súas modificacións, engadíndolle no apartado "VII.- NA CONCELLERÍA DELEGADA DA ÁREA DE FOMENTO, LIMPEZA E CONTRATACIÓN. *En materia de Contratación*" a seguinte competencia:

-A aprobación da resposta ás aclaracións formuladas polos interesados nos procedementos de contratación durante o prazo de presentación de ofertas.

Terceiro.- Notificar este acordo ao conxunto dos/das titulares das concellerías-delegadas municipais, comunicalo aos responsables dos servizos e áreas municipais e, para xeral coñecemento e efectos, dar publicidade do mesmo mediante a súa inserción na Intranet municipal.

Cuarto.- O presente acordo entrará en vigor no mesmo momento da súa aprobación, sen prexuízo da súa publicación no BOP, na sede electrónica municipal e no Portal de Transparencia do Concello de Vigo, para os efectos do disposto no artigo 6 da Lei 19/2013, de 9 de decembro, de Transparencia, Acceso á Información Pública e Bo Goberno.

Quinto.- Deste acordo darase conta de forma individualizada ao Pleno da Corporación ao abeiro do art. 38 do RD 2568/1986.

#### Acordo

A Xunta de Goberno local aproba a proposta contida no precedente informe."

*De todo o anterior a Alcaldía-Presidencia dá conta ao Pleno da Corporación, que queda enterado.*

## **MOCIÓNS.**

### **14(89).- MOCIÓN DO GRUPO MUNICIPAL DO PARTIDO POPULAR, INSTANDO AO GOBERNO MUNICIPAL Á CONTRATACIÓN DE TRABALLADORES SOCIAIS PARA ATENDER AS NECESIDADES DOS VIGUESES E MELLORAR OS TEMPOS DE TRAMITACIÓN DA RISGA, E OUTROS ACORDOS COMPLEMENTARIOS. EXPTE. 1772/1101.**

ANTECEDENTES.- Por escrito de data de entrada no Rexistro do Pleno do 24 de maio de 2018, número 1772/1101, a concelleira do grupo municipal do Partido Popular, Sra. González Sánchez, formula a seguinte,

#### **MOCIÓN**

Unha rápida ollada ás contas municipais basta para determinar a política deste concello. Sen ir máis lonxe, as cifras do orzamento deste ano reflicten unha realidade ante a que o goberno local parece ausente. Así, por exemplo, téñense reducido un 15% as partidas para o impulso de actividades cos grupos máis desfavorecidos, do mesmo xeito que se conxelan convenios tan importantes como os de Afaga, Vida Digna ou o Banco de alimentos.

Esta situación amosa un executivo que vive de costas á pobreza, e que se fai extensible a outras situacións verdadeiramente dramáticas, como é o caso dos tempos de tramitación da Risga, do número de traballadores sociais ou mesmos do cifra de persoas maiores que viven soas.

A realidade é especialmente sangrante no caso da Renda de Integración Social, cuxos tempos de tramitación acadan neste concello os 181 días. Seis meses para tramitar unha axuda que resulta básica para a sustentabilidade da persoa que a solicita. Medio ano, nada máis e nada menos; o triplo que na cidade da Coruña, catro veces máis que en Santiago ou cinco veces máis que en Pontevedra.

Unha situación increíble que encontra parte da súa razón de ser no departamento de Benestar Social deste Concello. Non en van, e como todos saben, os últimos informes da xefa desta área definen como “moi grave” a situación de persoal na que se atopa o departamento.

Pese a todo, en ante a urxente necesidade de contratar 11 traballadores, que se arrastra desde fai meses, o goberno municipal apenas foi quen de nomear tres interinos, polo que, tamén neste caso, A Coruña ten o triplo de traballadores sociais que Vigo. Aquí temos unha traballadora social por cada 17.200 habitantes;

en A Coruña, cada 6.000.

Fronte a todo isto, a única acción medianamente útil deste concello redúcese aos coñecidos coidadores de barrio. Coidadores que, sen embargo, non garanten outra acción de todo necesaria: a elaboración dun censo de persoais maiores que viven soas, unha realidade crecente e totalmente esquecida.

Por todo o anteriormente exposto, o grupo municipal do Partido Popular insta ao Pleno da Corporación á adopción do seguinte acordo:

- Instar ao Goberno municipal a contratación do número de traballadores sociais necesarios para atender as necesidades dos vigueses, en particular na mellora dos tempos de tramitación da Risga.
- Instar ao Goberno municipal a aproveitar a figura dos coidadores de barrio para elaborar un censo real de persoas maiores que viven soas en Vigo.”

DEBATE:

SRA. GONZÁLEZ SÁNCHEZ: Antes de comezar coa miña exposición si que me gustaría dicir algo que é que non me colle no corpo, despois de ver a última actuación do Sr. Alcalde dou por moi feito e moi ben posto nas redes sociais algo que di “que rápido se pasa de ser un covarde a ser un tirano” e agora si que comezo coa miña exposición.

Onte as 8,30 da mañá a Sra. Abelairas chamou á voceira do Partido Popular para pedirlle por favor que retirásemos a moción porque a súa saúde non lle permite, está nestes momentos, parece, que en tratamento pola súa enfermidade, nós presentamos esta moción 5 días antes do Pleno, a Sra. Abelairas chamounos onte ás 8,30, iso quere dicir moito da ética do Partido Socialista. Despois de presentar esta moción, imos retirar a moción pero eu si quero falar de como se levou a cabo isto, marche vostede tamén Sr. Rodríguez Escudero. Nós si respectamos a enfermidade da Sra. Abelairas quen non a respectou foron vostede Sr. Font, porque onte a tarde se permitiu o luxo de dar unha rolda de prensa falando dos servizos sociais desta cidade, foi vostede quen non respectou á Sra. Abelairas, nós si respectamos a saúde da Sra. Abelairas e quero que quede claro que o Partido Popular o único que lle adica á Sra. Abelairas e non fai falla que se levante ninguén porque debe estar en diferido porque hoxe as 9,45 horas no seu facebook e pódono ver todos ponos verdes sen saber o que imos facer, iso é moi propio de

vostedes, lean todos o facebook da Sra. Abelairas e saberán o que puxo ás 9,45 horas sen saber si íamos quitalo ou non, iso é vergoñento.

Xa sabíamos que a ía defender o Sr. Pardo que eu non o sabía pero iso púxoo hoxe a Sra. Abelairas ás 9,45 horas e o mantén porque lle mandou unha mensaxe a Sra. Muñoz dicíndolle que si a retirábamos e manteno en facebook porque é moi bonito manter un facebook esas cousas. Eu quero dicir simplemente que é a segunda vez que eu traio unha moción a este Pleno para falar da pobreza da cidade, a segunda vez, e non só da pobreza desta cidade senón tamén de toda a incoherencia e da ineptitude deste goberno municipal co tema social na cidade de Vigo e a segunda vez que se me da para atrás, simplemente dicir iso.

Queda retirada e espero que no próximo Pleno o Partido Socialista teña contratadas ás 9 traballadoras que el mesmo di que necesita a cidade de Vigo, que faltan para as 24, neste momento hai 15 traballadoras, espero que realmente se cumpra e claro que a retiramo pero retirámola por respecto á Sra. Abelairas.

*A concelleira poñente da moción manifesta retirar a moción.*

## **.- FORMULACIÓN DE ROGOS.**

### **16(90).-ROGO FORMULADO POLA CONCELLEIRA DO GRUPO MUNICIPAL DO PARTIDO POPULAR, SRA. EGERIQUE MOSQUERA RELATIVO Á PETICIÓN PARA INTERVIR NO PLENO DOS VECIÑOS DA GRAN VÍA.**

SRA. EGERIQUE MOSQUERA: Eu quería facer un rogo, e é que se lle dea voz aos veciños da Gran Vía que solicitaron unha petición de falar no Pleno, e un día antes curiosamente que as matronas, pero en calquera caso nos parece importante que se falen neste Pleno.

### **17(91).-ROGO FORMULADO POLA CONCELLEIRA DO GRUPO MUNICIPAL DO**



**PARTIDO POPULAR, SRA. MUÑOZ FONTERIZ RELATIVO ÁS NORMAS DEMOCRÁTICAS DO PLENO .**

SRA. MUÑOZ FONTERIZ: Rogamos dende o grupo municipal do Partido Popular que se respecten as normas democráticas, que non se exerza un abuso de autoridade como estamos a padecer nos Pleno día si e día tamén, que se respecte á oposición, que nestes momentos nos sentimos pisoteados nos nosos dereitos polo grupo Socialista, por este goberno, e polo tanto rogamus que se respecte democraticamente os dereitos da oposición e rogamus tamén que non se faga demagogia con cuestións que son importantes como neste caso é a saúde, de verdade, rogamus por normalidade democrática e por tódolos cidadáns.

**18(92).-ROGO FORMULADO POLO CONCELEIRO DO GRUPO MUNICIPAL DO PARTIDO POPULAR, SR. PARDO ESPIÑEIRA RELATIVO ÁS INTERVENCIÓNS DOS CONCELEIROS NO PLENO.**

SR. PARDO ESPIÑEIRA: Eu o que quería dicir no meu rogo é que o que hai que ter é un pouco de educación, as decisións, quen preside o Pleno, quen manda no Pleno e quen goberna na cidade o elixen os cidadáns, vostedes levan moi mal os resultados que publican as enquisas, as semanas malas, con sentencias, lévano moi mal, pero o que si é certo é que como non está a Sra. Abelairas, a Sra. Abelairas pediuno onte e non lle contestaron; logo o de tiranos, un pouco de educación e de respecto.

PRESIDENCIA: Sr. Pardo, está entendido o seu rogo, vostede o que pide no seu rogo é que haxa respecto a tódalas intervencións, que me parece lóxico e razoable o seu rogo.

Eu quería responder tamén ao rogo da Sra. Muñoz cando fala de abuso de autoridade, dereitos, democracia e demagogia, a democracia son palabras maiúsculas que tódolos concelleiros temos que respectar, todos, e as regras do xogo témolas que respectar todos, e neste caso se consultou ao secretario do

Pleno e nos dixo cales eran as regras do xogo e a forma de interpretar o Regulamento, vostedes non están de acordo nin con a interpretación que fai o Partido Socialista nin con a interpretación que fan os funcionarios do concello Habilitados Nacionais, eu creo que teñen que ser respectuosos e non falar de abusos de autoridade, de vulneración de dereitos e non falar de atentado coa democracia e sobre todo cando neste Pleno se temos un concelleiro, neste caso o Alcalde-Presidente, que por defender a democracia pasou no réxime franquista, varios días no calabozo por defender a liberdade e a democracia, porque o Partido Socialista sempre vai defender a liberdade, a democracia e os dereitos.

**.- FORMULACIÓN DE PREGUNTAS.**

**19(93).-PREGUNTA FORMULADA POLO CONCELEIRO DO GRUPO MUNICIPAL DE MAREA, SR. PÉREZ CORREA RELATIVO AO FINANCIAMENTO DO PROXECTO DA GRAN VÍA.**

SR. PÉREZ CORREA: Queríamos preguntar se ante a modificación do proxecto finalista que se financia con fondos FEDER de Gran Vía, se se notificou correctamente á Unión Europea a modificación do proxecto que está financiado con fondos EDUSI.

PRESIDENCIA: Responderáselle por escrito.

**20(94).-PREGUNTA FORMULADA POLO CONCELEIRO DO GRUPO MUNICIPAL DO PARTIDO POPULAR, SR. GAGO BUGARÍN RELATIVO Á OPOSICIÓN DO GOBERNO DE CREAR ÁREAS DE ESTACIONAMENTO PARA CARAVANAS.**

SR. GAGO BUGARÍN: Vou facer eu as dúas preguntas que nos compete ao grupo municipal do Partido Popular, a primeira pregunta é a seguinte, por que motivo o

gobierno local lle da as costas ao turismo de caravanas e aos centenaes de miles de usuarios existentes en Europa, opoñéndose a crear áreas de estacionamento para autocaravanas.

SR. LÓPEZ FONT: Deben dirixila ao goberno anterior do Partido Popular que non o fixo, nin deixou proxecto.

**21(95).-PREGUNTA FORMULADA POLO CONCELLEIRO DO GRUPO MUNICIPAL DO PARTIDO POPULAR, SR. GAGO BUGARÍN RELATIVO AO IMPEDIMENTO DOS BOMBEIROS DE EXERCER CARGOS DE RESPONSABILIDADE E HORAS ESTRUCTURAIS A PARTIRES DOS 59 ANOS.**

SR. GAGO BUGARÍN: Di o seguinte, que motivo ten o goberno local para aprobar un decreto que impide aos bombeiros da cidade unha vez cumpridos os 59 anos de idade o poder exercer as horas estruturais e os cargos de responsabilidade superior que viñan exercendo unicamente por cumprir os 59 anos de idade, tendo acreditado plenitude de facultades físicas e psíquicas, aos igual que o resto de compañeiros.

SR. LÓPEZ FONT: Invítolles a presentar unha moción para tratalo con detalle.

E sen ter máis asuntos para tratar, o Sr. Presidente deu por rematada a sesión, ás doce horas e dous minutos, da que se redacta a presente acta; como secretario dou fe do seu contido e incorpórase ó libro de actas do Pleno autorizada coa miña sinatura e máis a do Excmo. Sr. Alcalde-Presidente, conforme ó previsto no artigo 110.2 do RD 2568/1986.

am.

O ALCALDE,

O SECRETARIO XERAL DO PLENO,

Abel Caballero Alvarez

José Riesgo Boluda.